

萬有文庫

第一集一千種

王雲五主編

清詩別裁

(二)

沈德潛選



商務印書館發行

萬有文庫

第一集一千種

總編纂者

王雲五

商務印書館發行

上海圖書館藏書



A541 212 0004 0700B

清 詩 別 裁

(二)

沈德潛選



國 學 基 本 叢 書

# 清詩別裁

## 卷九

方殿元字蒙章廣東番禺人康熙甲辰進士官知郟城江寧縣著有九谷集○九谷著瓊書自成一子欲究天人竅與餘事乃作詩人也然高華伉爽依傍一空品不在嶺南三家下

### 廬山玉淵

高峯入青冥中斷忽雲樹屏風九疊間飛泉半空注奔騰過萬山至此陡欲住憚赫倅雷霆一旦失憑怒有似千古憤投入靜者慮兩崖青翠映空色交相寓淡淡與天空冥冥寫秋素窈窕散餘波疑作江漢雨幽光留人心不覺白日暮皎月上澄潭此身在何處極形奔泉陡住比之填胸憤怒忽入達士靜觀古今辭人未開此口

### 褒斜道

褒斜道三載烽煙令人老嵯峨雲棧四百里其下黑龍江中水北走三秦南走蜀長蛇猛虎盤深谷張良一燒不可測顧盼從容得秦鹿諸葛艱難數出師大星夜落三軍哭英雄成敗且有數況乃區區一狐兔黃塵瀕洞入秦川風雪關山勞遠戍鐵馬回頭望壘山斷腸家過秦川路更有子午與黃金十里百折傷人心懸崖峭壁日月黑使爾戰魂招不得此為竊據者言見英雄尚難成功況狐鼠輩耶警誠亂臣可補劍閣銘之缺

### 秋夜長



淒淒者風。胡不自東。不自南。不自北。吹我井上雙梧桐。梧桐昨夜飄孤葉。夫婿從軍入窮髮。兩地相思不相見。愁雲共掩關山月。飛鴻不我顧。海燕辭巢去。空房蟋蟀鳴。長夜漫漫誰與語。絨情含淚向天訴。蒼蒼無雲復無雨。西有牽牛東織女。

愛妾換馬

噴日嘶風紅叱撥。自似火齊汗似血。屈膝金屏出美人。邯鄲下蔡皆稱絕。英雄有事在烽烟。紅粉生離未足憐。願將妾織鴛鴦錦。裁作銀鞍滿月韉。

征怨

怯把金錢卜。春殘不道歸。昨宵看月暈。根觸幾重圍。古意古音

吳元龍字長人江南華亭人康熙甲辰進士官翰林改工部郎中已未召試博學鴻詞擢翰林院侍講著有問月堂詩鈔

賜緞絹恭紀

爲郎冰暑客。亦得荷恩私。恐負緇衣好。慙無黃絹詞。稱身安且吉。出笥卷還披。機杼需民力。艱難二月絲。上六語穩順寫題一結乃見作手

九日偕貴陽諸使君東山登高得初字

萬里登高日。千峯縱日初。天長迷近遠。雲合失崎嶇。邊徼蠻歌起。荒城落木疎。鄉心付征鴈。可許達音書。

起步似出  
唐人手。

繆 彤字歌起。江南長洲人。康熙丁未。賜進士第一人。官侍講。

### 送醫士方際泰歸茅山

賣藥長安市。超然寄一身。摺驢偏識路。破屐不生塵。入世性情古。還鄉面目真。自慚留滯客。對爾歎勞薪。

### 假歸南下欲遊五臺山

排空歷歷五高臺。想像先教眼界開。客路風光隨馬去。家鄉樹色渡江來。探奇亦自安禪味。濟勝須誰作賦才。莫道上方鐘磬杳。此身今已出塵埃。

### 渡江

涼月漾中流。金山隱隱浮。尚餘殘醉在。和夢到揚州。只清曉渡江耳。寫得渾然無跡。末五字。何減唐人聲口。

### 東臺望海峯

層層峭石擁高臺。就裏藤蘿百道開。身在雲中天水合。更於何處見蓬萊。

張 英字敦復。江南桐城人。康熙丁未進士。官至大學士。謚文端。著有存誠堂詩集。○本朝應制詩。共推文端入詞館者。奉爲枕中秘。而風格性靈。不係此也。特取高曠數篇。以著公概。

### 擬古田家詩

清詩別裁 二卷九

064621

柴門擁溪水。溪響無朝昏。農夫荷鋤倦。獨倚秋樹根。顧我田疇好。念我桑麻繁。脈脈不能語。感茲風雨恩。風雨歲時熟。古俗今猶存。遙指煙生處。親戚滿前村。稚子驅雞犬。夜來忘閉門。何以躋清時。努力從田園。昔愛誦豳風。亦常歌小雅。桑柘棲雞豚。結廬在中埜。春菑方扶犁。秋禾條盈把。野老樂時和。高枕瓜棚下。田家老瓦盆。新醪月中瀉。擊鼓賽先農。調瑟娛方社。何必桃花源。此境足瀟灑。風塵久誤人。我豈悠悠者。新晴土膏動。原上春草生。陂塘引礮壑。活活春水鳴。桑陰悅好鳥。布穀時一聲。夜來飽飯牛。朝來從耦耕。耦耕一畦畢。澹泊心無營。偶然召隣叟。索取壺觴傾。高談視天壤。把酒歡平生。面無憂喜色。胸無寵辱情。始知於陵子。灌園逃公卿。

讀漢書

壯哉霍子孟。易置多英風。離席按劍時。發議驚羣公。走馬杜鄴間。曾孫方困窮。手挈天子璽。授之咸陽宮。海枯石可爛。孰能訾其功。珠襦黃金匣。甫葬茂陵東。狐鳴尙冠里。妻子煙塵空。稔侯殺弄兒。累世亢其宗。子孟庇阿顯。九族罹憫凶。割愛與殉私。延促霄壤同。臣術惟敬慎。庶幾保厥終。博陸稭侯功業懸殊。而一世由殉私與割愛異也。指出敬慎。以昭臣道。事君者其知所法誠焉。

讀元道州賊退示官吏詩慨然有作

我愛元次山。詩篇獨簡質。短章如長謠。仁心自洋溢。至欲委符節。甘心就魚麥。昔人志康濟。豈云耽暇逸。

置身君民間。無能澹憂恤。汗顏拖長紳。不如腰帶銜。賢哲恥曠官。斯義久蕭瑟。誰無湖畔山。浩歌撫遺軼。嚴陵江

千嶂桐廬道。清風幾溯洄。不知天子貴。猶是故人來。垂釣本無意。披裘亦浪猜。翻嫌人好事。高築子陵臺。  
王貞白詩後。賦嚴陵者。俱落坑塹。此篇不着議論。籠罩一切。可以追蹤古人。

張玉裁 字禮存。江南丹徒人。康熙丁未。賜進士第二人。官翰林編修。

### 七夕立秋

旅榻當筵臥。西風拂小欄。秋從今夕到。月向異鄉看。有巧輸人乞。因貧得夢安。曝衣問僮僕。預戒早霜寒。

結意七夕。立秋雙到。

### 憶橘

朱實垂垂葉尚青。故山千樹未凋零。相思不隔長淮水。一夜鄉心落洞庭。

魏麀徵 字著石。江南溧陽人。康熙丁未進士。出爲邵武太守。有石屋詩鈔。

### 送兒彪之沅江

我已無親侍。兒行又遠親。蕭疎千里外。去住一家貧。水闊風颿健。霜高候雁新。沅蘭芳可佩。極目楚江濱。

少陵令節成我老。他時見汝心。起十字同此筆墨。



于忠肅祠

當年天子已蒙塵。中外安危寄此身。首建一言存社稷。獨鳴孤掌定君臣。丹心縱死還如鐵。碧血長埋未化燐。千載湖山留正氣。不須涕淚灑松筠。不填故實。不著泛語。是作家手段。

汪懋麟字季角。江南江都人。康熙丁未進士。官刑部主事。著有百尺梧桐閣集。

題顧符真畫

昭陽顧生畫樓觀。絳闕瑤房生白雲。如螳宮人三百六。丰神都似李將軍。此詩漁洋詩話中賞之。

顏光敏字修采。山東曲阜人。康熙丁未進士。官吏部考功郎中。著有樂圃集。○時輦下稱詩。有十子之目。田公綸震。宋公牧仲。曹公頌嘉。汪公季角。王公幼華。謝公千仞。曹公升六。丁公澹汝。葉公井叔。考功其一也。詩品端厚正大。不輕佻。不板滯。於十子中為雅音。

白雲峯

三峯信靈造。巍巍司寇冠。磊砢不盡洩。蚺螻復北盤。結空出瑤几。前對香鑪寒。大道望如髮。豁然見長安。我行採山蓀。蔥蒨被岡巒。秋色何時來。萬里霜林丹。三川富陳蹟。八水無停瀾。玉女悵不顧。目斷雙青鸞。

磊砢十字。寫盡造化之奇。老杜入蜀詩中。每有此。

青柯坪

我從華陰來。秋懷苦悽愴。一登十八盤。嗒焉如盡喪。手拂岫幌開雲關。峯巒變滅無停狀。狸狽嘯雨猿晝

啼咫尺但愁失歸向蒼藤羃歷穿危棧高下冥迷那得辨石稜澗道僅數尋渭水秦山幾迴轉舉頭忽訝青天開垣屋鱗鱗綴晴巘長松挂壁森蓬蘢細霧綠扉裊烟篆吁嗟青柯坪壯觀真崔嵬三峯高造天於我何有哉安得巨靈咆哮重壁裂二十八潭傾帝臺手挽鐵船入天漢仰攀十丈蓮花開迴頭卻笑羨門子坐看東海生黃埃後半放筆爲之蒼鬱雄快遂成偉觀

鬪鶉行

高堂邃宇人罕過錦囊高挂珊瑚柯乍聞人響軒勇氣空中跳躑常傴傴何來賓從皆禿袖入門豪氣聲誰呵服膺拳拳疑印綬朝餐廢箸猶摩挲三尺寶牀正中設鄭錦齊縷金盤陔兩鶉出囊已脫手盛怒似欲尋干戈朱目紺趾豈得辨疾如激水旋雙渦注目良久三歎息爲官爲私理則那戕伐固皆爾儔類崇朝百勝何足多磔毛啄血供一笑誰當與爾同癢疴愷然一敗竟菹醢爭如朱鷺傳饒歌田中偃鼠飫草實自注月令田鼠化爲鷺即鶉也徐行不避虞人羅乃知羽翼反爲累嗚呼奈此微生何爲同類戕害者戕後言田鼠無意微矣

望華山

潼關西上見嵯峨路入雲臺佳氣多萬壑深松寒白日三峯積雪照黃河天雞曉徹扶桑湧石馬宵鳴翠輦過擬向青冥銷永夏蓮花玉井竟如何七言近體俱在北地信陽之間

昭君曲

一辭宮闕出秦關。長得丹青識舊顏。爲報君王休愛惜。漢家征戍幾人還。悲憫征人。用意忠厚。

喬

萊字石林。江南寶應人。康熙丁未進士。已未召試博學鴻詞。官翰林院侍讀。○聞先生詩稿極富。曾與賦草並行。茲獨得其使粵一集。故所收從略。

過應山縣弔楊忠烈公

嗚呼。有明神宗之季。國脆脆。光宗繼之。更短折。維時先生官給事。顧命乃與大臣列。防微肩鉅。定大計。選侍移宮。一朝決。再起中丞。赴雙闕。大柄已被閹人竊。乾兒義孫滿廟廊。二十四罪憤所切。赤縣爭高宦者祠。彤庭徧染中丞血。詎有婪賊楊大洪。舍人寧死心如鐵。或言漢之廚顧潔其名。唐之牛李營其穴。宋之洛蜀明東林。黨禍紛紛蹈覆轍。封疆已被門戶誤。遂譏先生太激烈。我謂此言殊不然。藉口保身附明哲。假使當年稍媵嬰。張禹孔光更何別。君子豈能誤國家。目爲黨人正氣絕。嗚呼。正氣絕。國乃滅。媵嬰之徒。保身之說。以備責直臣。正氣所以喪也。此等詩關係名節不小。○予過忠烈公祠。作詩用之。中云。人之云亡。邦國瘁。明社沉淪。等兒戲。只有孤臣一片心。地下可訴高皇帝。讀喬公詩。偶然節錄。

下灘

湘南三月湘水生。馳波跳沫空江鳴。砢研亂石巨江面。險如瞿塘灑瀕誰能撓。我聞就下水之性。豈樂與石相排爭。清流何爲輒暴怒。鼎沸勢欲蒼厓傾。其如灘石太嶮巖。橫排曲扼真難平。筩竿之船薄如紙。左旋右折中流行。舵師自許識趨避。到此亦覺心魂驚。十里五里在俄頃。回頭不見丹峯橫。一灘纔過一灘

至到耳總作奔雷聲。縱然賦命果窮薄。毋乃太視波瀾輕。

湘口

鴈叫猿啼不可聞。零陵風雨正紛紛。三巖明滅瀟湘合。二水滌洄楚粵分。縱目好看靈嶽樹。落帆猶帶隱山雲。探幽更向愚溪去。野性偏宜鷗鷺羣。

方象瑛

字渭仁。浙江遂安人。康熙丁未進士。己未召試博學鴻詞。官翰林院編修。著有健松齋詩集。

龍洞背

神龍穿石飛。洞壑晝常晦。人乃捷於龍。盤旋出龍背。躡衣入重雲。勢與風雨會。危崖千萬狀。不知始何代。突兀浮圖高。縱橫屏障大。鱗鬣樹千章。泉流吐飛沫。下注不測溪。沉沉氣冥昧。倘燃牛渚犀。百靈宛然在。羌山多靈奇。策名此爲最。何必御風行。曠然天地外。

七盤關

雞頭關前七盤嶺。蚓曲蛇蟠纔見頂。氏中又復度七盤。詰屈紆迴勢相引。層崖邃谷路轉通。拾級忽見雲霞空。卻怪頂觸前人趾。不知舉膝當心胸。寧心息魄詫奇絕。萬里山川風氣別。一關中斷隴蜀分。羌笛淪歌乍相接。遙望川巴萬點明。白雲紫霧還縱橫。鱗鱗彷彿峨眉雪。不知何處錦官城。北望京華南望越。懷人兩地情偏切。今朝身入大荒西。涼風古驛中秋月。昔遊平靖關。關頂爲荊州豫州分界處。曾作詩記之。篇中一關中斷二語。服其辭之能達。羌笛承隴淪歌。



承蜀尤見脈理之細

望雪山

自注在咸州距會城二百餘里曉起登樓望之九峯皆白

未是峨眉境何來入座看蠻中晴亦雪微外暑偏寒雲散千峯白霜凝萬壑丹鱗鱗望不盡指點是松潘

陳玉璣

字賽明江南武進人康熙丁未進士官中書舍人

聞董文友已在山東

竟作十年別何無一紙書傳聞在東魯早晚下南徐客久才逾老思深夢轉疎靈光遺殿在問爾賦何如  
眉眼最近而眼不見眉即思深夢疎之謂

同友登京口避風館高閣望江題壁

袞袞登樓興披襟坐上頭果知天地大不盡古今愁孤塔烟中斷諸峯波面浮憑欄一長嘯明月夜橫秋  
落葉

木葉驚微脫相看惜故枝一秋今古夢萬樹別離思入水飄無定隨風下每遲始知天地意搖落總無私  
離形寫意便覺超然一結所見尤大

興濟寄懷家兄其年

同君擊楫大江干共把離尊未忍乾一自風濤愁裏聽真憐兄弟別時難雲連滄海鴻邊度月落滹沱馬

上看爾在家鄉定回首。幾時書札到長安。

傅昂霄

字龍翰。江南吳縣人。康熙己酉舉人。○吳中詩人。無道及龍翰者。然卽此三篇。非浸淫唐賢者不能。

### 飲馬長城窟

君不見長城之北青海邊。平沙直上黃雲天。沙中白骨堆何年。陰山九月風怒號。風吹戍火連雲高。雲中五原軍出幕。左賢右賢心膽落。軍中大將聞姓霍。鼓聲如雷笳聲死。冒圍脫走天驕子。烽煙一掃萬里秋。漢家天子恩未酬。男兒何用言封侯。太白蝕月旄頭沒。歸來飲馬長城窟。

### 涼州詞

九月霜高塞草肥。征鴻無數向南飛。深閨莫道秋砧冷。夜夜寒光滿鐵衣。溫柔敦厚。可與唐賢絕句並讀。

### 江行

白雲明月漾微瀾。空外秋聲落遠灘。燕子磯頭中夜起。一天星斗大江寒。

徐乾學

字原一。江南崑山人。康熙庚戌賜進士。第三人。官至刑部尙書。著有澹園集。

### 感遇

汲水辨澗溜。染絲別黑白。古人傾蓋間。流品先已擇。寸心苟相投。薄軀非所惜。寶劍解贈君。出入耀光澤。分手去路衢。萬里無間隔。結交不須多。噂沓亦何益。寧聞管鮑家。堂有珠履客。

隴山歌送許天玉之官新安

隴山高。高隴水流。隴西六月如清秋。蕭關朝那近北地。酒泉張掖連涼州。諸葛戰爭餘故壘。隗囂宮殿成荒邱。繡衣按部求名馬。都護行營擢錦裘。數聲羌笛落梅怨。一曲秦箏邊月愁。許侯分符萬里去。曉發青門擁騶御。虞詡成名在此時。王尊叱馭看前路。京華故人折楊柳。欲行不行日漸暮。我歌爲作隴山詞。目極輪臺鳥飛處。高岑風格。步趨者罕。此歌在燕歌行胡笳歌之間。

送萬季野南還

霜花醪酒送君還。邸舍相依十載閒。慣對卷編常病眼。與談忠孝卽開顏。折衷三禮宗王鄭。泚筆千秋續馬班。薄笨獨驅驚歲暮。凍雲寒雪滿江關。

王

揆字藻儒。江南太倉人。康熙庚戌進士。官至大學士。著有西田集。

望岱

山色周遭信馬蹄。岱宗高峙絕攀躋。龍從未許兒孫並。崩弁渾疑星漢齊。風定天門懸日月。雨收石角挂虹霓。他年定擬窮遊屐。秦觀峯頭倚醉題。

王士禛

字子側。山東新城人。康熙庚戌進士。著有古鉢集。○計甫草云。子側爲西樵弟。阮亭之兄。才堪頡頏。而西樵阮亭早發。聲望先布。不必視爲蜂腰也。

和李退翁侍郎讀水經注兼憶洞庭之作

相思何處折芳馨。望斷黃陵舊日亭。自注水經注湘水又北徑黃陵亭西。秋水依稀聞落葉。楚天彷彿見揚靈。洲邊子戍三春綠。樓外君山一帶青。太息雲中君在否。不堪重問道元經。

### 渡揚子江

長江不盡來荆蜀。天塹平分控五州。地近沉舟悲戰伐。人從擊楫想風流。波開雲日諸峯出。浪湧魚龍夾岸浮。況值丹楓搖落盡。三山縹緲欲忘憂。有吞雲夢搖五嶽之概。如此方許作渡江詩。

孟亮揆字釋來江南長洲人康熙庚戌進士官翰林侍講學士。

### 于忠肅墓

曾從青史弔孤忠。今見荒丘岳墓東。冤血九原應化碧。陰燐千載自沉紅。有君已定還鑾策。不殺難邀復辟功。意欲豈殊三字獄。英雄遺恨總相同。徐石實忠肅罪謂其意欲召外藩也意欲二字與莫須有三字正復相類一經拈出舊事頓新。

李振裕字維饒江西吉水人康熙庚戌進士官至戶部尙書有白石山房詩稿。

### 祠闕里雅有序

皇上文德武烈震揚域外。海隅宴安民有禮樂絃誦之習。蒸蒸嚮風。迺循覽徭俗。還過闕里。以太牢祀孔子。禮儀致敬。賚予有加。臣躬逢大典。懼忤踴躍。不揣固陋。竊效唐臣柳宗元雅體。詠歌盛事。爲祠闕里雅一篇。謹拜手稽首以獻。



太山巖巖遐邇具瞻。登封受命。上帝是監。鍾靈岱岳。篤生尼父。大道昭明。炳然終古。一章於皇時清。繼天立極。累洽重熙。與民休息。苞蘖既除。干戈永戢。偃武觀文。風行四國。二章歲維甲子。歷起上元。翠華南指。旌軒八屯。秩祀東嶽。禮舉柴燔。頽臨日觀。旁矚天門。三章泰山之陽。曲阜之宅。萬乘回鑾。里門是式。奕奕本支。恭迎清蹕。升堂陟降。祀典攸秩。四章軒縣鞀矣。樂具奏矣。尊壘既陳。饗禮侑矣。俎孔碩矣。天子獻之。豆孔庶矣。天子薦之。五章祝史有辭。我皇黼藻。曰萬世師。揭此顯號。華蓋九旂。爰飾于廟。姬公孟子。亦越奠告。六章皇曰噫嘻。相子肆祀。濟濟臣工。誅誅胄子。布席橫經。披陳奧旨。圓橋肅聽。睟容有喜。七章陟彼泉林。厥流孔泚。維茲檜文。厥枝孔虬。萬年不凋。聖人所樹。皇心愉愉。爰記爰賦。八章帝恩優渥。零露瀼瀼。流根潤葉。受祉無疆。匪曰賚之。孔氏之光。斯文丕顯。邦家之慶。九章泗水湯湯。孔林蒼蒼。文草靈著。輦路之旁。樵蘇有禁。舊不踰頃。今也廓之。數兼常等。十章奎畫有煒。垂象神宮。取彼琬琰。是琢是礪。豐碑百尺。峯崒在東。歷年億萬。與岱比崇。十一章維山有岱。維天有漢。皇德是峻。帝文是煥。大道彰矣。治化翊矣。日月星辰。慶重光矣。十二章○奏凱告成功不同。彼取古奧。此取和平也。古奧近韓和平。近柳作者最得體裁。

許孫荃字四山。江南合肥人。康熙庚戌進士。官翰林院侍講。陝西學使。○激昂悲壯多燕秦之聲。

出門

出門必春初入室必冬暮。豈無兒女情。終歲不暇顧。揮手從此辭。夕陽渺煙樹。作客苦況全在兩必字形出。

五丈原次大復韻

荒原淡斜日。古戍黯層陰。五丈空留跡。三分不死心。地隨營壘沒。星與陣雲沉。薄暮秋風急。如聞梁甫吟。

潼關

百二初經得大觀。嚴關高峙碧雲端。兩邊峽束黃河去。萬仞根連太華蟠。天險西來凌絕巘。地形北折鞏長安。如今聖德能懷遠。猶作當時要處看。與兩戒中分蟠太華孤城百折走黃河。幾於魯衛一結得設險守國之意。

武功春日謁后稷祠

當時教稼無先聖。萬世黎民定阻飢。詞客古今瞻廟貌。村農伏臘走軒墀。邠封麥秀垂垂徧。禹甸氓歌處處隨。文德配天真不忝。獨從含哺有餘思。起手如高峯墜石。循行數墨家那能辨此。

萬里

萬里驅車亦壯哉。西征咫尺是輪臺。無邊晴雪天山出。不斷風雲北極來。關到玉門中土盡。槎浮博望使星迴。猶看定遠封侯道。卻憶嫵姚佐漢才。

莊浪趨張掖

酒泉張掖近天山。大漠風雲指顧間。莫道行邊人萬里。最西還有玉門關。

葉

變字星期。江南吳江人。康熙庚戌進士。知寶應縣。著有已畦集。○先生論詩。一曰生。一曰新。一曰深。凡一切庸熟陳腐浮淺語。須掃而空之。今觀其集中諸作。意必鉤元。語必獨造。寧不諧。

俗不肯隨俗。夏夏於諸名家中。能拔戟自成一隊者。○先生初寓吳。時吳中稱詩者。多宗范陸。究所獵者。范陸之皮毛。幾於千手雷同矣。先生著原詩內外篇四卷。力破其非。吳人士始多訾警之。先生沒後。人轉多從其言者。王新城司寇致書。謂其獨立起衰。應非漫許。

度大庾嶺

千里連峯匝。紆迴出萬尋。險分南服界。雄見越王心。鴻鴈謀何苦。熊羆氣轉深。高松陰夾路。風過助長吟。

三四語沈雄蒼鬱。

送王阮亭宮詹祭海還朝

使節天邊轉。韓碑讀罷還。挹泉醺主眷。探袖出民艱。颿沒依依樹。裝輕箇箇山。南枝留不住。高詠過重關。  
瘞壁恭成事。祠壇異碧雞。蠻方留雅樂。玉陛返桓圭。激水從天上。扶桑向使西。聖朝嚴俎豆。到日拜封題。

尋山

二月花爭發。尋山一逕冥。峯迴常抱影。雲斷半銜青。柳露沿溪屋。人歸隔嶺亭。桑榆留晚照。尙及渡前汀。

京口作

朔風動地大江鳴。猶說南徐北府兵。鐵鎖幾人籌異代。布衣終古悔成名。江山無限漁樵計。木葉頻驚關塞情。試上高樓憑四望。不禁淚下媿平生。  
七言律入手難得龍跳虎臥之筆。得此以下便如破竹。

中秋後同人集用亶尙友堂憶五年前秋嶽先生有此集限徵字韻興懷愴然仍限前韻

風雨從吾款舊扉。也知荃杜采應稀。敦槃衰鬢驚難再。花月歡場漸欲微。晚藥侵階秋得氣。倦螢入戶冷無依。綠隄衰柳吾憐汝。約略年華兩並非。追舊集感暮年借倦螢衰柳以寫蒼涼之況爲之黯然。

括蒼道中

蕭然倦策度重巒。絕壁摩天傍斗看。遊子傷心悲九折。美人遙睇隔千盤。啼鶉花信他鄉到。瘦馬衫痕落照寒。不斷亂雲投北去。生憎回首望長干。三四經險地懷良友也瘦馬衫痕一語寫盡孤客遠行之況。

同人夜坐康貽姪齋限人字

意外相逢是故人。衰顏燭影話重新。花殘幾易羅含宅。燕到重沾杜甫巾。無處避愁應擇地。有山送老不嫌貧。吾家二妙欣相慰。嬾向滄江再問津。總無一語平直極眼前事一經點化頓使生新。

石門郁曾發遊秦歸賦贈兼示胡圓表徐導柏

十載驚沙積曉裝。龍鍾短策倦遊梁。飢來慣逐長榆月。老去重沾絕塞霜。登嶽何人攜謝朓。入門無女問中郎。曾發歸時喪女。江波淮浪摧肝日。話比秦川路更長。

去去空山學道裝。難忘情處在河梁。勞生歲月官橋柳。終古人琴斷坂霜。自注故人徐次璆。水咽隴頭留苦調。花然巷口映諸郎。自注圓表昆弟子姪二十餘人。秦宮漢殿秋原上。飽贈書生一枕長。勞生歲月以官橋柳況之終古人琴以斷坂霜擬之身世友朋之感幾於

字字欲淚。

與趙書年話舊追憶其尊人山子

隔世荀陳隔日情。朱顏皓首兩心驚。文章涕淚仍聲價。冰雪關河竟死生。自注：癸卯冬，予與山子計甫，草北行，兩兄並物故五年矣。重觀風標堪和鶴。自憐衰老續鳴鶯。庭梧竹影難忘夕。怕見城西暮色橫。自注：山子故居。

同徐方虎張步青趙湛卿登永嘉江心寺浮圖

鷺宮突兀榜銀河。界破青冥一雁過。名士登高雙淚下。故人回首萬峯多。新傳蜃海銷兵甲。若箇魚磯臥薜蘿。尺五去天知不遠。憑君才調問如何。

楊花

小蠻腰瘦不勝情。斷粉飄雲殢舞裙。莫使漫天飛不住。樓中尚有未歸人。

題平湖沈客子燕京春詠後

殘杯忽憶帝城春。曾逐輕蹄十九人。淮上黃蘆江上雪。憑君說是賞花辰。

梅花開到九分

亞枝低拂碧窗紗。鏤月烘霞日日加。祝汝一分留作伴。可憐處士已無家。從九分著意。不忍卒讀。

客發苕溪

客心如水水如愁。容易歸帆趁疾流。忽訝船窗送吳語。故山月已挂船頭。初歸家時。實有此景。比忽驚。鄉樹出。漸覺熟人多。更妙。

盧道悅字喜臣。山東德州人。庚熙庚戌進士。官兩知襄武。縵氏縣。著有公餘漫草。○班史稱循吏以文章飾吏治。作者以吏治爲文章。詩中所云。皆從憂勤廉惠中出也。勿徒於對偶聲律間求之。

### 阻風

陸行無風波。偶嫌路紆折。中心希所求。水程較直截。鼓棹正中流。陡遇風威振。日行十餘里。毋乃所望舛。欲速適爲累。悔不從迂拙。迎面挂席來。疾行飛鳥滅。帆檣非不同。遲速何殊絕。長年前致詞。前程難預決。萬事貴順天。人力徒勞竭。明月風勢回。遲速又更迭。乃知天下事。安分自怡悅。寄語山中人。待時養明哲。

### 寄時齋弟

百孔千瘡體。醫來尙帶癥。清貧林下穩。迂拙宦途難。有淚洒荒野。無才事上官。感君相念切。聊用報平安。  
五六語。包括任延一傳。

### 迎春

律轉鴻鈞佳氣同。肩摩穀擊樂融融。不須迎向東郊去。春在千門萬戶中。

顧貞觀字華峯。江南無錫人。康熙壬子舉人。官中書。著有積書巖集。○梁汾臨沒時。自選詩一卷。授門人杜雲川太史。雲川付梓。人以傳。不滿四十篇。皆味在酸鹹外者。前輩嗜古淡。不自足如此。

雨止繡塘書舍抵暮無一人過橋上者

山淺雨亦深。煙光暮如積。窅然清池上。暫與塵土隔。倚杖玩浮漚。憑欄數歸翼。無生復奚滅。有動隨所息。磬響時一來。懷哉巖岫客。願言依此境。共對香燈夕。一塵不起。語可證禪。

春夜大雪念儲汜雲宿舟中詩成黯然兼寄應雲皆人兄也

百里非遠涉。忽嗟行路難。蓬窗半夜凍。積雪摧檣竿。念子擁衾坐。知余撫枕歎。吳中文翰侶。公宴方極歡。暖響迷玉漏。晶輝瑩珠盤。誰持一尊酒。慰此孤舟寒。前路逢二謝。客愁應似寬。平生倦水宿。歷歷經風湍。壁立雙芙蓉。正臨無底谷。誰揮修月斧。盡削銀河曲。倒灑萬斛珠。翻飛千尋玉。有龍蟠其下。喧極眠更熟。縱橫題石字。但見莓苔綠。洗鉢注軍持。餘生此焉足。

開先漱玉亭

灌園

不自量筋力。求爲人灌園。意惟營一食。跡若避羣喧。誰遺五色芝。服之詫騰騫。奈非塵埃種。移蒔安得蕃。還將理菜畦。膏澤資泉源。黽勉試操作。編籬復插援。早韭和露茁。晚菘凌霜翻。但從采掇便。未覺烹飪煩。心形誠苦疲。旣飽亦軒軒。向讀神農書。近聞老圃言。

夜聞梵音

一燈山牖出。隔竹露光泫。坐聽香臺人。法華中夜轉。清泉漱寒玉。細入吳音軟。嚼蠟況橫陳。凡襟何時遣。

去左司  
未遠。

### 秋曉登滄浪亭呈宋中丞

初日上東南。林亭空宿翳。草香珠露重。的皪侵衣袂。唱杳曲池菱。吟餘小山桂。猶聞遺翰墨。但惜沉碑碣。望古情已深。懷賢感亦係。由來澹蕩人。別作流傳計。翕絕賤原嘗。虛徐狎莊惠。誰陪飛蓋遊。屬和高文麗。詠滄浪亭者。俱倣蘇梅體。此以淡寂行之。春花明媚。忽遇山礬。獨殊風格。

### 卷十

韓

字元少。江南長洲人。康熙癸丑。賜進士第一。人官至禮部尙書補諡文懿。著有懷堂集。

### 贈江南巡撫湯潛菴先生

於皇啓運。惟良應期。雲出山川。靈雨乃施。于潛于躍。致身惟時。從容講幄。道以言資。俾贊大政。謀謨孔嘉。帝瞻四方。念我民依。疇若綏懷。維汝予材。往奠南服。往撫朕師。此言公以道事君。明良一德。命其撫綏南服也。時惟霜月。戒途惟吉。別殿寵行。大官賜食。何以衣之。溫貂重襲。何以乘之。小環金厄。巽命以申。莫匪民極。頓首青蒲。臣職是力。臣學孔孟。羞管商術。翬翬之思。惠此南國。此言陛辭寵行也。學孔孟。羞管商。表公生平學術。短車一乘。具少于車。敬謝供張。敢煩薪芻。我馬旣羸。我僕亦痛。莫或寧處。將此簡書。吳儂遲公。自今有家。



叶悄悄獨營攬轡踟躕此言公簡從輕裝敬奉簡書而吳民望之同於望歲也

螟蝥食禾披根及心飛鴉食甚懷我好音嗟爾司牧下民是侵素絲惟染官闕誰箴其則不遠公卽砭鍼

無愧生平敬影與衾此望屬吏化積習歸廉潔以公爲準則也

稽古揚州田惟下下矧我勾吳文身而裸有明戰爭天降之禍厥賦未貞王道爲頗印給四方日炙其輮

脂膏既竭下民卒瘁剝肉流血敲骨及踝千秋我公哀此鰥寡盍繪流民盍謁靈瓌公誠動天庶幾報可

此言三吳浮賦民不能堪願公之爲民請命也後屢疏陳請格於部議乃止

眷彼嘉穀實生其莠爰有止水當門置韭宿猾弗除愿民誰牖其衆可容其魁宜取如木斯拔如雛斯乳

仁者必勇公維其有此言除莠民以安愿民也止水置韭用龐參訪任光事

烹魚苦碎治民苦煩調急弦絕汲多水渾五方殊風莫返黃軒去其太甚不在高論鈞距不設鼠雀無喧

若其性天起化之源此言除弊去其太甚無煩苛察也若其性天即使自得之意

奕世歌思厥有文襄端毅寬靜忠介清剛我公嶽嶽爲儒者宗體立用行攸兼其長神動淵默罔不在中

若嘗膏之豈惟我邦佇公報政倚公辯章吳儂敢私以福萬方此言撫吳大臣推周文襄忱王端毅恕海忠介瑞而冀公之追步前哲也此種立言

得吉甫贈人之體詩亦穆如清風

送礪巖洗馬移家石公山次悔庵韻

乍脫朝衫賦遂初。青螺一點卜幽居。菜根咬得當何肉。蟲篆窺來半禹書。吞卻五湖無薺芥。聯將三益有樵漁。此時風月從吟弄。幸惠新詩並起予。石公近包山包山藏禹書處。

挽田間先生詩

跳身黨禍出鄉關。辛苦書生戎馬間。已分妻孥成死別。寧知喪亂復生還。孱王騶駱窮年恨。故土鶯花鎮日閒。一畝荒涼乾淨地。千秋恐染淚痕斑。先生配死於亂兵故有第三語。

長揖諸公折角巾。頭銜不屈舊詞臣。三千上客曾傾坐。百尺高樓好寘身。自下羊曇華屋淚。自注謂立齋師。每安杜甫草堂貧。靈牀寂寞琴絃斷。絮酒南州祇一人。自注謂健庵師。

被命修一統志先師司寇公完書也感而有作

澹蕩江湖玉局隨。苦心作者調誰知。戶庭直欲包山海。義例頻煩托寓卮。寫盡異書多逸事。得來妙解折羣疑。最憐樂善通懷處。嘗許門人贊一辭。

青螺一點故依然。草舍荒煙客可憐。萬里張騫曾鑿空。九州鄒衍欲談天。人從生死原輕散。筆到山川不易箋。惟有無情芳草綠。猶鋪書帶舊堂前。

踏紅重到碧山堂。歎息音容未渺茫。佳句壁間枯落墨。小松階下慘成行。少孫敢附龍門末。後鄭常依馬帳旁。猶是舊遊風月地。孤燈夜雨照淒涼。俱從門人續修用意。纏緜悱惻令人增師弟之重。

暮春唐解元墓下作

中丞當代振詞源。弔古憑將風雅論。自昔唐衢惟解哭。祇今宋玉與招魂。人歸黃土三生石。時過清明一

酒樽。更闢桃花舊蘭若。鐘聲敲月伴黃昏。時宋商邱中丞新葺唐解元墓。故從中丞說入其實。墓在橫塘。商邱所葺在桃花塢。乃解元讀書處也。

王鴻緒字季友。江南華亭人。康熙癸丑賜進士第二人。官至工部尙書。著有橫雲山人詩稿。不及見全稿。所錄皆未貴顯時作。

歸來

長缺歸來日。貂裘欲敝時。吾親憐久客。扶杖喜相持。款款談征路。依依問舊知。自朝還至暮。盡室慰離思。

吾母倚閭久。風塵望早歸。驚看遊子面。爲浣去時衣。巖筍經冬出。慈烏向晚飛。白華堪志養。不必羨甘肥。

縫衣。送遊子也。浣衣。遊子歸也。舊事翻新。只轉換間耳。

夜

霜風瑟瑟動窗紗。故國音書旅鴈賒。永夜聞砧難入夢。他鄉見月易思家。干戈且喜人無恙。蒲柳應憐鬢

有華。獨愧聖朝容棄物。未辭簪紱問桑麻。善學少陵。不在形似。

閨思

抱得朱絲琴。臨風彈別鶴。愁如江潮生。不共江潮落。崔國輔小詩。原本子夜讀曲。作者近之。

採蓮歌

采采江水濱。荷花照臉新。莫愁西日晚。明月解留人。

徐倬

字方虎。浙江德清人。康熙癸丑進士。官翰林院侍讀。後家居。加禮部侍郎。著有蒼村集。

詠水碓

睦州曉放船。江流益清濁。水石相抨擊。湍雪蛟龍走。居民置風輪。隨波轉樞紐。沙石廣場圃。比櫛列杵臼。但看椎聲落。不見誰舉手。精鑿脫糠粃。安閒到子婦。搯搯抱甕勞。拙哉漢陰叟。機巧厭桔槔。斯言誠然否。聖人前民用。神智皆自有。愚民偶得之。役使河伯久。但苦梁鴻貧。何處覓升斗。一結換意。不脫不膠。

騾車謠

車鐸忙。替戾岡。騾轉轂。尾秃速。路崎嶇。聲獨漉。嗟爾車中人。何不還家抱黃犢。

寶劍金玉裝。少年駿馬馱。車中坐老叟。面皺鬢又皤。騾兮騾兮負汝何。

簸之揚之非藜藿。顛之倒之裂裳衣。騾因芻豆辛苦爲。勞人草草將安之。人與爾騾計總非。

雞初喔。鳥再啼。北斗闌干月沉西。滿地冰霜騾足動。踏破千家萬家夢。奇警句。以無意得之。

捶馬勿傷面。捶騾勿傷背。傷背烏啄瘡。後日難重載。八口安食騾奔波。騾若不行誰能那。爲語役夫愛爾

騾。愛及物力。仁人之言。

採蓮曲

溪女盈盈朝浣紗。單衫玉腕蕩舟斜。含情含怨折荷華。折荷華。遺所思。望不來。吹參差。音節聲口。宛然齊梁。

月

木落川原淨。霜清烏鵲寒。可憐官舍月。強作故園看。老鶴捎雲末。饑鼯走夜闌。朔風偏太苦。吹徹角聲殘。  
官舍見月。忽念家園。此云強作故園看。前人無道及者。以下推開。不復黏滯。是浣花翁家數。

聞蛩

鄉國三千里。寒蛩總一聲。遙知閨閣內。共此別離情。響入秋砧細。愁先朔雁鳴。銀燈何太苦。起坐到天明。  
一氣直下。盛唐人有此高格。

舟中雜感

高秋一葉下梧桐。有客揚帆夕照中。多病百年兼恨別。依人千里自途窮。滄江白露魚龍夜。冷月黃沙草木風。老去休思空冀北。日歸終擬僧墻東。  
計欲依人。無有不途窮者。此閱歷有得之言。

雀啄黃花滿眼蒿。雁連雲影下空濠。投人自賤隋明月。無褐空思秦復陶。碣石寒砧催玉露。廣陵秋樹接銀濤。應知雨雪前途盛。歲暮誰憐左伯桃。

項王祠

莫問鴻溝事若何。獨留祠宇枕黃河。故鄉香火情何限。三戶英雄氣已多。零落繡衣生土蘚。欹斜駿馬絡

藤蘿到今吞岸濤聲壯。嗚咽如聞垓下歌。

禾中贈曾庭聞

庾信飄零似轉蓬。江關詞賦老逾工。客程半在青山裏。壯志全消白社中。尚有匡牀分上下。曾無破屋住西東。鴛鴦湖畔輕攜手。孤負桃花爛漫紅。破屋句念其弟青藜無家不能如二陸之同居也。

湖上贈夏鹵均

青絲一騎出長安。明聖湖頭把釣竿。花柳坐催名士老。湖山約與酒人看。好憑酬唱東西屋。莫妬聲名大小冠。昨夜新詩欺白雪。雪兒歌罷不勝寒。

李基和字協萬江南丹徒人康熙癸丑進士著有梅崖詩意

登代郡城晚眺

西風落日聲颼颼。風吹沙起邊人愁。黃雲片片下谿谷。雁門木葉零清秋。飛狐句注老鵬窟。健兒習射來山頭。嗟哉紫塞古來險。頗牧爲將人安憂。忽然酸風射眸子。迴看戰骨多荒邱。歸鴉幾點過城去。夜昏鼓角鳴譙樓。

過鶴汀侍讀齋觀董文敏畫

曉雨初晴煙未收。江雲一帶引輕舟。模糊認得南徐樹。不到家山十六秋。因觀畫陡觸家山纔異泛然題畫

柳絮

孤負當年詠雪人。沾泥糝徑總成塵。卻憐一樣風吹去。偏是飛花墮錦茵。

戊寅中秋初度月下作

光寒於水連天接。色白如霜滿地鋪。誰畫雁門今夜裏。山川別樣貯冰壺。

自注金魏道元中秋詩。桂子知經幾寒暑。冰壺別是一山川。

徐元夢

字善長。遼陽人。康熙癸丑進士。官至大學士。謚文定。

送隨義文出塞

君到居庸北。應憐一鴈回。沙平疑地盡。山豁訝天開。落日重關閉。秋風萬馬來。勉旃從此役。莫上望鄉臺。

閱其勞苦。勉以公忠。四章不脫。此意風骨不肯落開寶以後。

兩出居庸塞。憐君當苦辛。風沙隨去馬。雨雪滯行人。地闊軍民少。天寒部落貧。須知柔遠意。率土盡王臣。

登三屯鎮城樓寓目

雉堞連山起。登臨亦壯哉。一聲南鴈去。萬里北風來。苔沒前朝碣。雲寒上將臺。興亡無限意。尙想濟時才。

送友人出使塞外

許國纔年少。胡爲絕塞行。一身憑漢節。匹馬出長城。月色侵裘冷。霜花拂劍明。燕然何處所。石上自題名。

成

德字容若。遼陽人。康熙癸丑進士。丙辰殿試。官侍衛。著有通志堂集。

擬盧子諒時興

代謝感時序。迭微歎日月。慙彼鷓鴣鳴。忍此衆芳歇。林園無鮮菓。原野飛隕葉。王孫傷歲暮。志士勵窮節。勁莖蠹驚飈。貞松翠霜雪。昂昂澤中雉。矯矯韞上鷹。物性不可渝。人寧不如物。努力崇明義。豈爲威武屈。  
砥礪志節。傳出子諒心事。

再送施尊師歸穹窿

紫府追隨結願深。曰歸行色乍駸駸。秋風落葉吹飛鷁。夜月橫江照鼓琴。歷劫升沉寧有意。孤雲去住亦無心。貞元朝士誰相待。桃觀重來試一尋。

山海關

雄關阻塞靈鼉。控制盧龍勝百牢。山界萬重橫翠黛。海當三面湧銀濤。哀笳帶月傳聲切。早鴈迎秋度影高。舊是六師開險處。待陪巡幸扈星旄。

柳枝詞

馬卿苦憶紅泥閣。我亦傷心碧樹村。病骨沉緜詞客死。更誰攀折與招魂。  
自注：綠楊天半紅泥閣。朱槿風前翠袖人。亡友馬孝廉雲翎柳。

池上閒房碧樹圍。簾紋如縠上斜暉。生憎飛絮吹難定。一出紅窗便不歸。  
同。因柳絮而念征人。人所同也。此妙在未曾說破。



邵 瓚 字柯亭直隸大興人康熙乙卯舉人官昌邑知縣

春日雜興之一

春風不媚俗。一例到閒門。新樹移鄰圃。青衫染酒痕。世情浮宦拙。吾道布衣尊。盡日讎書卷。藜牀坐覺溫。

此任廣文時作

九月十五夜中庭閒步作

鐘傳人定月華明。漸覺新寒夜氣清。露重似宜添羽帔。樹疎何處著秋聲。一鐙舊雨鄉園夢。殘夜西風獨客情。身世不從詹尹卜。流行坎止足吾生。

芙蓉

曾從楚客賦蘭茝。喜見風翻赤玉幢。欲采名花遺良友。還憑遠夢落秋江。盤承雨露珠無算。莖並鴛鴦蒂自雙。此日仙城誰作主。凝眸遙望凭紅窗。押三江韻中不著一客氣字便是到家六語本杜詩添入鴛鴦二字倍覺鮮妍

題畫

青山一角夕陽銜。隔斷喧囂境不凡。有客空亭閒眺遠。桃花春水送輕帆。佳景自得佳句

彭定求 字訪濂江南長洲人康熙丙辰賜進士第一人官翰林院侍講著有南畝詩稿

望日謁文山先生祠時于中丞方議重修用杜詩蜀相原韻

信國孤忠汗簡尋。荒祠憑吊劇蕭森。旌旗曾壯吳疆色。絲竹空埋魯壁音。自注：祠爲長洲舊學。斜谷出師原比烈。唯陽仗節本同心。榱崩棟折勞興復。瞻拜遺容一振襟。比以忠武睢陽恰如分量。

### 五人墓

偶泛蓬舸繞郭來。摩挲墓碣久徘徊。重看俎豆登鄉社。尙想干旌捍黨魁。白刃爭櫻千載烈。青雲並附九  
京哀。蕭蕭松柏凌秋爽。遺臭生祠安在哉。自注：墓爲毛撫建魏逆生祠處。

### 湯陰謁岳忠武故里廟像

忠武鄉閭駐轍過。柏陰森列更摩挲。辭家壯志憑孤劍。報國先聲震兩河。北塞攀髯魂正遠。西陵埋骨淚  
偏多。天傾宋社殊難問。可奈乾坤瀕洞何。

胡會恩

字孟綸。浙江德清人。康熙丙辰。賜進士第二人。官刑部侍郎。著有清芬堂集。○侍郎不以詩鳴。然舍宮。咀商。天然明麗。其品自貴。

### 書京江先生南苑詩後

御溝楊柳參差碧。夾道宮槐吹綠雪。六飛初幸玉泉迴。南苑春蕪駐仙蹕。帳殿涼颺五月寒。晾鷹臺畔簇  
雕鞍。至尊乙夜開經幄。中使星馳召講官。曲江學士蓬山彥。著作承明侍清讌。每依石室展牙籤。頻直彤  
闈聽銀箭。當今天子擅聖神。一遊一豫行時巡。上林獸簿不足問。石渠典籍時相親。屬車載書三十乘。特  
簡儒士隨八駿。先生奉詔有殊恩。郊原寓目多名勝。拳毛躑躅沙路香。平明珥筆紫荷囊。致君一卷虞書

在卿雲復旦。賡陶唐。霏微銅鶴鑪烟細。丹陛從容傳聖意。天苞地符世莫窺。河洛千秋未宜祕。俄傳鑾輅下離宮。羽林七萃依蒼龍。競識相如參侍從。千羣組練一章縫。歸來振筆詩千首。雲霞灑翰蛟螭走。鸞尾淋漓進尙方。岐陽石鼓同不朽。休風盛事載瑤編。不數橫汾宴鎬年。願將茂草虞箴頌。譜入薰風和舜絃。  
此紀文端公侍直南苑時事也。表主臣之一德。揚文藻之清華。末語頌箴兼至。悠揚婉轉。可誦可絃。

珠江雜詠

我愛珠江好。風光入嶺偏。帆飛蜩斗水。杖倚鷓鴣天。穗石仙蹤古。花田粉澤妍。扶胥望不極。身在海雲邊。  
我愛珠江好。天南接大洋。山家蠓壁峙。海市鸞帆揚。酒雜檳榔醉。茶勻茉莉香。最宜新雨後。炎暑變清涼。  
我愛珠江好。駢羅雜卉多。叢篁迷澀勒。異果熟波羅。火米生黎貢。蕉紈細馬馱。木蘭新艇子。溪女唱蠻歌。  
我愛珠江好。清娛事事幽。名香散東莞。佳硯採端州。水驛梅花晚。山村荔子秋。新來解蠻語。倚樹聽鈞鞀。  
雜入廣南風物。鮮妍軟順。不求工而自工。

題張蘧若侍御疏稿

太阿持節甫。釀禍實熹宗。誰使貂璫魄。猶存馬鬣封。青山無穢骨。勁柏有霜容。我讀西臺疏。清威徹九重。  
侍御名璠。祁門人。疏請削逆奄。魏忠賢墓。時論共快之。○魏奄死後。墓猶幾埒陵寢。碑稱完吾公。乾兒襄孫。列名其末。皆宰臣卿貳也。侍御奏後。得旨發而平之。以木石充。永定河工用。詳春明夢餘錄中。

金陵

建業曾傳半壁安。秦淮嗚咽暮濤寒。六朝寂寞青山在。十廟陰沉畫壁殘。禾黍故墟屯鐵馬。烟花南部失雕闌。隔江玉樹歌聲斷。更有哀絃向月彈。

秋曉

銅街列炬簇鳴騶。倦客中宵攬敝裘。曉柝尙嚴人語靜。寒星欲沒露花流。宮鴉影散金門曙。朔雁聲傳碣石秋。擾擾緇塵驚歲晚。江湖迢遞引羈愁。

蘇州送春詞

畫屨蒼苔陌上蹤。一春心事怨吳儂。曉風欲倩遊絲綰。愁殺寒山寺裏鐘。未到曉鐘猶是春。故愁聽寒山寺鐘也。點入寒山乃切吳地。

翁叔元字寶林。江南常熟人。康熙丙辰。賜進士。第三。官至刑部尙書。

病中雜述

邇來有微疾。遂得身閒居。隱几發清思。且復親詩書。夜闌不成寐。落月明前除。漸覺萬慮捐。往往見太虛。多恐疾良已。此念又復初。多病道心生。親歷其境者能言之。結意自警。

我初亦何爲。無端在陶冶。我身既非真。況乃名氏假。因復被虛聲。從人置高下。微生屬醯雞。世事付野馬。浮雲與電光。於我何有者。此意卽道心。生之驗。

下第出都途中偶成

孤踪寂寞與時違。匹馬荒郊趁落暉。有影自隨還對語。無家可老尙思歸。花當寒谷先秋落。雁叫空江帶雪飛。棄婦可憐身已去。向人猶整嫁時衣。

聞官軍收八閩

三年轉戰苦蒼生。禁旅傳餐滿市城。竇氏已來關右表。令公猶典朔方兵。卻看星象書含譽。自注。司天奏含譽。星見。

應有花名賜太平。自注。宋仁宗時。蜀地貢名卉。賜名太平花。願得臨邊諸將帥。許教隴畝事春耕。

陳錫嘏字介眉。浙江鄞縣人。康熙丙辰進士。官翰林院編修。著有兼山堂集。

賦得長安一片月

誰領高秋意。當頭片月看。碧空雲自淡。金掌露初溥。柝起街聲靜。砧鳴夜色寒。清輝應萬里。不獨照長安。

送湯西崖歸西泠

馬蹄經歲踏京華。忽逐征鴻去路賒。何物關心歸思急。孤山開徧早梅花。

王頊齡字顯士。江南華亭人。康熙丙辰進士。已未召試。博學鴻詞。官至大學士。諡文恭。有世恩堂詩。

魏忠賢衣冠墓

熹宗之朝閣寺亂。不數弘恭與石顯。門下誰非謁者兒。朝中半作貂璫犬。吁嗟氣勢真回天。茄花委鬼相鈎連。楊左諸賢一網盡。鎮撫獄底屍駢肩。門生天子差彷彿。張父趙母何懵然。紛紛祠額徧寰宇。賜塋特

勅營生前將作起冢同祈連。罽毼門閤踰董賢。一朝冰山忽傾倒。凶骨不得歸三泉。摩挲碧雲舊碑碣。忠賢姓氏猶高揭。侯覽當時旣伏誅。衣冠誰使留空穴。安得雷火一夜仆此碑。更倩龍湫之水洗羶羯。山靈面目還清潔。此詩成於張侍御奏請削平之前。故望水火燒除洗滌之。

喜湖南諸路大捷和學士李容齋前輩韻

降旗千片廩君船。妖婦春澄夢澤天。百粵風烟通馬援。八公草木走苻堅。帝心自切平吳後。廟算真成下瀨先。從此蠻方歌大定。竹筇蒟醬貢年年。籌邊屹屹建高樓。兩岸灰飛赤壁舟。首惡暫稽軍鼓覺。遺俘難免檻車幽。早擒孟獲趨滇水。急斷盧循入廣州。萬里長江消垢垢。直從楚尾至吳頭。

送李天生歸養

廿年高隱爲承歡。詔趣蒲輪卻聘難。聖主愛才非強志。大儒報國豈須官。鄒枚詞賦清時重。黃綺風流異代看。遙想綵衣歸拜舞。朝恩家慶話團圓。以養母急於辭官。盡子職。即以報君恩也。立言有體。

張榕端 字樸園。河南磁州人。康熙丙辰進士。官至禮部侍郎。

登岱

寰中羣嶽震爲尊。到此真窮造化根。曉日銅鉦升海國。長河衣帶挂天門。下方雷雨晴空見。上界星辰靜

夜捫九點青煙俱在掌。不須更擬上崑崙。

王吉武

字憲尹。江南太倉人。康熙丙辰進士。官紹興太守。著有冰菴集。

重修六賢祠成展祭作

自注。黃忠端公。諱尊素。倪文貞公。諱元璐。施忠介公。諱邦曜。周文忠公。諱鳳翔。劉忠正公。諱宗周。祁忠敏公。諱彪。佳皆越人。明季殉難。

乾坤有傾折。憑誰奠蒼黃。成仁取義間。得爭日月光。末世務苟活。橫流決隄防。不有數君子。何以扶頽綱。明季丁否運。婦寺紛蝸蟻。羣賢共憤爭。机隍正氣揚。暨暨有黃公。請劍擊貂璫。糜爛北寺獄。冤血流園牆。逮乎思陵末。大盜劇披猖。京城竟瓦解。宮闕屯豺狼。倪周並詞臣。就義何慨慷。賦詩整冠帶。引脰遂絕吭。共志有中丞。仰藥裂肺腸。雲車駕風馬。同日從君王。維時劉與祁。解組各歸鄉。號咷義旗舉。自矢百鍊鋼。未幾湛荒晏。南都復淪亡。兩公竟致命。先後歸帝旁。一甘絕勺飲。僵餓追首陽。一起赴清波。懷石同沉湘。區區於越地。山川靈氣翔。凜凜得數公。勁草卓秋霜。平生所樹立。理學兼文章。末路更完節。浩然還旻蒼。聖朝重褒忠。祀典載輝煌。守土風教責。表揚分所當。立廟傍囊宮。六賢共烝嘗。昨秋大風雨。摧我西廡廊。周垣半傾圯。不能庇堂皇。率先亟修築。勿使沙磧荒。椽桷新丹雘。木門飾倉琅。登堂薦蘋藻。肅然對冠裳。卽事有棖觸。霑襟涕浪浪。疇無君親恩。俯仰默感傷。表忠烈詩貴峻整。不尙奇僻敘述六賢。詳略分合各見筆法。韻語中合傳體。

釣臺謁嚴先生祠

釣臺突兀千山裏。釣竿獨拂桐江水。歲名遯跡山水間。爲有故人作天子。眼底不知赤伏符。意中安有侯

司徒京華筆札非所慣。自笑故態猶狂奴。鑾輿朝臨只高臥。伸脚無端驚帝座。中興將相列宿明。不若江湖客星大。千秋片石何嶙峋。遺廟江邊榱桷新。左方右謝同縫掖。自注方雄飛謝臯羽且喜不染簪纓塵。行人繫棹孤亭下。瞻拜高風心獨寫。紛紛名利獨何爲。堪歎征帆往來者。不着議論自高

許由瓢

瓢挂樹。一葉輕。風吹濩落夜有聲。不若棄之夢亦清。天下非大瓢非細。身外之物總爲累。不可以律有天。下而不與之心。

然巢許心事。盡此二語中。

劉參軍鍤

伯倫沉酣萬古轉睫。解醒五斗隨身一鍤。塊然土木委化從之。杳杳冥冥天方醉時。未語形出典午之昏四字抵什伯言。

郭汾陽冑

令公來敵壘。開免胄直進胸。無猜花門錯愕拜馬首。遽前譙讓執其手。指天爲誓酌杯酒。願擊吐蕃贖厥咎。此時神策觀軍容。方建大議幸河中。回紇入寇時魚朝恩操白刃宣言於朝。勸車駕幸河中。劉給事抗言爭之乃止。

李臨淮韡中刀

大將不能辱於賊。韡中置刀雪一尺。自拚熱血戰場傾。不令衆死身獨生。大旗連颺鼓聲陡。前鋒小卻命取首。突騎陷堅壯士吼。河陽破賊獸散走。幸無監軍掣其肘。一掣其肘九節度敗於相州矣。唐時大弊於此指出。



破龍澗

法雷夜響滄江底。鐵井怒裂毒龍尾。空山石破真珠噴。一夜化作蓮花水。潺潺萬壑聽琴聲。野花落澗春香生。清寒自是瀉石髓。霜液豈染蛟涎腥。火鬢電鬣從天下。至今寒泉尙餘緒。千年松老褪蒼鱗。猶似蜿蜒神物化。山僧晚汲風滿衣。洗鉢貯得真龍歸。膽瓶插花佛前供。雷雨還從鉢內飛。奇傑矣卻非長吉派。

高層雲

字謨苑。江南華亭人。康熙丙辰進士。官至太常卿。著有改蟲齋詩。

送周紫海遊華嶽

巨靈擘連山。洪河乃東落。峻嶒豁雙華。高天擢蓮萼。千峰列兒孫。供伏類卑弱。少昊揚金精。元氣鬱磅礴。古來避世士。長嘯此巖壑。濟時心孔殷。神化特假托。我觀陳圖南。壯志小寥廓。蒼生本無與。何爲墮驢矐。龍蛻逸千祀。繼者仍寂寞。青齊得周子。有道耽藜藿。不謂猶龍姿。養晦同屈蠖。長風吹孤雲。飄然向京洛。攬秋嘯儔侶。攜手城南郭。言將尋玉井。側帽裹芒屨。到日想躋攀。翠棧飛猿獍。箭括通一門。烟霞任揮灑。仰首問寥天。願偕玉女博。凌空笑退之。爾何有餘愕。濟時心事。托之神仙。李鄴侯其尤著者。陳圖南亦然。鄴侯顯而圖南隱耳。明眼人能見及之。

瞿唐

連山接巴東。地險勢復壯。誰闢鴻濛開。插天列青嶂。灩澦立江門。突兀獻奇狀。摩挲兩鐵柱。越歷幾興喪。驚濤奔紫崖。魚龍不敢傍。衆山自迴合。前行欲何向。初疑水際窮。忽轉天心曠。恍如出甌底。沸釜掀層浪。

赤甲與白鹽。開闔似屏障。丹黃蒼翠間。日色相摩盪。割據慨當年。雄長不相讓。流覽臥龍圖。英姿迥堪尙。探奇自茲始。彌覺心神王。

### 韶陽道中

湏源出大庾。厥勢頗奔放。況遭峽石束。鬱怒不可狀。南流匯武水。有助氣益壯。上疑建瓴瀉。下乏砥柱障。崖石蹙巘。旣歎泝流險。復經暑雨漲。湍急工倍勞。風弱帆空颺。更當巖巒削。卻苦牽挽妨。翠壁千篙攢。歲久石受創。自注崖壁間篙痕深三四寸者不可勝數前林日欲頽。暮色歛悽愴。圻堠倚荒茅。孤槎庶可傍。極擬杜陵雖未入神已能超俗

### 故園

故園渺何處。延眺獨傷神。親老久爲客。囊空長傍人。淚兼花作雨。愁似草逢春。何日還桑梓。商歌原憲貧。

葉舒崇

字元禮江南吳江人康熙丙辰進士官中書舍人

### 荷蘭國進千里馬歌

皇帝御宇之六載。負辰致政歸彤墀。大開明堂治六服。萬國會同車馬馳。海波不揚通遠道。紛紛重譯來京畿。九州之外荷蘭國。人物竊停言兜離。一朝稽顙表忱悃。驂駟作貢稱珍奇。雄姿逸態世罕有。奔騰千里猶嫌遲。驕嘶自許邀寵眷。不憚跋涉經險巇。牽來獨立玉階下。遂令凡馬皆驚疑。姬王詎必重八駿。漢

帝安用遣貳師。那知至尊方偃武。端拱南面垂裳衣。詔謂圜人歸廐下。予以銜勒聊鞿羈。鸞旗在前屬車後。朕乘此馬將安之。聖朝豈復畜奇獸。留茲用慰遐方思。

金陵有感

狂來不減步兵愁。行盡清溪古渡頭。極目羣山還繞郭。感時雙鬢怯登樓。桓伊邀笛人誰在。謝傅圍碁墅尚留。俯仰只言天塹險。白鷗紅蓼滿汀洲。

卷十一

毛奇齡字大可。浙江蕭山人。康熙己未。召試博學鴻詞。官翰林院檢討。著有西河詩集。○西河湛深。所以不得爲醇。儒藝林惜之。

打虎兒行

禹州民朱兒。救父打虎。史使君廷桂獎勞之。予識之。禹署。

打虎兒。乃在汴梁之禹州。禹州城外朱家樓。小兒十一。隨父耕。深林有虎斑毛成。颯颯黑風吹草根。乘風攫人誰敢攫。小兒不識虎。疑是狐與狸。陡然見虎銜父肢。咆哮草際風來吹。兒啼向風不得父。把杙打虎截虎路。三尺童子五尺杙。憑空擊去著虎臆。虎驚顧兒舍父逸。深林風草皆無色。禹州太守呼小兒。予之

以帛飽以糜。予時在署。識兒面。披髮跳擲。真兒嬉。問兒打虎。虎何似。舉手張牙。作虎勢。假虎隱幔。恐小兒。小兒驚避。力不支。當時見虎。得無怖。此事我亦昧。其故。禹州太守省得知。是時小兒知有父。男兒七尺。縱復橫。爭名攫利。萬里行。高堂存沒。總不問。那肯舍命戀所生。我所思。打虎兒。正說小兒之忘身救父。易於觀。則小兒之至性愈出。見此時小兒知有父。不知有虎也。此詩有關名教。四河集中。尤爲拔萃之作。○深林豐草。皆無色。七字。抵他人可數十言。

詔觀西洋國所進獅子因獲遍閱虎圈諸獸敬製長句紀事和高陽相公

古皇慎德開四譯。內被綏侯外蠻貊。貢物區爲王會文。共球載在賓庭冊。河鏐吠翟獻上方。兜離僭侏陳明堂。三靈旣應百神洽。般般之獸皆翺翔。康熙戊午十七載。神武聲名播遙海。五時從教白澤來。千門眞見黃龍采。鴉翎習習負矢飛。雞斯之乘歸林支。諸方執贄儼相列。東漸溟渤流沙西。于中有國名古里。曾渡瀾滄作海市。魚眼看波射水紅。蛟絲織浪翻雲紫。地當申未產獸雄。金精傑出毛羣中。銜繚飾組獻天子。裁貝作章辭禮恭。從容檻致射熊館。不爲珍禽爲懷遠。虎落時看接上林。鷹房秋到移南苑。廷臣侍從欲賦詩。皇恩有詔徐觀之。圓目昂鼻有筋力。懸星掣電無雄雌。獨憐形髮未卷曲。曳尾繼繼若散絲。衣被欲成鞠色見。牙齧不使鉤形施。爾時羣檻狎諸獸。木壘槍樊列前囿。熊羆避路不敢當。虎豹攀欄有時吼。青鸞赤雀相對栖。豪豬野馬爭游嬉。張昭見此不動色。朱亥在傍何所思。聞之有熊狩。嗚谷獲得狻猊。比牛畜。漢時安息亦獻斯。形似麒麟但無角。從茲郊祀播樂章。射烏格鹿非尋常。鏡吹已陳朱鷺曲。徵歌還

及白狼王何如儲待未完緝。詔遣求賢共來集。東堂甫布網羅成。西域剛逢旅獒入。招搖乍啓禁籞開。白麟有對皆奇才。請看太保卷阿賦。恍見文王靈囿來。依題布置而徧閱諸獸中仍以獅子作主。此分賓主識輕重也。一結尤得應制體。

朔方

天校神兵罷朔方。雙鍵不復挂漁陽。三秋白草緣關斷。萬里黃河入塞長。鐵柱分標滇外戍。金書異姓漢中王。從軍久負匡時略。愁見邊關到夜郎。

錢塘逢故人

西陵咫尺是天涯。喜汝從予江上槎。兩度陶朱思返越。百年張儉竟無家。鄉關恨屈鑽榆節。里巷羞乘廣柳車。壯士不還仍遠去。江東兄弟漫咨嗟。應是避禍出亡而不歸者。玩四語六語自見。

少年

少年仗劍出關中。羽衛新招六郡雄。久許報恩逾聶政。平時飲酒笑秦宮。雞鳴曉日黃河動。雁陣秋陰紫塞空。當日粉榆遷欲盡。愁君馳馬過新豐。一結爲少年危之。應是負氣任俠同於郭解者。

禹廟

夏王四載告成功。別禪苗山起闕宮。玉帛千秋新祿薦。衣冠萬國舊來同。金書瘞井封泥紫。窆石懸花映篆紅。一自百川歸海後。長留風雨在江東。

謁嵩嶽

太室開天表。崇邱奠土中。主名高四域。受秩比三公。日月環區宅。陰陽割渾濛。歌崧揚峻極。望祀體昭融。華蓋標方嶺。金壺啓上宮。翁河承漢禪。卜洛載周工。別觀翔修鶴。層城倚大熊。藏書憑玉女。過澗遇青童。洞閉能圍雪。梯長恍御風。羣山咸拱嶽。萬歲自呼嵩。槐弟封巒爵。莒羊採少翁。浮丘閒駕羽。子晉妙吹筩。石酒龍精白。崑花鳳首紅。煙霏春渺渺。水滴午濛濛。虛壑涵深鑛。空梁拔斷虹。天關應再闢。帝座儼相通。險塞分河內。靈祇屈岱東。神京懷舊服。終古賴攸同。典重肅穆。

覽鏡詞

漸覺鉛華盡。誰憐顏頓新。與余同下淚。只有鏡中人。其實無一同心人也。然道來曲而有味。

弔姜貞毅詩

曾披閭闔扣天關。垂死孤臣未賜環。遺命一棺何處葬。宣州城外敬亭山。直書其事。忠義自見。

長門怨

玉殿金缸晚色新。殿前少使繡麒麟。夜來恐索長門錦。要賜平陽歌舞人。自注：漢內職有少使之號。○別便有多少舍蓄。

贈柳生

流落人間柳敬亭。消除豪氣鬢星星。江南多少前朝事。說與人間不忍聽。

除夕作

旅館椒花紅欲然。椒盤愁向客中傳。如何纔聽金雞唱。便喚今宵是客年。

李因篤

字子德。陝西富平人。康熙己未。以布衣召試博學鴻詞。官翰林院檢討。著有壽祺堂集。○子

以母老辭。不許。表三上。乃許。情詞懇惻。比李令伯之陳情。則又過之。聖主之仁。人子之孝。字內共稱。不止羨其鴻軒鳳舉也。

紀別自注將往雁門

置酒歲云暮。北堂淡寒暉。飢鳥相與鳴。朔風厲重圍。老母閱遊子。欲言先歔歔。不問何日行。先問何時歸。遙遙計往路。歷歷詢征衣。禠身慎自防。兼量寒與飢。長跪聞母言。銘心毋敢違。病妻勉下牀。相視首蓬飛。謂我當行邁。有淚且勿揮。

弟從母側來。再拜投一罌。征駒鳴前庭。擔負已出野。僕夫前致辭。冉冉西日下。要當慷慨去。不覺淚如瀉。兄言勤門戶。弟言慎車馬。

小子復牽衣。岐路含百慮。不知行何方。強欲偕我御。念當遠乖離。何忍揮之去。悲哉遊子吟。斯須哀樂具。中懷如懸旌。搖搖不得住。依依天屬親。撫事媿童孺。三章不外一真字。

題世胄都指揮使崔公汝明像

高皇養士三百秋。衛帥食恩等通侯。銘鐘書帛列上第。金罇玉案羅羣羞。一朝河上度櫂氛。虎嘯嶠函不忍聞。赤幟無色鼓聲死。嬰城惟有崔將軍。將軍開國世家子。輕裘緩帶談經史。吹篴時過大司農。自注公兄抑菴尚書。北斗西豪俱在此。昭陽之冬月無陽。野鬪豺虎色玄黃。決皆不知有鋒刃。疾呼白日生冰霜。臣矢已窮力戰久。側身誓天不相負。已拚先濺侍中血。寧料如生元帥首。紛紛侍衛盡同朝。今何蕤萎昔何驕。朝行出攻暮不返。歲寒松柏乃後凋。後來傳疑未傳信。壺祠蠟墓無人問。長留遺像天地間。勇者成仁懦者奮。崔係嬰城戰死者。後無人表白。故於遺像中表之。此等詩大有關係。

登代州白人巖因飲孫園

高仞懸孤嶂。雙厓劃一門。好人多在野。春水自依村。雨走空天角。松藏老石根。危梯攀古洞。彷彿說桃源。爲野外人生色。春水自依村。五字天然佳景。不在鏤刻。

雨

只覺前厓好。何人並結廬。巖巖光倚薄。香閣靜含虛。法境清涼外。人煙戰伐餘。因聲寄蓮社。吾志在山居。  
積潦乘秋見。鳴蜩滿地生。薄言風有隧。遑卹雨無正。河北多躑食。天南未解兵。十年留滯盡。鄉國意縱橫。經語作對。流連光景者不解毒。

邊上



蕭關城堞望中分。鹿苑干戈道上聞。野霽卷蘆吹白日。霜清驅馬下黃雲。征西盡撤三千戍。鎮朔遙歸十萬軍。誰抱遺弓攀鶴表。賜冠空滿鷓鴣羣。

得傅徵君山信

河汾文獻未全空。盡上乾初有是公。不卜同舟瞻郭泰。徒知中論擬王通。芳期虛訊春來鳥。劇飲猶傳雪後鴻。他日華門相候處。下車應拜采桑翁。  
以不事王侯重之中寫得信。未訂過從極見篤法次第。

潼關

雲薄關河紫氣長。帝樞曾此撼嚴疆。河經百二開天地。華枕西南鎖雍梁。戍火忽移函谷月。征車多帶灞亭霜。舊京蕭索垂千載。飛輓何繇接巨航。

望嶽

太華三峰列峻屏。晴霄飛翠下空冥。曉雲東抱關河紫。秋色西來天地青。玉女盆中寒落黛。仙人掌上接明星。亂餘林壑饒遺客。縹緲幽棲賦采苓。

尤

字展成。江南長洲人。康熙己未。召試博學鴻詞。官翰林院檢討。家居後。加侍講。著有西堂詩集。先生所著西堂雜組傳入禁中。草皇帝稱爲真才子。後入翰林。時聖祖稱爲老名士。位雖不尊。天下羨其榮遇。比於李青蓮云。西堂少歲時。專尙才情。詩近溫李。歸田以後。做白樂天。流於太易。雖街談巷議。入韻語中。遠近或以遊戲視之。比於王鳳洲之評唐伯虎。不知四十至六十時。詩開闢動盪。軒昂頓挫。實從盛唐諸公中出也。

送曾道扶司李漢中

江陵驛路滿梅花。計日連雲出谷斜。大內山高環二華。五丁峽遠接三巴。蒲鞭寬厚隨羌俗。驄馬威儀近漢家。更上陳倉懷古跡。武侯殘壁起悲笳。音節高亮。七子中近李滄溟。

題韓蘄王廟

忠武勛名百戰回。西湖跨蹇且銜杯。英雄短氣莫須有。明哲保身歸去來。夜月靈旗搖鐵甕。秋風石馬上琴臺。千年遺廟還香火。杜宇冬青正可哀。蘄王末路。至託爲浮屠以自免。爲功臣者亦危矣。莫須有。歸去來。一岳一韓。天然隊仗。

生日志感

半百年過意不如。自注。倒用杜句。看雲藜杖倚荒廬。平生最拙惟謀食。一事差強已廢書。蕭瑟江關哀庾信。飄搖風樹泣臯魚。何當燕市尋屠狗。灑酒荒天弔望諸。每於結處用力。故通體俱振。

登天寧浮屠絕頂望海

興至超然到上頭。憑虛蕭瑟見高秋。諸天冥冥人非想。大地茫茫我亦愁。俯聽蒼蠅喧萬瓦。遙看白馬走中流。海神未許探幽窟。倏忽風煙起蜃樓。有此胸襟。有此筆力。纔不負此題。東坡泛海詩。前賢未必不遜後人。

聞鷓鴣

鷓鴣聲裏夕陽西。陌上征人首盡低。遍地關山行不得。爲誰辛苦盡情啼。行不得。意人所同。知此更翻進一層。便覺百端交集。

陳維崧

字其年。江南宜興人。康熙己未。以諸生召試博學鴻詞。官翰林院檢討。著有湖海集。○陳懷特表之。○檢討年四十餘。尚爲諸生。有日者謂之曰。君過五十。必入翰林。梅杓司贈詩。有朝來日者橋邊過。爲許功名似馬周。句後果然。事見池北偶談。

早發望亭

水宿弭旅情。挂席愆賓餞。洩雲映寒埃。緒風扇輕輶。暝增梁溪深。霽覺胥臺緬。棹歌寫風波。羣動互輾轉。沙鴛佇空明。江菼覆清淺。紅泉雨後流。白露草間泫。周覽雖言煩。幽默亦云闡。遠望姑蘇城。綺羅若之眼。舞基想餘粉。歌梁悔遺囀。餐霞趣未慰。折麻務堪踐。寄謝區中緣。揚舲恣婉孌。謝公風格

酬許元錫

嘉隆以後論文筆。天下健者陳華亭。梅村先生住婁上。斟酌元化追精靈。憶昔我生十四五。初生黃犢健如虎。華亭歎我骨格奇。教我歌詩作樂府。二十以外出入愁。飄然竟從梅村遊。先生呼我老龍子。半醉披我赤霜裘。此生闌入銅駝路。可憐老作江南賦。頭上不畏咸陽王。眼前只認丁都護。晚交許子懷抱開。看爾不合長悲哀。手提一詩來贈我。十幅錯落紅玫瑰。我年三十餘。清狂愛兒戲。旁人見我笑不休。安知我有填膺事。日間擊鼓夜擊鮮。行樂安得千萬年。何肯齷齪學章句。三日新婦殊可憐。許子贈詩踰一月。念欲報之久不發。昨宵飽看冒家燈。一寸管城老龍渴。掀髯狂作許生歌。食紙春蠶響不歇。明朝歸客正揚舲。海色蒼茫青更青。嶽巖歷落。寫自己懷抱。言下并見許子一結闕然。

贈李研齋太史

人云蜀道如青天。君家乃在青天上。蠶叢鳥道不得歸。一度思歸一惆悵。去年石頭城。道遇李謫仙。手持白玉塵。囊乏青銅錢。一言稱意百不愁。邀我直上秦淮之酒樓。城南楊花白如雪。一一亂撲胡姬裘。笑謂金陵姬。何似巫山女。十年枉作劍閣銘。白鹽赤甲奈何許。昔住錦官城。樂事不可當。木棉花發處。斜對碧雞坊。桃笙寶布居民賣。蒟醬江魚過客嘗。此時二月粉水香。巴僮巴女發浩倡。賸錢夜市成都酒。歛歌春賽武都王。別來舊事心茫茫。傳聞李特屠殘疆。臥龍躍馬竟誰是。天彭井絡空蒼涼。前者百丈船。牽過鍾山郭。忽見三巴人。欵然萬金落。諸葛祠堂盡棘榛。譙周子弟俱俘掠。當時婉孌直銅龍。都堂香藥掖門松。自從喪亂著芒屨。飄零已復成吳儂。一身雖在不自保。何況盜賊多於蜂。瞿唐惡浪千萬重。念之祇復愁。心胸安能吹我落天外。蹲鴟飽作西川農。語君且飲勿愀愴。眼前萬事大鹵莽。故里新年棧道開。官軍已縛印笄長。太史蜀人。逆藩之亂。僑寓金陵。不得歸。故作詩慰之。中間跌宕飛揚。波平浪起。得青蓮逸氣。○賸錢。壘中以錢贖罪也。

得桐城方爾止先生書感賦兼懷密之先生

鯉魚風打江潮利。五月荊州估船至。船載沙門寶月師。附得樅陽故人字。我家聖廬同雞棲。負薪晝夜孤兒啼。開函伸紙未及半。申胡鬢栗聲酸嘶。書亦不能讀。淚亦不能止。憶昔芳華十五時。與君同作金陵子。金陵九門門九重。白靴校尉如游龍。賤子文名楊德祖。先君風表郭林宗。三千賓客遨遊徧。流兔飛英誰

不羨家伎新傳張敞眉。游童暗認王珉扇。桐山諸子盡江蕭。僑寓家家朱雀橋。風暖侯家春擊鼓。月明戚里夜吹簫。櫻桃小幄沉香火。楊柳藏烏門不鎖。密約呼鷹出每遲。私邀盤馬期常左。此日清流氣絕塵。此時修竹彈文新。諸王已見愁籤帥。郡國還聞捕黨人。阿童江上軍船動。毳帳連天馳繡鞞。一載昭陽恨已經。兩朝太學知何用。憐我袁家一愍孫。拾橡蕭蕭歸墓門。君不見孫郎戰沒周郎老。自注孫郎克龍眠前輩獨君好。君家尙有始興公。臥看祗園生白草。寫兩家盛時極文酒讌遊之樂而小朝廷之荒嬉馬阮之醜正惡直至於如此危亡立見矣故家零落前輩尙存結到密之先生鏗然而止章法絕佳

顧尙書家御香歌

獵獵朔風翻毳帳。營門紫馬屹相向。陳生醉拘珊瑚鞭。蹀躞閒行朱雀桁。顧家望近尺五天。顧家父子真好賢。開門揖客客竟入。留客不惜青銅錢。玉缸潑酒酒初壓。秦箏促柱彈銀甲。綠鬢小史意致閒。卻愛微紅添寶鴨。陳生此時聞妙香。欲言不言神茫茫。心知此香世間少。得非迷迭兼都梁。主人重取蘭膏爇。此香舊事還能說。憶昔初賜長安街。金甌天下猶無缺。至尊桂殿日齋居。千首青詞錦不如。綠章夜上龍顏喜。第一勛名顧尙書。嵯峨紫塞榆關道。白雁黃沙風浩浩。萬馬奔騰夜有聲。三關蕭瑟春無盜。尙書辛苦鎮居延。絡繹黃封賜日邊。非關小物君恩重。爲許名香國史傳。鏤金小盒宮門出。中涓一騎紅塵疾。親題萬顆小金丸。猶是昭陽內人筆。只今滄海已成田。留得天香幾百年。攏來綺袖人誰問。熏罷銀篝味不全。

白楊已老尙書墓。世間萬事都非故。主人語罷客亦愁。留客牽衣客不住。君不見客衣零落詎堪論。半漬香痕半淚痕。忍看天寶年間物。我亦東吳少保孫。

寄黃梨洲先生求爲先人誌墓

熹宗之朝盜竊柄。國事稠濁由諸閣。刊章告密滿天下。劫火烈烈崑岡炎。忠端骨鯁眞牢戶。少保強項遭髡鉗。三朝要典亂白黑。爾曹病熱徒狂譫。膺滂之後愛名節。翁與吾父均酸鹹。思泉出井流不涸。孝筭拔地天能參。東都壇墀立名字。西園鴟閣紛桂襜。懷寧亂釁老逾怒。矯尾直拂鐘山巖。我師秋浦魁壘士。便樹頤頰張鬚髯。一呼袒裼暴猛獸。筆陣霍若霜鋒銛。妖麼得志逞報復。一網盡矣心所甘。王師南下明社屋。人頭畜鳴盡夷殲。四十年來市朝換。曜靈急景奔驚颿。崇天門外黨碑倒。沙石磨治苔紋嵌。平生先子膠漆友。半作黃葉經秋芟。晨星落落只翁在。開元軼事餘誰諳。先朝鉤黨有本末。冰玉碣磬秋陽暹。今人往往咎過激。毋乃醜正叢譏譚。嗚呼吾父沒已久。墓門鬱鬱愁松杉。累翁一片道旁碣。請放健筆爲雕鐫。  
寫兩家世誼而兩朝朝局一  
一羅列此絕有關係之詩。

憶貴池吳師

當代論兵會誰人。可擅場。劉琨歸朔北。孫策入丹陽。一諾輕車騎。千言破混茫。靈旗如彷彿。毅魄想飛揚。  
師卽吳次尾也。頁黨人之魁。懷填海之志。讀此詩想見其人。

將歸留別練塘諸子

遊子衣邊雪。慈親地下心。都將苴杖淚。并作苦寒吟。此意復誰識。當歌難自禁。勞君霜夜彈。莫打失巢禽。  
失巢禽。喻已爲無母兒也。從至性流出。惻惻動人。

捧讀石齋黃公所撰先少保神道碑賦此追感

周侯池畔樹蒼蒼。遺碣峇嶢屹此鄉。哀誄南朝顏特進。碑銘東漢蔡中郎。千秋定論歸青史。一夜悲風起白楊。此日躊躇腸欲斷。漳南高塚亦昏黃。  
時石齋先生已授命。故追憶之。

秋日懷幔亭先生

百二山河極望殘。一門羣從盡南冠。誰憐鸚鵡籠中語。大有琵琶塞上彈。寂寞金雞雙闕迥。飄零石馬七陵寒。銀鐙夜宿昭陽殿。疑作西宮月影看。  
自注。先生繫處。卽南國大內。

秋色蒼茫上佩刀。故人消息夢魂勞。石城劇報收袁粲。魯國驚聞捕孔褒。雪窖羝羊雙涕淚。錦官杜宇一悲號。好憑萬騎平南將。急趁江風挂戰袍。  
首章繫獄。次章遣戍。無可奈何。望其平寇。以贖罪也。通體警策。無一懈句。懈字那得不傳。

送張若水出關自注。若水。禔。恭。先生子也。

祖母秦州父錦州。盧家少婦又邗溝。百年骨肉拋三地。萬死悲哀併九秋。欲贈媿無銀絡索。將離怕聽鈿篲篋。漢庭早晚流人赦。望爾歸鞭度隴頭。  
自傳一家三處。乃處常之時。此當權罪出。關劇可悲也。一起直下四語。千鈞筆力。

嚴繩孫字蓀友。江南無錫人。康熙己未。召試博學鴻詞。官翰林院檢討。遷中允。著有秋水集。○召試日。以目疾。止成省耕八韻詩。已不錄。上素重其名。同授官。

發維揚

輕舫春流上。煙光淨客衣。岸知緣海闊。山自渡江稀。細路花將盡。空村燕不飛。浮家吾自可。白首共漁磯。

寫盡渡江後一路風景。不著繁華明麗詩品故高。

春後

九春觴詠等閒過。猶染霜毫寫永和。困懶鶯花經眼失。衰遲風雨不情多。城隅綠水空絲管。天上青雲足網羅。不似柳陰溪上去。自橫艇子臥漁蓑。

煙雨渡江

京江春樹隔芊緜。咫尺神靈意惘然。青壁近迷山寺雨。綠蓑遙入海門煙。江魚水闊難通市。石燕風多不避船。我欲然犀照幽渚。夢魂猶自怯潺湲。

吳王井

銀牀玉甃總成塵。不及軍持汲尚頻。試看一泓清未已。鉛華先老沼吳人。比美人黃土意。蘊藉幾許。

龐

塏字雪崖。直隸任邱人。康熙己未。召試博學鴻詞。官翰林院檢討。後出為建寧太守。

喜聞大軍收復川中



天險那得恃。先聲斬劍關。投戈填野水。窮寇哭空山。風獵軍旗動。雲連甲仗殷。將軍須努力。直取夜郎還。  
末望其直。取吳逆也。

汪

楫字舟次。江南儀徵籍。休寧人。康熙己未。召試博學鴻詞。官至福建布政使。有悔齋集。○悔齋出使琉球。宰臣以下。俱有贈言。歸撰中山沿革志。以備參考。

懷曾庭聞

有客吳江來。傳君忽爲僧。不信溫泉中。一朝結爲冰。十年騎蹇馬。一氣何驍騰。馬蹄踏白骨。月照光峻嶒。上書雖不報。誰謂君無能。激昂遂出世。夫豈憂繳矰。嗚呼壯士肝。永夜爲摧崩。

鐵尙書歌

自注。東昌城下作。

鐵尙書。鐵不如。東昌城門朝大開。齊呼萬歲聲如雷。燕王躍馬及門限。霹靂飛空下懸板。不斷王頭斷馬頭。鼠竄猿驚箭滿眼。王怒發礮城摧崩。健兒爭把螯弧登。煉石丸泥難作計。一紙公然出埤堦。萬夫辟易不敢前。大書太祖高皇帝。黑夜斫營日堅守。能使英雄還北走。嗚呼神器天所與。一木隻手能齟齬。錚錚誰比鐵尙書。嗚呼尙書鐵不如。  
敘東昌戰事。毛髮欲動。讀去凜凜有生氣。

劉考功馘見示夏峰老人書卷屬題長歌

夏峯老人雙眸空。論交只許劉考功。長安隻字不肯入。尺素突出開心胸。上言日讀數行書。衰老以此酬蒼穹。下言劉君世所望。不爲韓富非英雄。虛堂披對正六月。滿天赤日來清風。老筆生硬轉斌媚。直欲處

處藏其鋒。良馬識途。惡荆棘。蒼鷹願擊。愁樊籠。江河日下。事日變。世無魯叟。誰彌縫。我聞劉君。昔偕隱。攜琴荷鋤。驚老農。盡散家產。別親串。逝將食力。深山中。若使至今。不一出。人間安用。雙赤松。待汝他日。濟時了。把酒問汝。將安從。

### 贈別澹公

出世翻多事。生平竟若何。批鱗真給諫。托鉢是頭陀。老驥當風立。冥鴻踏雪過。總無虛歲月。何用補蹉跎。

### 歡喜亭同玉明上人觀雲海

山與雲俱沒。憑高安所望。人初入混沌。天不改青蒼。撫掌通樵路。飛棉變客裝。松風響何處。澗水下鄱陽。

予於庚午春遊黃山。雨後親見此景。故知三四語之妙。

### 香鑪峯

奇峯真拔地。一鏤正當門。天近無棲鳥。藤枯有挂猿。白雲浮暮靄。紫氣隱朝暉。鐵屋何年構。風雷萬古存。

自注。峯頂有鐵屋。傳聞風雷移上云。

### 黯淡灘

灘急不聞呼。千軍轉輓轡。神工較分寸。鬼伯待須臾。曲折憑孤櫂。安危仗一夫。會看浮萬斛。大海射天吳。

傳寫過灘之險。字字驚心怵魄。

出五虎門同石來次前使蕭給事韻

長年振柁倚高樓。萬里潮迎萬斛舟。浪打白頭都是雪。衣添六月忽如秋。蒼茫不覺千山遠。混沌真堪一氣浮。最愛乘風同快馬。漫將喘月笑吳牛。對結是結語。令讀者不覺其對此法從少陵出。

長史鄭弘良以王命請余畫像留國中口占答之

豈是中朝第一流。偶持龍節拂麟洲。大名那得齊諸葛。遺像何勞比益州。稍喜文章堪報國。誰憑骨相取封侯。靈臺一片真難狀。多謝傳神顧虎頭。東坡贈子由出使契丹云。單子若問君家世。莫道中朝第一。起句蓋用之也。通體不亢不卑。何等身分。

朱彝尊

字錫鬯。浙江秀水人。明太傅國祚曾孫。康熙己未。以布衣召試博學鴻詞。官翰林院檢討。著有曝書亭集。○竹垞先生生平好古。自經史子集及金石碑版。下至竹木蟲魚諸類。無不一一考索。纂述如經義考。日下舊聞。詩綜詞綜。其最著者。又嘗集唐詩為填詞名蕃錦。疑出鬼工。幾於人力不與。顧寧人先生不肯多讓人。亦以博雅稱許之。

雁門關

白登雁門道。騁望勾注巔。山岡鬱參錯。石棧紛鉤連。度嶺風漸生。入關寒凜然。層冰如玉龍。萬丈懸蜿蜒。飛光一相射。我馬忽不前。抗迹懷古人。千載多豪賢。邛都守長城。烽火靜居延。劉琨發廣莫。吟嘯扶風篇。時來英雄奮。事去陵谷遷。古人不可期。勞歌為誰宣。嗷嗷中澤鴻。聆我慷慨言。時來英雄奮。項邛都。事去。陵谷遷。項劉琨。有此二語。

方見  
結束

大孤山

兩孤去百里。宛在中流半。匪獨形勝殊。氣亦變昏旦。天梯鬼斧開。廟火神鴉散。昭昭雲月輝。歷歷明星爛。空水既澄鮮。浮光亦陵亂。飄飄御冷風。恍惚度銀漢。未有歸與情。空深逝者歎。

送林佳璣還莆田

高樓置酒觴。今夕愁聽驪歌送。行客搖落深知羈旅情。飄零況是雲山隔。林生磊落無等倫。鳳雛驥子誰能馴。一朝慷慨辭鄉里。幾載饑寒傍路人。平生崔嵬好奇服。流離恥作窮途哭。往往詩歌泣鬼神。時時談笑驚流俗。林生林生骨相奇。昂藏不異并州兒。看君富貴當自有。不合憔悴留天涯。高秋別我閩中去。行李蕭條慘徒御。客舍清江萬里船。鄉心紅葉千山樹。九里湖邊倚翠屏。穀城山下俯清冷。寒風江路兼山路。落日長亭更短亭。嗟予分手天南遠。惆悵河橋送君返。遠客休辭行路難。高堂應念還家晚。

將之永嘉曹侍郎餞予江上吳客韋二丈爲彈長亭之曲并吹笛送行歌以贈韋卽送其出塞

韋郎舊隸羽林籍。曾向營門教吹笛。不聽吳中白雪音。定呼鄴下黃鬚客。平原相見轉相親。置酒誇君座上賓。下若尊壘朝未罄。東山絲竹夜還陳。閒來坐我花間奏。玉洞飛泉響巖溜。古調多傳關馬詞。新聲似出康王授。問我東行到海壖。日斜江上慘離筵。還將北雁南飛曲。催送錢塘楚客船。船人搥鼓津頭泊。紅葉千山富春郭。忽作邊秋出塞聲。江楓岸柳紛紛落。哀絃促管不堪聽。賓御聞之亦涕零。挂席遠移嚴子瀨。看山直上謝公亭。聞君欲問雲中戍。雪消飲馬長城去。廣武營中折柳時。黃瓜阜上題書處。司農舊是

出羣才。此日征西幕府開。試向尊前歌一曲。梅花飛徧李陵臺。平調中。忽作變徵之聲。此高岑體。與李杜主章二在席是客篇中客多於主而結處轉送章二又以客爲主矣作法甚變。

逢姜給事塚

黃門先生官左掖。力欲拔山氣辟易。虎豹天關閉九重。孤臣血肉徒狼籍。東萊蜃市易沉淪。南國相逢淚滿巾。青鞵布韉江湖外。誰念當時折檻人。敘長篇於八句中。猶書家之縮本也。少陵短歌如婁公不語宋公語。尚憶先皇容直臣之類。往往有之。

玉帶生歌

玉帶生。文信國所遺硯也。予見之吳下。旣摹其銘而裝池之。且爲之歌曰。

玉帶生。吾語汝。汝產自端州。汝來自橫浦。幸免事降表。僉名謝道清。亦不識大都承旨趙孟頫。能令信公喜。辟汝置幕府。當年文墨賓。代汝一一數。參軍誰。謝臯羽。寮佐誰。鄧中甫。弟子誰。王炎午。獨汝形軀短小。風貌樸古。步不能趨。口不能語。旣無鸚鵡之鵠之活眼睛。兼少犀紋彪紋好眉嫵。賴有忠信存。波濤孰敢侮。是時丞相氣尙豪。可憐一舟之外無尺土。共汝草檄飛書意良苦。四十四字銘厥背。愛汝心堅剛不吐。自從轉戰屢喪師。天之所壞不可支。驚心柴市日。慷慨且誦臨終詩。疾風蓬勃揚沙時。傳有十義士。表以石塔藏公尸。生也亡命何所之。或云西臺上。晞髮一叟涕漣漣。手擊竹如意。生時亦相隨。冬青成陰陵骨朽。百年蹤跡人莫知。會稽張思廉。逢生賦長句。抱遺老人開筆看。七客寮中敢嗔怒。吾今遇汝滄浪亭。漆匣

初開紫衣露。海桑陵谷又經三百秋。以手摩挲尚如故。洗汝池上之寒泉。漂汝林端之霏霧。俾汝留傳天地間。忠魂墨氣常凝聚。小小一硯傳出信國之忠。臯羽之義其實相隨。臯羽乃想像語也。一結硯與信國雙收。是何神勇。

### 送曹侍郎浴備兵大同

榆關蕭瑟二庭空。烽火平安九塞通。往日連師驚朔漠。只今市馬互西東。黃河天上三城戍。畫角霜前萬里風。知有馮唐論將略。不令魏尚久雲中。此章以下俱近李北地。應是中年之作。晚歲俱歸流易矣。愚取先生七律中年者居多。

### 宣府鎮

高城西北控燕都。吹角清秋落日孤。尚憶武皇巡玉塞。親從鎮國剖金符。宮槐御柳今蕭瑟。虎檻鷹坊舊有無。邊事百年虛想像。誰誇天險塞飛狐。

### 南鎮

稽山形勝鬱岩嶷。南鎮封壇世代遙。絕壁暗愁風雨至。陰崖深護鬼神朝。雲雷古洞藏金簡。燈火春祠奏玉簫。千載六陵餘劍寫。帝鄉魂斷不堪招。

### 題南昌鐵柱觀

丹甍縹緲麗層城。鐵柱縱橫鍊紫清。陰洞蛟龍晴有氣。虛堂神鬼晝無聲。遊人自愛登高賦。仙吏仍兼濟物情。雷雨忽愁天外至。江湖元在地中行。

雲中至日

去歲山川縉雲嶺。今年雨雪白登臺。可憐日至長爲客。何意天涯數舉杯。城晚角聲通雁塞。關寒馬色上龍堆。故園望斷江村裏。愁說梅花細細開。學北地高入杜陵。通首一氣能以大力負之而趨。

土木堡

平蕪一簣狼山下。九月驅車白霧昏。到眼關河成故迹。傷心土木但空屯。元戎苦戰翻廻蹕。諸將論功首奪門。倘遣金縉和社稷。祠官誰奉裕陵園。裕陵反國。由於不主和議。而羣姦以奪門論功。忠臣受戮。真千古不平事也。懷古詩須選出正論。

謁大禹陵

夏后巡遊地。茅峰會計時。雙圭開日月。四載集輶櫜。國有防風戮。書仍宛委披。貢金三品入。執帛萬方隨。相古洪流割。欽承帝曰咨。寸陰輕尺璧。昆命有元龜。自授庚辰籍。寧論癸甲期。清都留玉女。惡狠鑿支祁。荒度功攸賴。平成理自宜。神姦魍魎屏。典則子孫貽。明德由來遠。升遐亦在茲。邱林無改列。弓劍祇同悲。回首亂羣后。傷心隔九疑。鳥耘千畝徧。龍負一舟移。斷草山阿井。空亭嶽麓碑。芒芒懷舊蹟。肅肅禮荒祠。黃屋神如在。桐棺記有之。筵誰包橘柚。隧或守熊羆。共訝梅梁失。因探窆石遺。竭來憑弔處。拜手獨陳辭。

長律四章。議論正大。格律工整。俱能步武少陵。

岳忠武王墓

宋室偏安日。眞忘帝業艱。但愁諸將在。不計兩宮還。鄂國英雄士。淮陰伯仲間。策名先部曲。薄伐自江關。赤縣期全復。黃河渡幾灣。龍庭生馬角。雪窖視刀鐮。城下盟何急。師中詔已頒。盈庭尊獄吏。囊木謝朝班。相狡妻兼煽。和成主愈孱。長城隳道濟。大勇喪成讎。舊井銀瓶失。高墳石虎閒。銘功存版碣。鑄像列頑姦。曠世心猶感。經過淚獨潸。傳聞從父老。流恨滿湖山。朔騎頻來牧。南枝尙可攀。墓門人寂寞。江樹鳥緜蠻。宿草經時綠。秋花滿目斑。依然潭水月。終古照潺湲。生馬角。視刀鐮。見二帝歸國有日。而甘爲城下之盟。不計兩宮還。見殺戮忠臣。固由秦檜。而主之者實高宗也。春秋之意。必誅首罪。信夫。

謁劉文成公祠

草昧經綸日。英雄戰鬪年。真人淮泗起。王氣斗牛躔。命世生良弼。卑栖役大賢。一官曾簿尉。千里正戈鋌。記室依袁紹。飛書謝魯連。神鷹思飽掣。威鳳必高騫。漢祖除秦法。周王卜渭畋。廟堂才不易。束帛禮宜先。遂有君臣契。能令帷幄專。南征頻克敵。北伐旋摧堅。王會收三統。軍謀出萬全。河山分帶礪。冠蓋儼神仙。未辟留侯穀。長辭范蠡船。麒麟當日畫。竹帛後時編。一自邱陵改。重愁歲月遷。隆中猶故宅。綿上少封田。舊俗還祠廟。清歌入管絃。黃金遺像蝕。鐵券幾人傳。古瓦甍甍落。荒庭檜柏圓。蛛絲虛寢腎。鳥跡斷碑眠。想像陰符策。沉吟寶劍篇。前賢餘事業。後死尙屯邅。去去辭枌梓。栖栖到海壖。空林多雨雪。哀角滿山川。玉帳無遺術。蒼生久倒懸。憑留一黃石。相待穀城邊。起與當代麒麟閣。何人第一功。同一氣概。必如此纒。能鎮壓通體。中間敘完題意。撫躬自傷。隱然有圯下。



自命之想

于忠肅公祠

昔在狼山下。軍書犯近坳。六師輕朔漠。萬騎失雷霆。土木塵常滿。龍蛇歲不寧。豆田沙浩浩。黍谷路冥冥。濟世須元老。長材總四溟。從容持國計。指顧悉兵形。瑕呂安羣議。劉琨表外廷。嗣王仍歷數。高廟有神靈。既罷金縢款。無煩白馬刑。北轅旋翠輦。南內啓朱扃。命已甘刀鑊。功真溢鼎銘。春秋隆代祀。俎豆肅維馨。一自輶車至。難期堠火停。遺墟愁戰伐。大樹日飄零。碧草空祠長。黃鸝過客聽。霜鐘沉曉月。風牖繞明星。卞壺誰修墓。巫陽數降庭。讖還思雨帝。碑或墮江亭。遠水澄湖碧。流雲暗壑青。千年華表鶴。哀怨此重經。

四章末路俱敘自己憑用。各能用意略不犯複。

卷十二

潘

未字次耕。江南吳江人。康熙己未。以布衣召試博學鴻詞。官翰林院檢討。著有遂初堂集。○稼

知錄及詩文集。又以未及刻肇域志為憾。蓋此書關天下利病。卷帙繁富。非大有力不能刻也。此

誼猶近古人。○詩筆直達所見。浩氣空行韻語。可作古文讀。而登臨懷古諸作。尤為光燄騰上。一

時名流幾罕與儷者。

卦山

卦山交山陽。孤峰獨崔嵬。下眺一氣中。稜稜露巖崖。森如六爻列。錯若諸卦排。我來正雪霽。寒空無纖埃。羣峯皎練明。萬柏攢疑苔。遠見介山巔。干霄白皚皚。近矚交城城。微茫辨樓臺。文峪下西溪。汾川自往來。連山走黃河。屏展卻抱回。誰言萬家縣。形勢亦壯哉。守險在良牧。濟世須雄才。利鐵錮窮巖。健馬嘶風哀。劉淵亦可人。石匣爲之開。蒼天不可問。浩歌舒遠懷。偶然登臨。與懷守險。安得僅以詞人目之。

### 天都峯

黃山百千峯。茲何獨稱長。大巧不炫奇。尊嚴故無兩。中天開帝廷。萬靈此朝饗。肅穆垂冕旒。森嚴排甲仗。梯空一萬重。拔地九千丈。煙雲升及腰。日月行在掌。羣山自言尊。對之失氣象。譬如見真人。羣雄自頭搶。蒼蒼百里外。孤標已瞻仰。卽之如可親。攀之莫能上。石闕望峨峨。天橋矚朗朗。載肉無由升。徒然結遐想。天都爲羣峯之尊。以其最高。日直上無欹斜也。予嘗有句云。四面總換形。不改性。正直無心。拔衆上。衆自莫敢敵。自謂得山之性情。讀先生詩。更覺籠罩一切。

### 碧雲寺

自注。寺旁有魏忠賢祠。甚宏壯。

香臺俯鴻濛。羣山四環衛。龍宮豁然開。樓觀湧空際。丹霞夾飛甍。珠樹蔭密砌。崢嶸神鬼工。照耀金碧氣。壯觀何能爾。創此自中貴。坡陀山頭塚。規模更閎麗。黃腸隧道封。玉魚便房閉。丹青儼祠宇。特敕蒙葬祭。豐碑刻鴻文。歷歷元宰製。行人不能讀。識者發歎憶。中官古來有。掃除職微細。念其犬馬勤。帷蓋斯可瘞。奈何濫恩私。王章褻奴隸。官號借台司。封土同帶礪。所以蓄神姦。毒燄流海澨。然臍未快心。誰令此埋齒。

蒼涼金粟堆。寢殿非昔制。茲何尙歸然。石門鎖松桂。誰能手斧柯。千春掃氛翳。

韶州至清遠道中雜詩

滇陽峽百里。兩崖狀如門。江流日漱齧。崩剝露危根。空中頤雷削。骨立龍虎蹲。孤舟出其下。凜然悽心魂。石戴萬篙眼。壁縈千絳痕。溯流行良難。下峽如星奔。灘急波易駛。林深景常昏。奇峰遞迎送。百千互卑尊。或肖天榜挂。或疑鐵騎屯。心賞不暇接。目眩難具論。古來投荒人。鬱結聲長吞。壯觀有如此。何必非君恩。  
末爲投荒者慰。即九死南荒吾不恨意。

韓蘄王墓碑歌

靈巖山前塚纍纍。荒煙野蔓不足悲。巨石峻嶒戛松際。旁人云是韓王碑。韓王蛻去五百載。當年英名至今在。彎弓夜月射奔鯨。拔劍寒沙清瀚海。一朝雄姿爲枯骨。麒麟高塚營山窟。黃腸便房天府出。守冢萬家拜百笏。歲久但見蒿與藜。豺狼入穴狐兔啼。惟留一片石。千古靈巖西。靈巖峯高入雲霓。韓王助名與之齊。惟王助名震千古。手奠坤維揭天柱。麾日之戈射潮弩。半壁江山留宋土。可憐後此竟何人。忍使銅仙淚如雨。梅花落盡梨花開。遊人絡繹靈巖來。但上琴臺尋響屨。何人山麓披蒿萊。碑高三丈字如掌。帝製鴻文盛褒獎。縱使碑刳墓盡平。蓋世功名在天壤。君不見錢塘飲馬江不流。鳳山宮闕爲荒邱。張王秦相墓何在。六陵蕭颯冬青愁。  
縱使碑刳墓盡平。二語摸之有稜。便覺平調皆振。

贈杜于皇

男兒無家復無國。六合飄然一孤客。客行落落雲出岑。其去無跡來無心。山水佳處便淹泊。偶然相逢不可尋。黃岡豪士世無偶。胸吞雲夢者八九。神鷹鍛翻不能飛。丹霄碧海將安歸。三十年來泛江舸。大塊無塵能著我。商山須眉大澤裘。遊戲人間無不可。往年訪友揚州城。州人喧呼看歲星。如雲冠蓋趨門庭。先生酣眠醉不醒。醒來洗眼焦山青。金焦如螺意不快。一葉翩然下江瀨。青邱方壺不可期。白龍赤鯉遙相待。我亦汗漫之遐方。束髮結交多老蒼。惟翁差池未識面。江雲關樹空相望。錫山葉蠡湖朗。散步禪房見邛杖。怪來避地已經年。笑我勞勞逐塵鞅。昆明劫火方洞然。老鰲抃山波接天。土偶桃人莫相笑。久客會有還山年。先生無事但宴眠。大瓢滿酌清冷泉。君不見君家杜陵喪家者。茅屋秋風淚盈把。揮淚高歌洗兵馬。是畸人是豪士是詩老而歸於遺民奔放頓挫有千金戰馬注波驚濤之奇一結尤見神勇。

華峯頂

崑崙之脈從天來。散作嶽鎮千瓊瑰。帝怒東南勢傾削。特聳一柱名天台。天台環周五百里。金翅擘翼龍分胎。峯巒一一插霄漢。澗瀑處處奔虹雷。華頂最高透天頂。萬八千丈青崔嵬。乘雲御風或可上。我忽到之亦神哉。遊氛豁盡日當午。洞視八表無纖埃。南溟東海白一杯。括蒼雁宕青數堆。千峯簇簇蓮花開。中峯端嚴一蓮臺。華藏世界宛如此。醯雞不識良可哀。渺茫誇閬苑。荒忽求蓬萊。何如天台靈異在人境。劫

火不到無三災。神泉自流琪樹不栽。彌山藥草滿谷丹材。應真隱顯混樵牧。飛仙遊戲同嬰孩。羲之乏靈骨。太白非仙才。已住神山卻歸去。空餘石屋寒蒼苔。我已夢覺牆根槐。安能更逐魚龍脍。徑須習定棲峯頂。飽看滄桑三百回。文章最重起手。如張說作姚崇碑。起手八柱擎天數語也。題得崑崙之脈。從天來二語。下便縱橫說去。無不中節。中一段。眺望山海狀出天台如蓮華之形。而華頂又如蓮臺。真是與酣落筆。予嘗登其頂。愈知此詩之佳。

荔支盆

荔支盆來三山。枝頭壅土生根難。荔支盆上建浦。衝波峻灘挽舟苦。短篷愁日復愁雨。荔支盆過仙霞。千夫肩荷百吏遮。汗流骨出愁鞭撻。從此浮江湖河去。嚴程晝夜不停住。焦枯顛頓十存五。寥落猩紅綴孤樹。蓬萊宮中掩露膏。冰丸入口流瓊漿。寧知一丸數金值。百旬勞擾千村忙。大臣事君自有禮。忠孝不在養口體。爭新作俑彼何人。釋騷煩費無窮已。不貴異物惟吾皇。勤求民隱恆如傷。誰能上書罷貢獻。令人千載思唐羌。東坡洛陽相公忠孝家。可憐亦進姚黃花。猶屬婉諷。此正襟而談。歸美君上。而望臣下之陳書。尤爲得體。

金山

萬古標形勝。中江一柱尊。水分天作塹。地坼海爲門。鐘磬來波面。蛟龍聚塔根。蘄王血戰處。墜馬有驚魂。

張祜金山詩。一結不振極矣。此真神完氣足。

峽江

峽江山對鎖。不覺有江來。船向羊腸出。城臨虎穴開。燒畬穿嶺急。水碓撥雲回。客鬢先秋白。何煩一葉催。  
一起。峽中形勢寫盡。此下直如破竹。

### 贈錢飲光

蹀血生還萬里天。土牀樹屋尚依然。箋餘易象研朱細。踏徧雲山著屐便。久矣泥塗書亥字。淒其衰白感丁年。誰憐靈武麻鞋叟。老向空山拜杜鵑。  
錢先生一生學問志節悉爲傳出。亥字丁年脫胎飛癩而工力亦可相敵。

### 經姜給諫墓作

青峰一曲抱愁雲。中有先朝諫議墳。往日兒童識鄒浩。到今野老哭劉蕢。山頭樹屋稱殘卒。地下戎衣見故君。埋骨便爲乾淨土。豐碑華表漫紛紛。  
給諫臨沒曰。我奉先帝命遣戍來此。殮我當以戎衣。其子從之。

### 二姜先生祠

自注。給諫塚。行人塚。

軾轍齊名世早知。百年忠義繫人思。忠傳折檻排奸日。義想銜刀伏闕時。兩地青燐埋宿草。一山紅樹妥新祠。吳門野老多相識。雪涕爭看幼婦碑。

### 白雪樓

百尺高眠四海空。滄溟文玷夙稱雄。生平婁水墳簾應。死耐虞山玉石攻。盛世才華容傲睨。達人官爵謝牢籠。清嚴標格依稀在。華鵲蒼寒落水中。  
四語耐攻而不盡破也。猶劉隨州五言長城秦系攻之意。若二袁鍾譚竟不耐攻矣。於此見下字之妙。

登嵩山絕頂

不辭觸熱上嵩巔。欲遣雙眸盡八埏。翠嶺千重包楚塞。黃河一線下秦川。長安遠隔浮雲外。鄉國微分匹練邊。清嘯一聲鸞鶴應。隨風飄去落何天。聲徹層霄高於王李登岱諸作。

吳聖玉歸自遼左志喜

夢想流人紫塞邊。每依雁候祝南旋。不圖真有珠還日。始信非無羝乳年。人痛嵇康罹橫夭。天哀李燮予生全。鄉音無改容顏肖。破涕應知慰九泉。數行墨牒隻身歸。歎息家園事總非。門巷凋殘餘燕壘。親朋零落半鶉衣。難尋手澤書千卷。且拜荒阡樹十圍。野老村童爭擁看。烏頭能白世間稀。

浴日亭

孤亭臨望盡重溟。天水相摩不斷青。日躍半洋皆紫電。潮來大地一浮萍。鵬遊世界原空闊。蜃吐樓臺自杳冥。何必褰裳慕蓬島。當知此地卽珠庭。

羊城雜詠

錄一

歷山尙住宋遺民。文陸當年事苦辛。窮海不春猶正朔。孤航無主自君臣。忠魂鬱作潮頭怒。浩氣蒸成蜃闕新。異代流風多感激。草間時有納肝人。甲文陸而井及明末諸忠。揮字結響。擲地當作金石聲。

廣武

蓋世英雄項與劉。曹姦馬謖實堪羞。阮生一掬西風淚。不為前朝楚漢流。嗣宗含蘊意為作者道出。知人論世。正須如此。

天柱峰僧餉黃獨

黃獨分來瓦鈔邊。香於紫芋大於拳。笑他懶瓚渾閑事。誤卻長源三十年。借煨芋事比例。巧於立言。詩人之心。比似春蠶作繭。

徐

鈞字電發。江南吳江人。康熙己未。召試博學鴻詞。授翰林院檢討。著有南州草堂詩。○虹亭先才。而虹亭之見重於端毅。實有使之心。折者也。生平墳詞極工。晚歲成本事詩。遠地購求。比於洛陽紙貴。

送方爾止還金陵

爾從警水來。片帆不肯住。乘風夜過洞庭西。蘆花瑟瑟滿寒渚。渚清沙白今送君。朔風旅雁高入雲。官司捉船船戶避。津吏前頭不敢行。問君歸思一何切。笑指征衣已百結。旅館朝來花正繁。客愁今去柳堪折。雙槳隨君送君去。莫忘江城離別處。遙指金陵宮闕旁。蔣山夜火烏棲樹。住意盡而不盡。

落花篇

洛陽城外花如綺。洛陽城內歌鐘起。一夜東風吹滿枝。片片花飛逐江水。江水春流暮轉深。江千日暖生紫蘋。參差碧樹波光裏。蕩漾紅潮愁殺人。憶昔郊原全盛日。芳菲千里春如織。香車翠幃掩紅妝。寶勒金羈跨紫陌。陌上遊絲爭繞樹。嬌鶯乳燕紛相度。桃李蹊成白日斜。棠梨院鎖黃昏暮。誰料繁華類轉蓬。紛紛



紛墮紫又飄紅。杜鵑血染臙脂裏。蛺蝶魂迷芳草中。歎息年光空自好。玉顏零落憑誰保。花謝花開無盡期。委地飄階不須掃。別有佳人斂翠眉。翩翩衫袖淚雙垂。明年依舊花爭發。開落庭前知爲誰。春花開謝而芳華一去不復返矣。比唐人意轉覺婉約可思。

晚發京口

湖洄泱泱忽聞雞。風飽江帆葉葉齊。瓜步曉鐘寒雨歇。楚天濃樹溼煙迷。已從擊楫悲荒壘。更想沉舟聽鼓聲。回首甕城山色遠。驚濤猶在海門西。

古意

歡從京口來。儂向秦淮住。一夜暮潮生。分離不知處。與君家住何處一章同一聲口。

十八灘

萬壑千峯送客舟。槎牙怪石水交流。嶺猿莫更啼深樹。只聽灘聲已白頭。極寫灘字之可畏。中夾入嶺猿一語。則險惡愈出。此加一倍法也。

李澄中

字渭清。山東諸城人。康熙己未召試。博學鴻詞。官至侍讀。著有漁村集。

題丁野鶴先生魚龍卷

何人懷此跋浪情。下筆快寫滄洲鯨。世間萬事難自料。爲龍爲螭須臾成。荇藻交憂細如縷。小魚瑣屑何

足數中流。忽斷煙波開。乾坤冥冥雜風雨。此時海裂天吳愁。滄江倒立崑崙浮。中有赤鯉閃光彩。金鱗逆水聲。颼颼彷彿疑聽洪濤風。細觀又似蓬萊宮。星海下注積石遠。黃河上溯龍門通。鱣鮪昂藏不知量。鼓鬣搖鬣亦爭上。可憐魚服苦束縛。撥刺泥沙色惆悵。赤鯉力猛陡一穿。雙角突出雷火纏。半身未化露魚尾。半身已入天門煙。嗚呼龍變不可測。畫工具有神明力。雲行雨施徧八極。涸鮒蹄涔淚沾臆。通體精采。一結如讀感士不遇賦。

晚抵襄陽

橋上一鳥啼。燈明兩岸齊。星垂古峴口。月照大江西。地險分南北。時平罷鼓鼙。兒童清夜裏。還唱白銅鞮。

登太華寺大悲閣望滇池作

香臺高擁萬山平。無數煙雲繞澗生。杯底嵐光浮太華。簷前秋色挂昆明。空餘戰壘悲戎馬。似有霜風動石鯨。我醉欲留歸路晚。滿湖鷗鷺擢歌聲。三語是登。四語是望。

沅州山中聞鷓鴣

空山雨氣散新秋。匹馬王程不少留。怪爾聲聲行不得。七千里外過沅州。

徐嘉炎

字勝力。浙江嘉興人。康熙己未召試博學鴻詞。官至內閣學士。著有抱經齋集。

丁巳新秋讌集李客部園亭送李南枝分符之武林

水精簾卷夜光浮。蓮葉田田梧葉愁。燕市離筵南浦月。吳山歸路驛亭秋。客星已見雙辭闕。鄉夢還驚獨倚樓。醉踏軒轅臺畔草。丁香可解結綢繆。

陸

柔字義山浙江平湖人康熙己未召試博學鴻詞官至內閣學士著有雅坪集

自豐城抵萬安江水大漲

春江灌潦水百堵沒滄洲。釜已遊魚鼈。涯難辨馬牛。櫓聲來木杪。帆影度城樓。雙劍沉何處。清宵起暮愁。

杜詩寫江漲未曾及此

邱象隨字季貞江南山陽人康熙己未召試博學鴻詞官洗馬

贈程穆倩

病後相逢邗水涯。歲寒雪壓客廬斜。縱然淡盡人間事。又寫青山過酒家。以畫易酒韻事也得上句一觀則倍形其韻矣詩須如此用筆

倪粲字闇公江南江寧人康熙己未召試博學鴻詞官翰林院檢討

送喬文衣之劍州

渝峽遠通涪萬水。嘉陵險接閬中山。分符刺史初行部。舊語參軍正解蠻。幢布芋田徵稅薄。青松白鶴訟庭閒。他年更奏殊方績。應在文翁伯仲間。

袁佑

字杜少直隸東明人康熙己未召試博學鴻詞官翰林院編修

月夜遊秋水橋岸

藕花短短葦花齊。漁艇秋煙草閣西。出寺溪雲隨意遠。過橋山月趁人低。與誰相對惟孤鶴。何處尋僧信杖藜。砧杵不聞千戶靜。蕭蕭城闕夜烏啼。

玉階怨

玉階無人行。徘徊玉階側。皎皎明月輝。照見妾顏色。未嘗言怨。令人言外思之。

高

詠字阮懷。江南宣城人。康熙己未。召試博學鴻詞。官翰林院檢討。著有遺山堂詩。

臨江中秋同諸公慧力寺泛舟回遂集愚樓玩月分體各賦

丁丁蓮漏秋宵短。銀屏華燭明高館。瑤席清尊坐不遲。芳洲畫楫歸何緩。入窗花霧香蒼濛。珠簾四角垂玲瓏。桂花扶疎玉除冷。菡萏披折金塘空。千家羅幕蘭燈淡。明月正過寒江東。羣山寂寂鎖蒼翠。碧漢金波光瀉地。揮杯夜醉使君樓。題詩晚出城南寺。美人接座氣堂堂。騏驎腰褭爭騰驤。雄劍荆鐘爍紫電。北斗挂戶森長芒。二十五聲何太早。胡牀坐嘯重傾倒。朱棟華棖倚半空。鳳絲雁柱愁清曉。霓裳仙子歸海宮。沾衣涼露廻天風。桃笙醉臥不知處。東方疊浪朝霞紅。結處得東方漸高。柰樂何意。

宿青溪

青溪獨宿處。遠火出江波。醒酒思殘夢。歸漁聞夜歌。月斜人語定。舟曉棹聲多。九子煙霄外。勞生只暫過。

三四傳出孤舟夜宿之神。

遊青原山寺

青原山半寺。積雨長苔痕。路轉遙聞水。峯回直到門。雲林清聲落。巖屋影堂存。欲問無生偈。孤雲起石根。

過謝臯羽墓

許劍曾傳此地遊。豐碑遺墓尙荒邱。龍髯墮海三宮淚。馬鬣封山萬古愁。處士宅邊寒雨夜。嚴陵灘下暮江流。當年慟哭聲如在。散作西臺檜柏秋。西臺慟哭爲文丞相也。故有第三句墓在釣臺旁。近方干故宅。故頸聯及之。

歸舟作

江上羣山擁髻螺。楚王臺畔榜人歌。白蘋風裏暮愁重。紅藕香中秋夢多。漁火夜殘收別浦。水禽月出叫寒莎。頻年躑躅孤舟客。回首平生空逝波。

馮 昂字方寅。江南長洲人。康熙己未。召試博學鴻詞。官翰林院檢討。

沈莊樗幽居

楊柳塘東更向東。綠蒲紅蓼各成叢。三家村口少人過。獨木橋邊有路通。老屋短垣披薜荔。主人長日注

魚蟲。客來彷彿桃源內。雞黍爲歡話古風。此太史贈先大夫者。寫景屬辭。如讀缶鳴集。中長句詩成四十年矣。每一披讀。情事宛然。

王 吳字惟夏。江南太倉人。康熙己未。召試博學鴻詞。以年老授官正字。回籍著有碩園集。碩園係鳳洲司寇之後。斐東十子中尤錚錚有聲。

日本雙刀歌爲子存叔賦

鷗鷯之膏雙干將。燈下拂拭生神光。青蛇赤蛟欲隱躍。忽令四座驚寒霜。雀環色黃犀靶黑。積鐵傳來海東國。風胡歐冶知何人。卻帶千年戰場色。婁城斗氣非模糊。雄者不飛雌不呼。牀頭夜夜肯相守。吾家大阮頻摩挲。男兒意氣自奇突。試脫儒衫舞回鶻。莫借他人去報仇。尊前且伴封侯骨。

鄧漢儀

字孝威。江南泰州人。康熙己未。召試博學鴻詞。以年老。授官正字。回籍。○孝威與國初諸前哲遊。洽聞廣見。所選詩觀共四集。雖未脫酬應。然亦足備後人採擇。嘗度大庾嶺。有句云。人

馬盤空細。煙嵐返照。濃。新城王公賞之。

平淮西碑

雪夜功成罷鼓鼙。昌黎碑版照淮西。文章何意開讒妒。婦女偏能混品題。易代磨崖爭日月。當年奮筆掃鯨鯢。只今蒼碣斜陽外。頻見遊人駐馬蹄。  
李愬妻唐安公主。謂碑文歸功裴度。訴于帝。命仆其碑。詔段文舉。毀碑。仍立韓碑。千古快事。

枕煙亭聽白三琵琶

寒日林園尊酒陳。琵琶急響似西秦。赤眉銅馬千秋恨。譜入鶻絃最感人。北極諸陵黯落暉。南朝流水照青衣。都將寫入霓裳裏。彈向空園雪亂飛。  
自注。時正雨雪。

白狼山下白三郎。酒後偏能說戰場。颯颯悲風飄瓦礫。座間人似到昆陽。

天寶傳頭竟屬誰。四條絃子斷腸時。蠻靴窄袖當壇女。今日公然識段師。盜賊縱橫滄桑變易俱於琵琶中彈出與落花時逢李龜年相

題息夫人廟

楚宮慵掃黛眉新。只自無言對暮春。千古艱難惟一死。傷心豈獨息夫人。其用意處須於言外領取

孫枝蔚字豹人。陝西三原人。康熙己未。召試博學鴻詞。以年老授官正字。回籍著有澗堂集。澗堂詩辭氣近麤。然自有真意。稱其人品之高。近有秦人胸無典籍。好爲大言。至云作詩先洗去

李杜俗調庸妄如此。而人羣然信之。云遠勝豹人。不可解也。錄澗堂詩附記於此。

覽古

房琯隱陸渾。矯矯負令譽。天下爲己任。高談頗有餘。一朝將重兵。車戰竟何如。所恃楫與秩。豈知皆豎儒。哀哉四萬人。流血成溝渠。名士苦無用。萬古成歎歔。有愧諸葛公。不輕出茅廬。

同友陪吳園次登多景樓時園次赴湖州任

出城送客共躋攀。萬里煙雲杳靄間。天下江山如此少。古來冠蓋幾人閑。潮頭日午添帆影。樓角風微散酒顏。五馬臨行重回首。知君魚鳥最相關。

遊焦山

風起中流浪打船。秦人失色海雲邊。也知賦命原窮薄。尙欲西歸太華眠。翻用東坡性命窮薄。輕江潭句各有其妙。

盛 楓字丹山浙江秀水人康熙辛酉舉人官安吉州學正

盆花

木性本條達。山翁乃多事。三春截附枝。屈作迴蟠勢。蜿蜒蛟龍形。扶疎巖壑意。小萼試嫣紅。清陰播蒼翠。攜出白雲來。朱門特珍異。售之以兼金。閑庭巧位置。疊石增磊砢。鋪苔蔚鱗次。嘉招來上客。讌賞共嬉戲。詎知芟幹薄。未久倏憔悴。始信矯揉力。託根非其地。供人耳目玩。終慚棟梁器。芸生各因依。長養視所寄。賦質諒亦齊。豈乏干霄志。遭逢既錯誤。培覆從其類。試看千尋松。直幹無柔媚。風折求媚豈棟梁之材乎。通幅比體使人言外思之。

白洋河阻風

大河流日夜。噫氣北風號。霧影霾魚市。寒威縮馬毛。客程千里倦。酒價一時高。欲作懵騰計。終宵聒怒濤。刻寫風寒不留餘力。

黔陽

雲壓萬峯低。秋江晚樹迷。籃輿凌木杪。驛路挂城西。有客停孤館。無爲下五溪。蕭蕭樓外雨。愁絕聽寒雞。

陳王猷字良可廣東海陽人康熙辛酉舉人官連州學正

由方丈右轉上海山門自注海山門丹霞山最高處緣鐵索乃可上



飛樓倚嶽岑。環迴覺路塞。四望窮躋攀。斗絕石痕闕。窺天剛半線。拔地乃千尺。鬼斧鑿何年。儼有巨靈跣。鷗鷺息羽翰。猿獾罕蹤跡。當茲斂形神。直上緩登陟。鐵絙右鉤梯。手腕參足力。左顧窅然深。澗洞曠以黑。納趾踵外垂。高尻面內迫。神人御風行。中道尚棲息。自注。崖中有御風亭。況在塵世間。寧有次仲翮。我幸及其巔。置身高岑峇。出險憑虛無。茫然蕩心魄。蒼茫似杜。鑿刻近韓。

趙執信

字伸符。山東益都人。康熙己未進士。官左春坊左贊善。○贊善以謙飲觀劇去官。時年尙未壯也。高才被放。縱情於酒。酣嬉淋漓。嫚罵四座。借以發其抑鬱不平之概。君子可以諒其志焉。○生平服虞山馮氏定遠稱私淑弟子。而於漁洋王氏著談龍錄以貶之。然責人斯無難。未必服漁洋之心也。詩品奔放有餘。不取蘊釀。茲所錄者。半屬觀海集中之作。餘略見云。

棄婦詞

兩姓無端合。亦復無故分。昔時鴛鴦翼。今日東西雲。浮雲本隨風。妾心自不同。君心劇無定。見棄如枯蓬。出門拜姑嫜。十走一廻顧。心傷雙履跡。一一來時路。留妾明月珠。新人爲耳璫。不恨奪妍寵。猶得依君旁。寶鏡守故奩。上有君家塵。持將不忍拂。舊意託相親。此生一以畢。中懷何日宣。願得金光草。與君駐長年。

彭蠡湖

顛氣中流轉。煙光四週遭。層波碧離離。秋色寒滔滔。冷然乘風遊。託身任毫毛。仰觀天垂象。旁見林露梢。山移舟向背。目蕩心飄搖。北望千帆走。燦若組紉交。五老雲外笑。人世心魂勞。明當接匡君。舉手爲我招。山移舟向背。五字足抵一篇遊記。覺帆隨湘轉。望衡九面。語猶繁也。

泛海言懷

忽登萬斛舟。如躡長鯨背。寄身入無涯。曠覽乾坤態。潮動風色逾。棹急雲光碎。潛通元氣遊。迥出人境外。千山相簸蕩。六合欲橫潰。頓覺喪我吾。何知齊小大。幼安漂泊久。謝傅襟情在。誰發小海謳。迴颿引雄概。  
潛通元氣遊十字。應補木元虛之缺。

無風沂江崇朝十里忽得午風快然成詠

欲知舟上漉。譬若魚升木。因循日高春。跌宕水一曲。欹岸黃葉林。時露參差屋。遙數天末山。苦戀篷際目。何來快哉風。徑爲鼓帆腹。有如絕塵馬。或是避弦鹿。奔雲亂鵝鶴。碎浪喧琴筑。列壑爭送迎。顧楫不暇矚。榜人嘯閑逸。余亦謝拘束。通塞自有時。結念毋欲速。  
主意在末二句。能息人躁進之心。

行十八灘中

灘行日百轉。轉轉山四圍。寒流中屈曲。鬱怒不自持。秋凜肅殺氣。陸發龍蛇機。迴風地底來。雹雨皆倒飛。亂石勢騰攫。獰惡各異姿。似噴舟船逼。列陣前相追。篙師工避就。色授頤指揮。蓄力爭毫髮。險途生坦夷。遊子閱奔峭。驚定翻耽奇。秋雲搖水壁。杉木森下窺。弄波情無極。棹月願猶違。夕陽駐西嶺。爲我延清輝。  
極險後寫出清夷景象。

平度州道中望東北諸山

秋風吹倦客。縹緲凌紫霞。赤松仙人要我。去爲駕白鹿青龍車。羽輪飄飛不自制。始計已失齊琅邪。大勞小勞遠相待。雲外如鳥遭籠笈。明霞碧落杳夢寐。玉女有爪羞搔爬。北行度膠水。惟見塵與沙。晴嵐百里豁心目。高望一點青於鴉。衆山肩隨出。戢戢木末爭槎枒。天柱孤標倚蕭爽。下笑兩髻魯始髻。東萊秦岱列首屈。不敢加。譬人名旣成。無事相矜誇。大澤東來獨雄傑。森然列仗排高牙。雲峯飛瀑落千尺。煙光蜃氣無由遮。臺閣嵯峨布空曲。浮金炫碧生谿笳。我今矯首意恟怳。況於抗策窮幽遐。人生能幾何。引領白日斜。海山有約易錯過。此中便可終來家。形容東萊秦岱累幅難盡。此以撇爲點。工於避就。

人日韓江歸興

春寒晴壓空江水。山翠雲光蕩船尾。篙師搥鼓作迴颿。萬里還家從此始。人日他鄉人別離。郊原新綠已參差。遙憐沙渚多陽雁。肯向東風更退飛。

中秋與南村泛舟石湖望月

王郎與我能無愁。客中放棹尋清秋。清秋了知在何許。且遠城市辭歌謳。胥江水洗天宇淨。片帆輕駛如星流。橫塘西去見山影。蒼翠豁露霜煙收。楞伽靈巖兩迎揖。此中安得無夷猶。湖光一曲縈我舟。與子呼酒相勸酬。以湖爲酒恣拍浮。須臾湖月忽晃漾。照映天上白玉樓。鬚眉蕭颯風颼颼。飄然疑墜海外洲。卻視人世真蜉蝣。我已一身隨落葉。子亦一官成贅疣。不見吳越俱荒邱。魚城酒城何處求。伍胥種蠶同浮

瀕惟有石湖湖上月。曾照石湖居士遊。西施溪畔餘溫柔。塵中微笑寒花羞。子旣醉矣我未休。迴颿撓急不可留。夙昔中秋有此不。令我卻憶西湖頭。一湧而出。服其氣盛。

中秋夜與涇陽劉西谷編修吳山對月

東見千里江。西見十里湖。寒光歛合離。蕩此秋月孤。吳山秀接天。月出當其前。登高莽四顧。清輝滿人間。遠心忽飛揚。南北同一圓。我乘白黿越滄海。君亦赤鯉辭秦川。憶昔燕市別。九十度盈缺。寧知來此地。復共今夜月。雄城百萬家。歌吹方闐咽。邈然山顛客。一笑兩幽絕。明日扁舟江上風。思君獨在湖山中。

赴登州留別康海

微雨牽行色。離觴且對君。預愁見何日。不惜手輕分。遠海高於岸。空煙聚作雲。來朝倚仙閣。吟望背斜曛。五六境奇語奇。空烟五字尤入微妙。

寄朱竹垞檢討村居

江村水樹澹秋煙。不見幽人思悄然。往接簪裾三殿側。近聯蹤跡五湖前。老爲鶯脰漁翁長。閑上鷗夷估客船。各有彈文留日下。他時誰作舊聞傳。自注。竹垞昔著日下舊聞。○七言律少首尾完善者。傳其佳句。故寧取和平之作。

邨舍

亂峰重疊水橫斜。村舍依稀在若耶。垂老漸能分菽麥。全家合得住煙霞。扶衰地有君臣藥。勸酒庭餘姊妹花。雨玩山姿晴對月。莫辭閒澹送生涯。此寓居吳中南園時作。

寄洪昉思

垂堂高坐本難安。身外鴻毛擲一官。獨抱焦桐俯流水。哀音還爲董庭蘭。昉思成長生殿傳奇。於國卹時。事後以詩寄之。但比之董庭蘭。未免視爲門下士也。

詠江岸拒霜花

霜裏風翻裊裊枝。可憐閒淡與霜宜。江妃無語空含睇。妬殺天寒獨倚時。

李孚青字丹壑。江南合肥人。文定公天馥子。康熙己未進士。官翰林院編修。著有野香亭集。○丹壑十六歲館選人以黑頭公目之。惜未四十辭世。故流傳詩篇絕少。

雍邱晚行

亭亭落日馬蹄忙。兩岸荆榛過外黃。嵐氣漸逢迷草木。煙村又見下牛羊。鄭當時去誰留驛。范史雲貧尙有鄉。惆悵昔賢遺蹟杳。青山無盡路茫茫。

秋日自遣

金風蕭瑟滿懷春。籬豆花開逐番新。舊業已荒猶嗜酒。秋陽雖熱不侵人。鄭家婢妾如師弟。梁氏夫妻似主賓。我是海邊息機者。任他門外急蹄輪。家庭之樂。無踰於此。陸劍南每有此種名句。

稻孫樓

拜石人何在。孤城氣逼秋。郊原禾黍盡。愁上稻孫樓。此米元章樓也。無禾黍。歲偏上稻孫樓。觸目生愁矣。

早秋送宋又宜由太原歸里

酒場吟地五年同。忽餞青門往事空。三疊歌殘人不見。秋風吹淚古雲中。自是唐人神韻。

王材任。字子重。湖廣黃岡人。康熙己未進士。官僉都御史。著有西澗詩鈔。

和李梅谷選君贈別韻

去歲乘輶出井陘。今朝策蹇返江寧。鬚落巴雪添新白。鬢點吳霜失舊青。旅夢都迷南北路。歸程細數短長亭。從今不復看除目。手把神農耒耜經。

魯港夜泊

沙岸維舟近柳條。坐看淺水忽生潮。江湖夜靜逾空闊。星斗風來欲動搖。月下望鄉雙淚落。天涯多病一身遙。雞豚社飲應難與。獨倚船窗盡酒瓢。星隨平野闊。月湧大江流。寫盡江夜景象。此故工於脫胎。而星斗風搖。則又杜陵未道者。

追憶梁益舊遊

梁州秋葉落紛紛。沮水西來沔水分。斜去遙知南鄭路。道傍曾拜武侯墳。長藤婉婉纏秦樹。寒雨昏昏濕棧雲。鄰近墓門誰勒石。征西尙有馬將軍。

黃河

黃河萬里來天上。積石龍門道路賒。已是秋風迴瓠子。更憐春雨漲桃花。怒濤高壓千金堰。急溜初回八月槎。三策至今思賈讓。金錢那可委泥沙。

南昌卽事

章江依舊抱城流。楓葉蘆花瑟瑟秋。南浦閒雲迎故客。西山暮雨送孤舟。一千里外新蓬鬢。四十年前舊酒樓。自注。予十五卽有南昌之遊。莫上滕王高閣望。不堪楚尾與吳頭。

沈朝初字洪生。江南長洲人。康熙己未進士。官至翰林院侍講學士。著有不遮山閣詩鈔。

過塘西

蘇隄踏遍上吳航。蘋末風生暮色黃。帆影帶歸湖墅月。衣裾留得芰荷香。采菱船過波紋碎。脫網魚跳水氣涼。行到小橋深柳處。人家煙火似橫塘。三四語頂蘇隄踏遍歸造意。造句在章莊羅隱之間。

春興

歸來安穩臥煙蘿。花信風柔春漸過。滿逕白雲人跡少。一簾紅雨鳥聲多。閒來垂釣常忘餌。病後慵書不換鵝。除卻浮家更無事。辦裝先去買青蓑。垂釣忘餌。書不換鵝。可以想其高品。

收復漢中恭紀

魚貫懸崖鄧艾軍。銜枚一夜度連雲。巴渝從此俱安席。莫待相如諭蜀文。  
司隸章臨市不驚。饒歌聲裏慶昇平。只今蒟醬仍通貢。合挽銀河洗甲兵。

### 卷十三

梅

庚字耦長江南宣城人。康熙辛酉舉人。

同愚山少參維饒孝廉卽席送位白歸皖

倚棹數歸程。親交次第行。獨憐江月苦。偏向別筵明。背郭魚龍氣。先秋蟋蟀鳴。還家仍客路。更傍石頭城。

落梅

背城花塢得春遲。凍雀銜殘尙未知。聞說綠珠殊絕世。我來偏見墜樓時。  
不寫題面專寫題意。自是絕世風神。

彭寧求

字文洽江南長洲人。康熙壬戌。賜進士。第三。人官翰林院侍講。

擬古

靜躁殊軌途。人性安可矯。天旣賦吾拙。何用逐機巧。始進苟不正。晚節何由保。所以達人心。立身忌草草。  
受恩惟恐多。入仕亦戒早。俯仰懷古人。守貞以爲寶。  
此卽瞻庭先生言志之詩。生平進退允符。斯語。年命不永。未展素抱。朝野共惋惜之。

送大兄南還



重到承明半載餘。匆匆襍被返衡廬。營巢每笑逢秋燕。縱壑真同避釣魚。三徑春風侍童冠。一簾花雨潤琴書。故鄉自足林泉趣。最荷君恩許遂初。

金德嘉

字會公。湖廣廣濟人。康熙壬戌進士。第一官翰林院檢討。

得張師石書卻寄

杜門久與故人違。忽有音書到竹扉。過眼物華雙鳥翼。驚心風雨一牛衣。春雲江樹黃泥坂。秋水漁燈赤鼻磯。日暮狂歌當濁酒。不禁西望思依依。

許汝霖

字時菴。浙江海寧人。康熙壬戌進士。官至禮部尙書。著有德星堂集。

贈湯宗伯潛菴先生

豫州天中央。文星木躔角。靈山拔嵩少。德水交伊洛。鬱爲人文區。名賢代有作。煌煌二程子。千載振絕學。後來漸榛蕪。斯道孰開拓。先生出曠世。日朗螢火燭。蘊蓄富淵源。發揮啓橐籥。本根秋實茂。藻采春華落。圖報祗辭章。中懷諒已薄。初登蕊珠榜。遂入石渠閣。朝廷愛人才。破例展猷略。分藩試敷歷。江右專鎖鑰。蔚州老司寇。許子必斟酌。謂公眞清廉。才品並卓犖。薦揚大臣事。彼此兩不忤。適當時右文。設科召宏博。公仍歸禁院。獻賦卑五柞。衡文來兩浙。悉剖荆山璞。還朝品彌高。比岱長羣嶽。東南資重鎮。宵旰切民瘼。簡在撫吳中。民望胥踴躍。吳俗久奢靡。正氣日以剝。大端示鎮靜。積習還淳朴。新圖鄭俠繪。淫祀懷英削。

百事具規模。羣情奉繩約。久困漸以蘇。病夫遇良藥。九重念舊臣。內召藉啓沃。衰衣行有日。里巷驚以愕。畊樵出山野。商旅闐城郭。臥轍肩相摩。攀轅趾交錯。公去國本端。公留一方樂。計大無曲徇。眷隆有深託。天子建文華。東宮開講幄。巖巖師傅席。醇儒孰公若。禮儀視舉止。恭謹愈盤躒。崇階領秩宗。三禮兼典樂。生平稽古力。蒙此雨露渥。憶余舊識公。回首事猶昨。初從魏公坐。相見獲酬酢。公貌謙而和。公懷端且恪。始知賢達意。寧靜必澹泊。儀型儼在茲。小鳥隨鸞鷲。拜獻忝後塵。發蒙仰先覺。近聞媿軀輩。醜正忌磊落。蠅營玉可點。火燎金欲爍。明良既相遇。衆女任謠詠。願公篤忠貞。襟懷等寥廓。他時明農歸。悠然臥巖壑。

送楊自西少司馬終養歸里

銅柱留名紀壯猷。翩然綵服放扁舟。兩朝養望儲黃髮。八座辭榮奉白頭。客久誰無歸里夢。官高偏忘倚門憂。先生愛日情何限。手萁陔蘭進膳羞。官高不能養親。戀職有之。畏懼亦有之。然能哀切陳情。聖朝無不諒其孝思者。王介甫云。古人一日養不以三公換。居官者其言。

送張侍御歸里

孤忠原不問升沉。正氣稜稜自古今。已見黃扉傳諫草。何妨青海解朝簪。一鳴終落憑城膽。三黜寧忘報國心。從此歸田把鋤耒。塗泥終荷主恩深。上章教孝。此章勸忠。立言自應爾爾。

史

夔字胄司。江南溧陽人。康熙壬戌進士。官至詹事府詹事。○宮詹公詩。當時不必有赫赫名。然迄今讀之。意足韻流。無一閑句。閑字得唐賢之三昧者也。臺閣而不涉應酬。山林而不入寒

瘦足規  
詩品

長干曲

妾家長干住。嫁與里中兒。願同比翼鳥。生死恆相隨。豈知別離苦。郎作襄陽賈。昨夜鄰船開。寄書與郎去。大隄花正飛。歌舞醉芳菲。但言估客樂。誰勸不如歸。郎如白石郎。妾似青溪女。花落板橋南。年年長獨處。何日下江湖。相迎皂莢橋。還憂風浪苦。中道滯歸橈。怨而不怒。是爲雅音。

合澗橋步月

門閉亂山高。月出萬象杳。攬衣步巖際。俯視羣木杪。霜黃樹色暗。地白人影小。湖光遠濛濛。巢鶴近了了。猿啼晚更急。虎跡寒覺少。還歸冷泉亭。坐待山月曉。詩思清入骨。

飛來峯

衆壑遞隱現。一峰獨亭亭。怪石煉五色。神功開六丁。秀骨琢天巧。孤根闢地靈。花萼破空翠。劍戟攢高青。氣若逼星斗。勢欲凌滄溟。三竺共偃仰。兩高鬪瓏玲。木生不假土。泉出還無形。倒垂萬菌萑。側走千雷霆。鳥徑不崩芳。鬼工太崢嶸。萬象歸窈窕。百靈入晶熒。洞門闕雨色。石扇羅秋屏。松雪夜了了。陽光晝冥冥。花塢亂楓木。水泉鳴茯苓。自注。山有楓木塢。茯苓泉。伏虎衛佛法。老猿守丹經。我欲問寶訣。歸來煉黃寧。極意刻畫。讀者如置身靈

驚峯  
問

發京邑

靡靡卽長道。承命發華輶。寒風吹易水。涼月渡蘆溝。河梁霽暮色。驅車登古邱。西望九折坂。南顧江河流。江河多風濤。道路阻且修。欲濟川無梁。引領心懷憂。厲揭古有訓。慷慨懷前脩。慎風波。履正軌。言中言外均有之。

陶靖節故里

淵明居柴桑。日與廬山對。云何詩百篇。未嘗道隻字。乃知作詩者。適然與興會。譬如日陶然。飲酒非本意。又如日鼓琴。無絃更高致。想見胸次間。纖塵無障礙。門柳故蕭疎。籬菊亦蕉萃。徘徊墟里煙。慨焉發長喟。詩以興會成。道盡詩人意趣。而以意不在酒意不在琴證之。陶詩須如此讀。陶公人品。須如此觀。

無錫望惠山

九峯天半落。一棹夕陽過。客爲遊山盛。船因載水多。溪邊高士宅。月下榜人歌。好趁樵風便。輕船採芰荷。船因載水多。眼前語卻人不解道。

弘濟寺

戊削寒侵袂。唘訝樹隱門。石頭依法座。佛足上江痕。山淺容舟入。潮平汲水渾。鳩鵲如有意。飛近水邊村。佛足五字。奇警似岑嘉州。

高郵

三十六陂秋。孤城水上浮。魚龍尊窟宅。鴻雁叫汀洲。苔沒高沙館。潮平甲仗樓。片帆何處泊。身世一輕鷗。

淮安

西風下淮泗。潮落見三洲。臺沒空垂釣。詩成獨倚樓。帶刀餘舊俗。聞笛感新秋。寂寞山中桂。誰憐景物幽。  
趙嘏山陽人。故有倚樓聞笛之語。帶刀用淮陰侯傳。

鳳凰山弔宋故宮

天目千年王氣摧。海門三日打潮回。繁華欲盡紅羊換。歌舞方酣白雁來。山鬼夕陽迷古路。銅駝陰雨泣蒼苔。當時不悟興亡理。錯怨西湖是禍胎。  
紅羊換劫年。見張翥詩。白雁來當時童謠。兆伯顏來也。

涿鹿道中望西山

紅塵雨洗淨秋煙。黛色嶙峋夕照前。七月早歸彭蠡鴈。一山橫斷太行天。乘槎興已江湖外。捧日心猶霄漢邊。策馬高原頻悵望。薊門雲樹尙依然。

贈李解元鶚君

領袖詞場二十年。姓名還向榜頭傳。高才不肯居人下。畏路休教占福先。一甕白雲邀月醉。半牀黃葉擁秋眠。把君詩卷巡檐讀。轉覺飛騰讓後賢。  
求占福先。必入畏路。老成勗後生之語。高才者正宜書紳。

橫江詞

落日臨滄觀。西風揚子津。峭帆何處泊。愁殺渡江人。

採蓮曲

撥棹裏湖去。連隄種芰荷。折來與郎嗅。香比外湖多。

林處士墓

四壁垣衣絕點塵。茶經酒譜各橫陳。茂陵封禪無遺稿。始信文章到老醇。自注。范文正公贈林君復詩。風俗因君厚。文章到老醇。

塞下曲

明月中天秋氣清。令嚴刁斗最分明。前山夜半雕翎響。知是官軍射虎行。易落唐人白。科此能生新。

馮廷樾字大木。山東德州人。康熙壬戌進士。官中書舍人。○舍人性孤介。不入大僚之門。官閑無事。惟枕藉書卷。所爲詩。清警絕俗。詠古尤佳。山左中尤矯矯者。

論史

赫赫四公子。賢豪胥籠蓋。賓客久寂寥。餘烈猶未艾。匹夫尙輕俠。氣燄通中外。遂使法網張。豪傑蒙繫逮。關東郭解亡。濟南閻氏敗。庶姓甘屏息。富民徒關塞。大獄忽頻興。奸人弄機械。澆風熾一時。遺禍流異代。傷哉王迹熄。版籍久破壞。世族業摧殘。細民究何賴。根本終動搖。有國當深戒。尙俠之風。起於四公子。而遷徙關塞。非生民之福。亦非國家之福也。歸本於王迹之熄。見四民安業。必無此弊。真拔本塞源之論。

鐵犀行

武都怒特西入水。空舸野牛躡空起。逆潮蹴踏沔江濱。夜吼霜天猶掉尾。驚濤下撼鼉鼉宮。腥風促浪打沙觜。羣魚跳波鮫人避。一見凜然懾生氣。乖龍恃勢不受降。鱗間出火光射地。老牛鬪酣兩角折。兀然不動化爲鐵。風剝雨蝕三千年。垂胡猶帶戰時血。卽今江水白於銀。潮平岸穩沙無痕。漁舸一葉飛夏口。龍驤千斛奔荆門。篙工舵師坐收值。豈知鐵犀與有力。事往功成那可說。倒臥寒江千尺雪。只是控馭水勢。路故作奇。囑使人目眩心駭。少陵石犀行。以正出之。此以奇出之。故應各擅其勝。

黃鵠磯

沔江駭浪流淙淙。夾岸屹立雙芙蓉。黃鵠高峙郡城角。倒插石壁當其衝。上戴萬古神仙宅。下蹋千尺蛟龍宮。我客江郊百無事。獨著雙屐攜長筇。斜日慘淡山徑黑。窮秋蕭瑟楓林紅。綠崖歷磴到絕頂。危樓突兀臨三重。森然魄動當檻立。參旗斗柄搖虛空。俯看長江一帶耳。翻疑天塹難爲功。迴身欲倚江閣坐。四窗白霧寒濛濛。神仙有無墮荒邈。英雄割據空遺蹤。冠古才人零落盡。感時五嶽排胸中。山雨初來樓角暗。躡級欲下心忡忡。憑高放眼一長望。茫茫八極雲而風。

荆卿故里

一卷輿圖計已羸。單車竟入虎狼都。縱然意氣傾燕市。豈有功名到酒徒。空向夫人求七首。誰令豎子把頭顱。南來曾過邯鄲道。試問人知劍術無。不獨劍術之疎。直咎行刺之失策。此是正論。

歲暮書懷

我生漸與老為鄰。虛負鬚眉著此身。范叔漫言天下士。杜陵空望眼中人。蕭條白髮雞豚社。辛苦金門蟻  
蝨臣。自分支離本無用。不須彈缺怨沉淪。想見作者胸中無事。目中無人。

謁諸葛公祠

壞垣欹徑野花幽。肅肅靈祠祀武侯。紅飯一盂村賽晚。黃桑千樹廟門秋。壁間畫妓遺巾幘。山下征人役  
馬牛。太息高麾遊渭上。誰教天末大星流。點染本事。極見自然。

張華宅

水沒方城蔓草肥。司空舊第滿斜暉。人亡劫火羣書散。屋老秋風一劍飛。廣武勳名憐寂寞。式乾諫事記  
依稀。如何少日鷓鴣賦。卻到封侯不解歸。憐其不能退休。所以受禍。

周金然

字廣庵。江南華亭人。康熙壬戌進士。官左春坊左中允。著有娛暉東觀奚囊諸集。

詠史

今年拜少翁。明歲封欒大。孰謂無神仙。有時見海外。文成食馬肝。五利亦誅死。孰謂有神仙。禁方舉妄耳。  
殢骨非仙才。仙才安在哉。大鈞布羣物。修短一胚胎。至人獨不朽。不朽非形骸。世上豈有仙人耶。漢武亦有夢醒時也。但至人之不  
朽者安在。試尋求之。



和陶飲酒

種苗荒東臯。種豆蕪南山。勤勤苦終歲。篝車迺空言。安得休糧方。藉以保餘年。不如營一醉。此方竟誰傳。  
我思醉鄉人。乃在天地外。此林子羽語也。倘遇其人。可以往求此方。

東方仕代農。柴桑農代仕。饑凍非不切。矯厲重違己。食粟以養肥。食薇以養恥。章綬亦何榮。徒取耀閭里。  
學道三十年。奄忽逼暮紀。窮達洵有命。消息隨坎止。萬變了不疑。大鈞吾所恃。  
陶公樂天知命。而工夫自憂勤。惕厲始作者。能體會之。

度九龍山

已辭潭柘山。更問他山路。山僧知我僻。好奇導入山中陰。絕處陰壑埋雲虎。豹愁披榛覓徑。如有求。側身牽攀不可上。上者股栗神恟怳。一峯歷盡喘未蘇。前峯又復摧憂虞。我生筋力能幾多。諸艱歷試胡爲乎。樵子尋常不肯至。矧乃倦客冥搜強好事。磴危路滑行恐墜。徒旅微聞雜嗟喟。忽來片岫平如掌。相呼藉草狂歌賞。斯時四望覺身高。下視羣山離立皆兒曹。白雲冉冉騰山坳。便欲乘向閭闔隨逍遙。恨不攜將驚人句。搔首問天天亦怖。卻望居庸鳥道回。茫茫絕塞風煙開。燕昭遺烈安在哉。漁陽豪傑多蒿萊。古今代謝復何有。惟有茲山突兀無衰朽。呼取驢背酒一瓢。酌我山神勸我友。須臾雨過捲衣涼。薄醉都忘山路長。前于後唱滿空谷。山下人疑嘯鳳凰。

王九齡字子武江南華亭人康熙壬戌進士官至都御史著有尊香詩稿

竊祿

竊祿成何補。經年柏府居。無聲慚仗馬。有淚對刑書。救世人難跂。攜鋤願復虛。白頭濫朱紱。中夜獨躊躇。  
憶沈樂存侍御

萬乘昔臨邊。千軍騁玉鞭。抗章親伏地。叩馬欲回天。難挽窮荒駕。終蒙聖主憐。索居追鯁節。好語汗青傳。

題旅店

曉覺茅簷片月低。依稀鄉國夢中迷。世間何物催人老。半是雞聲半馬蹄。余年老後轉營此境。讀是詩爲之惘然。

尤

珍字謹庸江南長洲人康熙壬戌進士官右春坊右贊善著有滄湄詩鈔○滄湄先生心平氣和每作一詩字字求安有譏彈之者應時改定近人中無此謙抑矣少宗唐人歸田後改絃嘗有句云宗唐祧宋吾何敢前有東坡後放翁晚歲自悔仍歸於唐如出遊者之反故鄉也所作滄湄劄記中道作詩甘苦極詳

遣興

春風吹庭樹。漸見綠葉生。衆鳥引雛出。翩翩飛且鳴。鷓鴣及雀蛤。物類善變更。惟人獨不化。感歎誰能平。  
萬事天所命。達觀息羣營。思遊五岳徧。入海登蓬瀛。浩蕩乘天風。吾將從此行。漸近自然去陶公不遠

東軒遣興

顧此明月下。慨然思古人。古人不得見。世遠久失真。獨留詩書在。千載如有神。誦讀思尙友。風期遙可親。

毋爲守章句。兀兀徒苦辛。

簡鄭山啓

閉關屏人事。悠然習琴書。春色從天來。梅花發庭除。眷言同心友。音塵一何疏。道里豈云遠。咫尺東西居。日暮方停雲。好風吹敝廬。中庭望明月。竚立空踟躕。張籍學古淡作者近之。

題磨崖碑

有客示我磨崖碑。一幅之廣徑丈圍。觀者動色共歎賞。高文大字何瑰奇。憶昔天寶祿山叛。長驅鐵騎蹂京畿。至尊倉皇出奔蜀。太子靈武誓六師。禍亂方殷以權濟。苟不帝制衆志離。乃踐大位命諸將。收東西京不逾時。奉迎還宮就尊養。堯禪舜讓兩得之。漫叟夙推老文學。濡毫撰述中興碑。魯公筆力有神助。大書深刻青山陲。其後上皇在西內。張李交煽思傾危。奠定社稷誠大孝。何乃晚節晨昏虧。碑銘當日紀盛事。惟有揚頌無微詞。題碑後者爲涪翁。其詩未免多刺譏。讀書論世志未逮。摩挲古蹟空嗟咨。靈武卽位天下於安史爲正耶。肅宗之失在西內不朝不在卽位也。涪翁議論深刻而牧齋錢氏比之楊廣之篡逆。深文太甚矣。篇中表禪讓之兩得。譏末節之有污。最爲平允。而筆力亦復矯然。

采石磯

李白昔醉酒。曾遊采石磯。磯流一何急。弄月不知歸。山樹色猶古。江濤聲未稀。我來懷勝蹟。招悵對清暉。一筆揮洒。人力不與。

寄家信

落日蒼然遠。浮雲天際翔。潮聲何處發。今夜宿江鄉。有客歸吳會。封題寄八行。明朝渡江去。烟水正茫茫。  
筆力與前一首同。此種風格。本於青蓮。明人中。徐昌穀亦時有之。

鄴都懷古

風流佳麗魏王都。憶昔雄豪創霸圖。鄴苑人空花自落。銅臺伎散鳥爭呼。五官事業埋荒隴。七子才名付酒壚。惟有漳河東逝水。年年春漲浴飛鳧。

夜坐

花影忽移知月上。樹梢微動覺風吹。不看北斗天邊近。只道家園夜坐時。

吳

苑字鱗潭。江南歙縣人。康熙壬戌進士。官至國子祭酒。著有北豔山人詩。○司成性仁孝。讀陽城貴諸生歸養語。曰。吾人師也。身教之謂何。即日陳情歸。弟兄侍養。天倫之樂可知矣。讀陽

家一章。令人神往。餘亦皆和平。啾緩之音。

自觀音巖過老人峯至天門

奇峯漸延矚。策杖窮登頓。獨怪夏已深。亭午露猶泫。懸崖若廣廈。少憇慰勞倦。情爲艱險移。目因應接眩。琪花不知名。古苔詎忍踐。高磴穿林頂。墜石橫澗面。移徙雷雨夕。云有蛟龍戰。再上老人峯。偃僂青松畔。獨居賓師位。不與羣峯亂。豁然天門開。雲端雙闕見。閭闔通呼吸。象緯可攀援。衣裾盡飄颻。御風冷然善。

何必生羽翰。始遂遊仙願。原本謝公寫老人峯二語能爲山靈生色。

望後海諸峯

尋山興難已。理策出烟寺。晴嵐漾朝光。薄霧散空吹。荒塗沒人徑。一石一天地。環海千萬峯。劫初作兒戲。盼左興難盡。矚右賞不置。墜岸千仞青。嵌空一天翠。平生見名山。履險身忘悸。獨此奇無窮。瞠目不敢視。時造奇語令人驚絕。

到家

巷竹猗猗垂。山桂亭亭覆。入門拜慈親。白髮顏微瘦。薄宦十餘年。懽愛類穉幼。款款問中朝。不私及堂構。嬌兒髮垂額。及歸盡婚媾。鬪門孫暗窺。茲客曾未覩。憶昔少年時。老屋塌篋奏。樹下共嬉遊。兄先弟隨後。樹今已成圍。山石還如舊。擬采南陔蘭。相偕飾容臭。匪敢賦閒居。獻母南山壽。可參我徂東山第三章。老杜羌村第一章。而情事各別。讀者忠孝之心。油然而興起。

峨眉山月歌送許時庵使蜀

我聞峨眉山。插天青嶙峋。上有太古雪。未化不知天地冬。與春高懸更有秋。空月雪上清輝尤皎潔。光耀磊落之奇人。西漢馬卿宋軾轍。況君秋水點雙瞳。九天銜命下蠶叢。清無遺照同山月。畢獻珠光錦水中。

宋

榮字牧仲河南商邱人官至吏部尚書著有蘇津詩鈔○商邱公官部曹時列十子詩選中撫吳時有漁洋蘇津合刻又嘗選江左十五子詩以提唱後學固風雅之總持也所作詩古體

主奔放近體主生新意在規做東坡時宗之者非蘇不學矣茲所錄者俱近唐賢諸作公晚年訂定意或轉在是與

### 蘇門徵君孫鍾元先生

吾道有攸屬。徵君儒者宗。椒山共里閭。少多烈士風。孝廉舉弱冠。懷抱凌蒼穹。傾身救楊左。高義等華嵩。更入賢相幕。談笑籌兵戎。晚值滄桑變。俛首簡冊中。蘇門山水窟。誅茆寄遐蹤。生徒環講席。一代開羣蒙。百泉闡妙旨。濂洛淵源同。豈學鸞鳳嘯。聊以臥雲峯。屢徵不一起。魯齋有媿容。伊余景行切。千里思扶筇。雖託弟子列。恨未接猶龍。雲霄拜短札。薄劣荷陶鎔。迄今二十載。太行仰龍窉。朱絃失遺調。歎息撫焦桐。作詩明嚮往。滔滔水流東。前爲義人後歸理學身親實踐之士非空談道術者也湯文正師事之詩亦列傳體製

### 和子湘春雪後夜坐效韋左司

梅花半將開。媚此雪後月。空亭耐春寒。坐到昏鐘歇。池光明檐楹。鶴唳激林樾。幽人默相對。詩思清到骨。清到骨三字自評其詩公集中以此種爲上

### 蓮花洞

嵯峨蓮花峯。中有蓮花洞。撲人蝙蝠飛。沾袂煙嵐重。斜陽倚洞門。清嘯山猿共。

### 贈太僕卿高公挽詩

高名天爵以建昌守殉難閩中

烏石峯高穴。羆虎赤狐跳。跟黃狻舞。血牙齧炙氣益麤。紅帕抹首錦纏股。妖氛一夜連汀漳。肝黎城邊波。

沸湯。太守弓刀夜乘障。不識真卿作何狀。七尺誓與孤城俱。變生肘腋誰周防。去聲嗚呼南八真男兒。壯士隱忍欲有爲。不成死耳肯作賊。銜鬚茹刃甘如飴。璽書褒忠主恩厚。汗青焯焯行不朽。顏舌段笏今有無。杏山鐵漢建昌守。

吳漢槎歸自塞外邀同王阮亭祭酒毛會侯大令錢介維小集作歌以贈用東坡海市詩韻

塞外長白橫長空。吳君廿載冰霜中。豈意玉關得生入。雲霄重望蓬萊宮。哀笳聽罷鬢毛改。縱橫老筆偏能工。魚皮之衣捕貂鼠。曾披榛莽尋黃龍。甫草計寓書感生別。題詩慘絕梅郵翁。歸來兩公已宿草。惟君懷抱猶英雄。時平好獻大禮賦。少陵遇合無終窮。相逢一笑快今日。俯仰況復當春融。談詩命酒皆老輩。何惜傾倒玻璃鍾。楛矢石弩誇創見。君之所得亦已豐。夜闌醉眼望天漢。恍惚鴨綠磨青銅。世間萬事一海市。且看梅萼開春風。

數月來聞汪鈍翁王勤中惲正叔劉山尉相繼謝世灑淚賦此

遠道頻傳薤露歌。人琴此日奈愁何。宋中耆舊傷心盡。吳下風流逝水多。塵篋祇憐餘翰墨。荒墳欲拜阻關河。黃昏鈴閣題詩處。忍見空梁夜月過。

讀高念東先生瓊花觀詩因懷廣陵舊遊卽席聯句

同念東先生施愚山王阮亭謝方山

瓊花何意也愁人。念東且遣當杯酒入脣。萬事揚州成舊夢。愚山三生杜牧失前身。念東雷塘螢火猶侵夜。牧仲

官閣寒梅待放春。亭吟罷新詩轉惆悵。愚山三分明月竹西塵。方山

烏江

落日烏江繫小船。拔山氣勢想當年。一問古廟荒烟外。野鼠銜髭上几筵。即一問茅屋祭昭王意。

訪葉已畦不值

別浦幽幽境愈奇。春風籃輦爾何之。小山叢桂清陰下。想見蒼茫獨立時。神韻自遠。

高士奇。字澹人。浙江錢塘人。欽賜翰林官。至詹事府詹事。著有扈駕歸田等集。

題盧徵君嵩山草堂圖

神髻在水不入筵。仙禽在野不受籠。達人泥土視軒冕。林巒剗跡偕洪濛。嵩山徵君巢許蹤。高柯百尺龍門桐。召拜諫官臥不起。草堂僻徑臨龕窳。巖姿壑籟有神會。自寫不假丹青工。墨痕迥出濃淡外。絕境直與虛無通。手書十志字健勁。藤枝薤葉紛相蒙。在昔右丞妙詩畫。輞川舊本留清風。徵君絕藝亦兼擅。藍田少室將無同。弘農好古愜真賞。跋尾小印蟠絲紅。筆法獨啓元祐派。胚渾坡老兼涪翁。開運下迄淳熙代。五閱丁未雲流空。神物不隨陵谷變。浩歎者誰周益公。慶元到今復幾世。暗中呵護煩蒼穹。自注。五代楊少師凝式跋中。止書丁未歲前七月。宋周益公必大跋。以爲丁未乃石晉開運四年。是歲漢祖起於太原。復稱天福七年。又閏七月。故曰前七月。自開運丁未。至宋淳熙已歷五丁未。周益公跋於慶元己未。蓋寧宗五年也。黯然之光久愈發。何啻寶玉搖晴虹。我在修門昔曾見。愛此疊巘藏玲瓏。歸田五載親抱甕。柘湖拓地



芟蒿蓬。石廊洞戶頗幽雅。十指媿未爛皴烘。重來那免猿鶴怨。故園青碧孤芳叢。雲烟一卷快入手。槐根欹枕遊高嵩。因披畫而作夢遊也。

天馬行

蒲梢天馬本無種。渥洼水落神龍涌。旋風八尺雪花飛。玉削雙蹄高耳竦。千里萬里纔須臾。津津細汗流紅珠。天生此馬豈無意。要與皇路供馳驅。瀚海遙遙難自致。絕域荒沙身暫寄。驕嘶圓月蹴層冰。闔闔前思一試我。皇神武古絕倫。犁庭掃穴來西巡。旄頭迸落狐鼠竄。陣前奪得生騏驎。太僕牽來當帳殿。將士盡驚光若練。寶鞍金勒繡障泥。猛氣驍騰掣飛電。橫行到處勢莫當。塞門面縛看來王。功成偃武海宇泰。會須歸放華山陽。

送孫愷似孝廉

沁園詞客舊知名。曾在楊花渡口行。佳句已傳箕子國。歸心又向闔閭城。白蘋風細扁舟穩。青桂香濃小苑清。吾亦有廬江上好。秋來鱸膾不勝情。愷似曾使高麗采詩。故有第三句。

吳興祚

字伯成。遼東清河籍。舊本浙江山陰人。官至大司馬。著有留村詩稿。

電白縣觀海

揚帆同縱轡。咫尺辨滄溟。沙向日邊暖。春從島外青。鯨鯢今不見。樓櫓昔曾經。海若知王化。年年效百靈。

舟次潯州

行盡粵東路。粵西又一天。是山皆瘴氣。無樹不蠻煙。幻語聞獠洞。歌聲出蠻船。遐荒風景異。化俗倚前賢。

連上章總制  
兩廣時作

謝重輝

字方山。山東德州人。官刑部郎中。著有杏村詩。○比部學陶公。未極自然。而旨趣已高。擢脫塵空。眞朴處。殊近儲太祝。漁洋謂去膚存骨。去枝葉存老幹。眞賞甚稀。存之篋中。以待元次

山杜清碧其人。定相當於絃指之外。傾倒至矣。

東臯

投種須及時。大率穀雨前。良農知時節。夙駕來中田。倉庚鳴向我。翔集立南阡。似謂耕耨苦。勸我暫息肩。浮雲從北來。細雨潤前川。富足雖未期。飽食庶終年。

桑

我昔聞諸葛。園林遍種桑。吾宅纔五畝。牆下亦成行。不愛榷子垂。愛此遠枝揚。濃陰日夕佳。常在吾廬旁。五岳老難遊。對此可徜徉。鳴鳩忽高飛。三嗅入斜陽。

萱草

老去恆內省。不懼兼不憂。閒種萱草花。時得覽芳柔。曉看迎露放。暮看逐風收。纔茲旦暮間。已如四運周。孰云忘憂草。遇目轉添愁。不如忘形骸。任彼歲月流。四運猶旦暮。即百年猶四運也。感傷實多。未及付修短於大造。而任天以遊。則又進於達觀之識矣。

適野

適野聽鳴禽。輕裝冒朝旭。怡然接春暉。遂縱千里目。迢迢東臯田。蔥蔥北林木。黃鳥忽中出。交交相追逐。側耳慰好音。輕風吹初服。迴顧田舍人。農書老猶讀。無怪沮溺輩。經年事耕牧。我欲叩其端。白雲掩茅屋。

春來

春來何所事。依然耽琴書。親昵稀來往。人事欣無餘。我身既暇懶。我性日益疎。時從池上酌。往往臨清渠。春山到眼前。好風遍庭除。碧柳漸覆井。蒼松鬱不舒。時鳥解人憐。相向各自如。因之坐松下。日暮傾一壺。淡然無意自足品。流此境最是難到。

過大木宅有感

風掩蓬門舊宅荒。就中何處最淒涼。停車不見吟紅藥。駐馬惟看種白楊。棟宇凋殘嗟向秀。圖書零落感文昌。可憐滿篋雕龍賦。未得生前動漢皇。

孔傳鐸

字振路。襄封衍聖公。著有申椒集。

半塘弔五人墓

直是殲兇闖。千秋氣共伸。由來殉義客。何必讀書人。勝國山河改。巍墳俎豆新。三良空惴惴。殊讓爾精神。

只十字。已爲五人吐氣。

秋日雜詠

玉露蕭森萬壑幽。淒清天氣獨登樓。三更鶴唳驚回夢。萬戶砧聲送到愁。但使詩書充腹笥。莫悲身世似傳郵。浮生幾個成閒坐。且向花間判酒籌。

山中

山居盡日無膏沐。侍女牽蘿補茅屋。芳草春時深閉門。月明自伴梅花宿。

孔尙任

字季重。山東曲阜縣人。官戶部郎中。

紅橋

紅橋垂柳裊煙村。隋代風流今尙存。酒旆時遮看竹路。畫船多繫種花門。曾逢粉黛當筵舞。未許笙歌避吏尊。可惜同遊無小杜。撲襟絲雨總銷魂。名句可采。

憶昔

憶昔春宵傍父兄。故園風景乍承平。城門吏放深更鑰。樓下人聽上界笙。珠履貪遊從雪沍。花燈不息任天明。誰知此夜來爲客。漁火江村照獨行。東塘風流自賞。即演桃花扇劇者。讀此二詩。想象其人於酒旗歌扇之間。

丁

煒。字雁水。福建德化人。官按察使。

臥病酬林澹亭

輕寒腰帶減。窗竹漸離披。未得高眠早。常愁退食遲。青山秋後夢。黃葉雨中詩。酒熟東籬下。君閑可預期。

賈島峪

青山名傍古人存。賈島窮居有故村。客舍無烟成獨歎。秋風落葉向誰論。十霜幾墮并州淚。萬里空歸蜀道魂。烟月石樓寒寂寂。夜深疑叩老僧門。通體點化長江詩。便不浮泛。

新淦舟行

城下空江向北流。虔州西上正悠悠。柳邊過雨鷺窺網。花外夕陽人倚樓。漁笛數聲愁欲劇。篷窗孤枕夢偏幽。一川烟景頻來往。每對青山憶舊遊。人倚樓一層。夕陽一層。花外又一層。層折而略無痕迹。所以可貴。

吳秉謙字鳴貞。遼東清河人。

過廬陵觀戰場有感

廬陵昔日建和門。風鶴驚心故壘存。白骨未銷春戰血。青燐空聚夜歸魂。斷烟匹馬迷荒寺。落日寒鴉返暮村。回首贛江三楚外。十年往事總難論。

孫元恆字子常。福建永春人。官漢州知州。

瞿塘

白帝荒城帶雨昏。瞿塘高浪挾雷奔。雙崖積鐵封三峽。衆水排山爭一門。魚腹浦懸魚鳥陣。虎鬚灘變虎

狼邨臥龍躍馬空回首。壯士當關幾并吞。狀險峻之勢。補

江闔字辰六。江南歙縣人。官解州知州。著有河汾集。

喜吳天章至自蒲坂

相違冰雪後。相對兩蕭然。有榻留徐穉。無錢與鄭虔。更深重話舊。燭剪欲忘眠。不識千秋後。詩篇若箇傳。

哭外舅吳興公先生三首之一

解組歸來日下帷。拈毫輒與古人期。詩方范陸差相亞。詞擬周秦更勿疑。乏食恥炊同舍釜。罷官孰寄草堂貲。侍兒也爲先生惜。滿腹牢騷不合時。梅村形其好客輕官。就初去官時言之。此形其甘貧厲節。不合時宜。就去官後言之。

戴梓字文開。浙江仁和人。佐康熙王平三逆有功。王假以監軍道職。後因能詩。聖祖命直南書房。

烽臺晚眺

獨立俯荒邱。清笳殷戍樓。萬山環塞險。一海抱天流。白骨何年戰。黃雲終古愁。憑高無限感。霜月滿征裘。

出獄口占

已解桁楊困。旋增離別傷。遙憑南去鴈。不死慰高堂。

逢子先上人

鄉語忽驚聞。相看是故人。龍庭二十載。不識故園春。三詩風骨皆不落貞元以下。

孫寶侗字仲愚山東益都人官都察院經歷著有惇裕堂集

移寓

蕭然襍被瀨江頭。高館移居更上樓。宅是謝公開苑上。人如王粲在荊州。西陵松柏三春樹。南部煙花五夜遊。但使羣公能愛客。憑闌看盡越山秋。

卷十四

周

質字青士浙江秀水人著有采山堂詩○青士隱於市然能穿穴古今尤工韻語朱竹垞太史極推許之嘗紀其軼事有郡丞行署與周為鄰周吟誦徹夜丞聞其聲亦達旦不寐甚遣吏勾提將扑扶有士夫救援得不辱至今秀水人猶津津道之

七歌集句

長吟遣愁悲歌當哭我思古人實獲我心集七歌

十年失路誰知己。擾擾塵中猶未已。恆饑稚子色淒涼。病僕呻吟呼不起。當年意氣不肯平。昨日論交竟誰是。嗚呼一歌兮歌已哀。石田茅屋荒蒼苔。

園中有棗行人食。忍能對面為盜賊。有時長歎獨移時。安知我有不平色。秋風落葉閉重門。白髮如絲歎何益。嗚呼二歌兮歌始放。江客不堪頻北望。

意中索莫與先異。春草青青新覆地。年年歲歲一牀書。不忍見之益愁思。愁心反覆夢難成。天寒鴈度堪垂淚。嗚呼三歌兮歌三發。中天夜久高明月。

北風微雨虛堂秋。昨日之日不可留。四時不得一日樂。朝夕催人自白頭。仰天大笑出門去。安得行歎復坐愁。嗚呼四歌兮歌四奏。傷心不忍問耆舊。

世情付與東流水。窮巷蒼苔絕知己。巖扉松徑長寂寥。東園幾樹桃花死。媿爾東西南北人。欲向何門踞珠履。嗚呼五歌兮歌正長。雌龍怨吟寒水光。

世人結交須黃金。郢中白雪且莫吟。桃花欲開不自覺。千里春色傷人心。眼前好惡那能定。隔葉黃鸝空好音。嗚呼六歌兮歌思遲。一沉一浮會有時。

天寒野陰風景暮。落日疎鐘小槐雨。寂寂寥寥揚子居。惟有幽人自來去。何用年年空讀書。井底看星夢中語。嗚呼七歌兮。悄終曲。空庭細雨莓苔綠。以己意驅遣成語。故無湊集之痕。第七句仍用杜陵原本。因無可集也。存此以備詩中一格。

### 懷張考夫

契闊張夫子。平生實典型。立言惟布粟。爲政在家庭。上下論千古。東西有二銘。閒階帶草色。幾日又青青。老杜吾宗老孫子一章。鎔入十字中。猶書家之有縮本。

### 送查三容攜家入楚便往滇中



念爾攜妻子。圖書共一船。此行將萬里。爲別動經年。春草迷江渚。秋風落瘴烟。故人崔李在。相望碧雞前。

俞

瑒字犀月。江南吳江人。○犀月精心獵古。秀野顧太史選元詩初集。兩人共商榷者也。評點文選杜詩流傳吳下。詩稿無從尋覓。故所收止此。

田居

仕宦非吾分。力農恆苦饑。閉門多感懷。出門又何之。散慮南林下。徘徊傍清池。芳春二三月。草木含華滋。澤蘭被幽渚。桑柘低柔枝。輕風颺微薰。坐久不知疲。遙見荷鋤者。行行向東菑。良時旣云爾。人事亦有宜。會須各努力。勤惰當自知。行思耦耕計。無令悔失時。歸來陌頭路。草露方沾衣。

顧有孝

字茂倫。江南吳江人。縣學生。○茂倫居釣雪灘。以選詩爲事。唐律及本朝近體皆有選本。詩稿亦未及見。

寄贈沈留侯偕小阮北上

春風楊柳拂行舟。有美聯翩共遠遊。入洛陸機新作賦。依劉王粲故多愁。舊京珠履三千客。荒塚冬青一十秋。湖上好山無恙在。獨持卮酒對羣鷗。

顧

樵。字樵水。江南吳江人。○樵水工畫。亦有詩名。

秋夜東顧茂倫

秋聲無深淺。深淺在人心。但使聞者悲。不辨鳴者音。月落林影翻。夜半驚栖禽。入秋畏夢短。起坐還披襟。遇物悲在昔。事往情更深。安知來日愁。追念不及今。我有萬種恨。并入秋風吟。哀樂境所遇。豈必雍門琴。

境無哀樂。惟在所感。起十字道盡。

周

肇字子叔。江南太倉人。著有東岡集。○梅村選妻東十子詩。十子為周肇子叔。顧涓伊人。王撰

流文采。稱極盛焉。

贈陸翼王

君是左徒門下士。竭來相對哭途窮。遺孤袁粲壘囚日。亡命王成賃保中。書館三餘淹夜雨。客顏一瘦怯秋風。結交世上黃金滿。四海何曾識此公。翼王為黃陶菴高弟。當日有保全遺孤事。故專及之。

病中元夕有感

夢入京華怪獨醒。孤舟病客鬢星星。逢年漫媿天人策。涉世寧諳長短經。秃筆賣文差可活。庸醫乞藥總無靈。上元燈火蕭條甚。纔說宣和已淚零。

顧

涓字伊人。江南太倉人。著有水鄉集。○伊人係麟士長子。克承經學。梅村稱為麟士有子。

感懷

石城笳鼓不堪聽。烈士天涯散曉星。伏闕陳東還痛哭。登樓王粲獨飄零。奔濤夜立魚龍怒。戰血春迴草木腥。莫說長江限南北。建康原是小朝廷。福王時。馬阮秉政。誅戮名流。長江不守。作者感慨言之。知小朝廷之必亡也。

閱江樓

萬里長江一望收。高皇親建閣江樓。雲開蓬島星河曙。月出盧龍天地秋。碧草自生宮寢路。青山仍繞帝王州。憑君莫問當年事。禾黍同歸六代愁。樓在師子山。又名盧龍山。明高皇有詩。又命宋濂作記。

許旭字九日。江南太倉人。著有秋水集。

淮雲寺

石徑斜開路幾層。扶筇攜屐共攀登。花逢九日思兄弟。病阻文園念友朋。南渡白雲悲古寺。西風黃葉哭昭陵。三年遙觸傷心淚。欲訊滄洲媿未能。

過廢園有感

落日蒼茫滿客心。無端興廢愧登臨。到公死後空存石。謝傅亡來久廢吟。一代詞人歸蔓草。百年名苑化祇林。芙蓉金粟知何處。野水瀾瀾自古今。

過弘濟寺

中流遙見雁飛斜。一水蒼蒼起暮鴉。崖罅插江懸棧閣。洞門鑿石走平沙。幾年北望成荒戍。憶昔南巡待翠華。乘輿獨來尋薜壁。空階開徧海棠花。懸棧閣一言。能狀難寫之景。

王

撰字異公。江南太倉人。著有三餘集。

哭外舅鹿城顧大宗伯自注。丙戌死。溫州江心寺。

閩嶺衣冠擁殿墀。偏安猶見漢威儀。驅車海嶠看傳檄。拜表江關始出師。萬里弓刀空報主。一船棺槨僅從兒。靈旗夜雨歸何處。指點文山異代祠。自注：寺有文丞相祠。宗伯致命恰在其地。

贈杜于皇

憶自分攜歷變。更訪君曾過石頭城。人驚夔府貧來句。世重樊川亂後名。此地溪山千里夢。今宵尊酒廿年情。西陵放櫂乘秋漲。好待荒郊泛月明。

王

抃字懌民。江南通太倉人。

送友還蜀中

山塘綠酒浮芳菲。楊花作團如雪飛。花前沽酒送君別。別淚簌簌沾我衣。蘭橈欲發鼙鼓急。感君握手須臾立。把盞長歌曲未終。月光如水鬚眉溼。君今掉頭萬里行。縈紆蜀道多不平。石鏡銅梁連劍閣。況復江山阻甲兵。願君努力長途去。舊住岷江發源處。岷山雪消岷水清。望見錦官城裏樹。錦城花落更愁人。杜宇啼殘灩澦春。武侯廟下苔如繡。先主祠前草似茵。君不見遼東華表歸來鶴。城郭人民盡非昨。回首江南千萬重。夢裏寒雞村月落。應是亂後還蜀。流賊雖平。人民未靖。送者多悲歌感慨之音。

揚州次梅村師韻

牙門置酒宴公卿。錦纛雕鞍命北征。縛袴健兒誰轉戰。借籌策士總虛名。百年洛蜀關時運。六代煙花兆

甲兵擊楫中流無限恨。夜闌欹枕聽江聲。福王南渡時事。閣部分鎮。廟堂水火。四鎮交爭。喪亡之兆。顯然而彼昏不知。詩人所以歎也。

王

據字虹友。江南太倉人。著有蘆中集。○太原王氏。昆季多才。不啻過江王謝。而蘆中一集。尤爲矯矯。

謁睢陽廟

祿山陷兩京。唐室勢如沸。玄廟一哭。義聲震天地。誓死守孤城。非云事必濟。自覆潼關師。乘輿久奔避。賊議圖江淮。憑茲一旅制。不然鼓而南。誰斷其右臂。惜乎四百戰。食盡終顛躓。城陷逾三日。援師鎬始至。殺賊雖無成。藉以衛神器。從此朔方兵。收京功乃遂。赫赫精忠祠。允宜祀百世。黃巾徧郊坰。明季遭傾毀。呂侯還舊觀。匪曰窮奇麗。偶客梁宋間。摳衣拜階屣。冕旒坐中央。左右南雷侍。動我忠義心。一消疲茶氣。別蘇讀殘碑。峴山同墮淚。力表其蔽。遮江淮之功。發揮昌黎意。尤爲透切。

黃海歌

我所居兮在海濱。未登高邱望遠海。行入深山盡是山。銀臺金闕瞻安在。昨投湯院雨翻盆。電激雷轟衆壑奔。茲山雨後當鋪海。旋因觀海登天門。天門削成去天尺。歷盡危梯上絕壁。彌勒龕中一宿留。曉起白雲千里積。非煙非霧鋪虛空。時爲車蓋時爲龍。諸峯沒趾漸及頂。初由膚寸彌寰中。天吳髣髴舞其下。萬里無際連蒼穹。是時罡風吹蓬蓬。聽如擊鼓馮夷宮。更疑射蛟海水赤。一輪照曜扶桑東。須臾解駁浪紋靜。玉池開放千芙蓉。人間萬事皆桑田。惟斯亘古無變遷。塵寰踟躕真可憐。胡弗蹈海如魯連。三山驅走

置眼前對之欲往心悠然。長願採藥山中眠。朝朝來往蓬萊巔。帝鄉未遂平生志。從此浮槎天漢邊。庚午遊黃山親見其景吐詞未能工也。讀此實獲我心如重觀雲海一次。

### 謁伍相國祠

蕭條古堞樹棲烏。載拜祠門落日孤。報父有心終覆楚。殺身無計可存吳。英雄忠孝留天壤。山水蒼涼失霸圖。回首荒臺麋鹿地。屬鏤遺恨滿姑蘇。作手無一泛語亦無一剩語。

### 聞漢槎謫戍寧古塔

欲叩君門萬里賒。驚聞遠戍度龍沙。文章只道金難鑠。謠詠翻成玉有瑕。減死蔡邕方出塞。哀時庾信未還家。可憐交橐歸來日。豈有明珠載一車。

### 喜吳弘人聞夏南還

相逢只道此生休。解網歸來話昔遊。幸免無家投朔漠。那堪有弟作纍囚。雲山漸慰思鄉夢。風雪仍含出塞愁。不覺喜深悲轉集。潺潺雙淚爲君流。有弟作纍囚時漢槎未還故有是語。

### 懷許九日

聞君纔上摘星樓。又到濡須塢口遊。勝地山川曾百戰。故人煙雨只孤舟。蒼蒼楚水兼葭晚。漠漠江田秔稻秋。應有陳蕃懸榻待。免悲王粲滯荊州。自注九日與楊仲廷家阮亭二公倡和最合。

呂城病歸

挂席西風桂槳輕。扁舟又次呂蒙城。身如枯葉方愁落。心似殘潮未肯平。宿雨河橋橫酒旆。晚煙邨店聚雞聲。故園歸去無多路。每念勞勞重愴情。

重陽前一日登鎮海樓

無端來作五羊遊。節近登高上此樓。海氣溟溟山繞郭。天風浩蕩客悲秋。飄蓬且喜雲生屐。簪菊應羞雪滿頭。鄉國茫茫何處是。珠江一片夕陽愁。

張文獻公祠

祠堂突兀倚江開。瞻拜空餘海燕哀。只道主由金鏡致。豈知兵爲玉環來。文章自昔傳徐碣。香火常新傍舜臺。風度依然憑想像。停舟一薦渚蘋回。元人咏太白有承恩金馬詔失意玉環詞句人以爲工此更說得關係

王曜升

字次谷江  
南太倉人

登北固山

雄峯高枕瓮城斜。有客登臨送晚霞。水氣暗吞山頂寺。江雲遙護海門沙。天低雁鷺來千里。地迥星河落萬家。指點舊朝形勝在。吹愁何處起悲笳。

端午先忌

餘生十載恨蹉跎。令節閉門掩薜蘿。剩有蛟龍蟠大澤。空聞簫鼓發層波。三閭怨在餘香草。九地恩深廢蓼莪。慙愧王修能罷社。葛衣檢點淚痕多。端午與先忌並列。而主意尤重先忌。

王曾斌字弘導江南通太倉人。

### 錢王祠

錢塘亦是興龍地。王氣依然據上游。鐵箭舊傳唐歲月。璽書曾拜宋春秋。江潮出沒三千里。風雨淒涼十

四州。剩有湖山供廟貌。坐看錦繡欲生愁。無一語一字輕下。自是到家。

袁啓旭字士旦江南京城人。著有中江紀年詩。

### 循煙霞洞下嶺至石屋洞

晨興涉亂山。亭午憩修畛。巖高哀狄吟。樹密春禽隱。交藤路漸披。獨鶴徑徐引。石竇闕玄冥。巨靈忝真境。開鑿自何年。潛虬遞虛牝。海氣通平遠。寒烟錮深迥。雕鏤非一壑。險仄有孤嶺。仙室越陰涼。人世異朝冥。

渴欲漱乳泉。饑將摘松菌。於此託賞心。無勞慕張邴。遊山之詩允宜步武。謝未造幽微。已合槩度。

李良年字武曾浙江秀水人。太學生。康熙己未。應博學鴻詞。放歸。著有秋錦山房集。徐尙書健菴。開史局於洞庭西山。武曾任分修。應亦遷於古者。

### 九嶺

昨者暑氣清。嵐瘴喜初散。幕府有程期。鳴鏜戒宵半。殘月不到地。松梢耿河漢。冥冥列炬移。灼灼螢火亂。



空山悟無始。靜裏閱昏旦。九嶺爭一隅。徑窄中每斷。我行尙層岡。僕夫復深澗。浮生付飄忽。肩腋楚人慣。不墜良偶然。履危豈無歎。轉苦東日遲。坐待火雲爛。稍稍荆扉開。人語出沙畔。前途方迢遙。平明且須飯。  
殘月山行。自夜及旦。歷歷如繪。

宣府人日

烽臺石戍曉煙平。人日逢人載酒行。客久漸多新歲感。邊方倍起故園情。圍鑪小伎兼箏笛。出郭諸山半雨晴。騎馬不愁歸路晚。江鄉猶及聽啼鶯。

栗子關十六韻

峻極重關勢。艱難獨客經。梯航原梗絕。中外劃郊坰。天作西南障。山開大小屏。路應莊躋始。地自伏波寧。遺廟崇新祀。殘碑失舊銘。土田紛犬俗。樵採怯鳩形。往事聞開國。殊方久不庭。王師頻越歲。使節幾衝星。鬼斧橫飛棧。神功直建瓴。虛無雲漢逼。縹渺淥江停。鳥道層巔接。猿聲下界聽。半肩欹絕壁。一髮上空冥。石到諸蠻黑。楓過二酉青。炎風高瘴癘。晴日俯雷霆。豈有神明護。真疑虎豹扃。杖藜無恙在。珍重別山靈。

聞鷓鴣

花間飛上竹枝啼。纔過黃絲又冷溪。蠻鳥亦知行不得。行人那向夜郎西。

憶方虎客宛溫

牂牁秋綠晚萋萋。五十郵亭到越谿。不敢更嗟鄉國遠。有人還在萬峯西。因已遊歷之遠而念更深。有遠者懷人之情自深。

黃始人。字靜御。江南吳縣人。舉鴻博。不遇歸。

### 溪西

溪西人家秋水生。孤舟常自三更行。一聲啼鳥半江月。纔到兩山天欲明。

葉世佺。字雲期。江南吳江人。郡諸生。

### 謁劉公祠

世運凌夷日。中流荷大賢。反經斯起敵。往蹇自來連。濂洛開新緒。河汾具薄田。懸弓忘巧拙。食蜜自中邊。帝簡徵文在。薪存續火傳。人心方復古。天意不扶顛。遠塞唯迎盜。長江誰著鞭。鼎湖上龍馭。赤縣徧狼烟。涕淚包胥血。饑寒蘇武氈。偏逢苟安主。虛憶中興年。精衛勞填海。媧皇莫補天。去留關廟社。生死合經權。此道荒千古。何人障百川。祠堂拜遺像。風雨暗靈筵。傳寫念臺先生兼思宗朝及南渡言之凜凜有生氣。

揮格。初字壽平。後以字行。更字正叔。江南武進人。著有南田集。○南田工畫。山水花卉兼擅。比之天仙人。詩亦超逸。昆陵六逸中。以南田爲上。

### 月夜從愚庵大師陳際叔徐世臣湖干閒步

披衣攬夜色。遂適湖干趾。喧籟息近聽。林巒斂遙視。千峯寒月中。萬壑疎鐘裏。三潭弄浮煙。因風蕩爲水。浮汀漁唱入。過浦簫聲起。佳遊領支公。雅調及高士。霜月滿歸塗。宵深情未已。三潭十字。微妙可思。

贈莫十三

君家西湖濱。厭看湖上山。身依海鷗宿。心與天雲閒。口吟五噫西。出關脫帽自挂蒼梧間。偶然登燕臺。洗足御溝水。縑袍蒙茸一草履。金貂紫駟君勿喜。倒誦蟲書三萬言。侏儒笑擲番王璽。重譯曾驚外國使。諸侯盡倒蘭臺屣。既鍛上林羽。又轉桑乾路。囊破惟留五嶽雲。鶴飛還想三珠樹。滿腹皆象緯。纏衣悉烟霧。握尺量舜管。執杓考天步。流霞未肯酌。熊蹯亦不茹。聊將櫛葉補秋雲。柳栗橫空萬山去。莫君嗜古。精于天文。能驚外國使。能考璇璣玉衡。而終于不遇。故作詩贈之。

送滕子還閩

滕子閩人。自閩入燕。沉身絕域者九年。後其姊致書薊門。物色得之。知老母尚在。遂以計脫。間關南還。

別後春風染杜鵑。驪歌聲斷綠楊煙。身沉絕塞思千里。心死穹廬客九年。吳苑離觴寒食後。梨關歸夢落花前。閩南別去能相憶。倘有雙魚海上傳。

春城戰血冷悲笳。廢壘傷心舊礮車。雪窖生還猶有母。玉門歸去已無家。同騎塞馬眠燕月。獨向河源上漢槎。我有離魂招未得。劫灰天畔哭黃華。南田與兄相失於黃華山。故感及之。

贈筴在辛侍御

墨苑風流屬老成。白雲舊祕待先生。正平無地容疎放。北海猶慙問姓名。自辨銀鉤收蠶尾。尙留瑤草付龍耕。東來蠟屐窺松子。自注待御閣。有松子閣。如向青霞望五城。

曉起

連夜深山雨。春光應未多。曉看洲上草。綠到洞庭波。

遠眺

暮雲千里亂吳峯。落葉微聞遠寺鐘。日盡長江秋草外。美人何處採芙蓉。

寄虞山王石谷

東望停雲結暮愁。千林黃葉劍門秋。最憐霜月懷人夜。鴻雁聲中獨倚樓。虞山亦有劍門。

佟世臨

字醒園。江南上元人。諸生。

戊寅秋拜先王父墓下。自注好瑤以熊廷弼事及難。

鬱鬱松楸蔭墓田。愴懷往事淚潸然。請纓慷慨終童志。賦鵬沉淪賈傅年。鈞黨竟成三字獄。招魂欲叩九重天。孤忠未返遼東鶴。俎豆聊分江夏賢。

陳維岳

字緯雲。江南宜興人。

贈友

相逢一笑看吳鉤。燕市悲歌上酒樓。地有大風連沛澤。人餘奇氣動幽州。天低古戍金笳冷。月墜巖城玉笛愁。此處舊傳多俠客。荆高去後水悠悠。

鍾映淵

字廣漢。浙江嘉興人。○廣漢援據古昔。元元本本。遇虛聲之士。相對不交。一書有勝己者。執禮甚恭。因是好惡之者各半。惜中年摧折。未底老成。

送羅比部暫歸西川

白帝孤城落照懸。鄉愁迢遞武功天。將歸故國無鴻雁。行過空山有杜鵑。劍閣風雲開五丈。笳關烽火隔三川。明年巫峽生春水。好上東吳萬里船。

馬世傑

字萬長。江南溧陽人。貢生。

秦宮

阿房周閣百重環。美女充庭盡日間。頻望翠華終杳渺。亦如天子望三山。即有不得見者三十六年意。印合秦皇求仙。便覺詞意俱新。

金

侃字亦陶。江南吳縣人。

雨泛湖上觀梅

細雨春波遠浸天。梅花爛漫滿溪灣。烟中人語前村樹。雪裏雞聲隔岸山。畫槳每侵疎影瘦。芳尊渾帶冷香還。絕勝雪夜尋安道。歸路漁燈照醉顏。

寄家祖生大兄郡中

誰道湖山尙近家。出門回首卽天涯。寒深笠澤愁中雨。春老吳宮夢裏花。客久艱難悲世路。病餘憔悴感年華。不堪孤館懷人處。歸鴈蕭蕭度遠沙。

徐夜字東癡山東新城人縣學生。○池北偶談云東癡年二十九卽棄諸生掘門土室絕迹城市。有朱桃椎杜子春之風舉博學鴻詞以老病辭。○詩格清瘦自然者近章左司刻削者近孟野。

### 初夏田園

朱夏輒復變。深綠日以肥。感彼生物勤。節候曾不違。清晨荷鋤出。田間人尙稀。觀物適自然。時見朝雉飛。不惜筋力疲。但恐坐食非。作勞有時息。高春行來歸。端坐撫素琴。可以理朝饑。

### 詠意

凡骨難遽化。仙藥不可求。一身爲物役。未可輕王侯。曠士洞達心。無爲生遠遊。遠遊亦有方。九州非一州。常恐血氣軀。車馬生墳邱。試聽螻蛄聲。語默成春秋。山嶽自終古。江海日夜流。漁洋云車馬生墳邱與大逝酒漿五字相類似仙靈語。

### 九日得顧寧人書

故國千年恨。他鄉九日心。山陵餘涕淚。風雨罷登臨。異縣傳書遠。經時怨別深。陶潛籬下意。誰復繼高吟。寧人先生遠辭故國常拜山陵起四語一氣鑄成杜陵遺法。

和秋柳

搖落江天倍黯然。隋隄鴉噪夕陽邊。誰家樓角常霜杵。幾處關程送晚蟬。爲計使人西去日。不堪流涕北征年。孤生蕉萃應相似。怕見殘枝帶暮烟。蕭瑟之音不黏不脫。遠勝漁洋名作。

經嚴陵釣臺

突兀高臺入望平。下臨百尺大江清。足消文叔真人氣。直得狂奴故態名。天位幾移仍舊祚。客星千載屬先生。不從七里灘頭過。誰信巢由無世情。太史公於許由猶作疑詞。有嚴陵始信巢由真有洗耳牽牛之事矣。

富春山中弔謝臯羽

晞髮吟成未了身。可憐無地著斯人。生爲信國流離客。死結嚴陵寂寞鄰。疑向西臺猶慟哭。思當南宋合酸辛。我來憑弔荒山曲。朱鳥魂歸若有神。落句卽用臯羽所歌。

坐放鶴亭

巋然一嶼水回環。想見高風物外閒。墓上梅開春又老。亭邊鶴去客空還。書無禪草逢當世。祠有名賢擅此山。占斷西湖皆宋土。羨他生死太平間。三四用梅鶴未能避熟結意。言外見南渡之西湖不堪棲隱也。

丁耀亢

字西生。山東諸城人。由貢生官蕙安知縣。

老將

老將愁衰落，幽燕氣尚雄。虬鬚猶挂劍，猿臂已傷弓。帝寵嫖姚少，人知頗牧忠。低頭憐戰馬，落日大江東。  
結尤悲壯。

再答山陰王玉映并宗弟睿子

海上仙人挽鹿車，五噫歌就出關初。黔婁偕隱稱良友，班女工文續漢書。玉笈家藏空粉黛，青箱世業伴樵漁。又聞宮壺徵閨範，不去翻來問索居。  
玉映山陰王季仲女，工著述，故以班大家爲比。

久客浦城臺使屢檄不放夜坐達旦

山城風雨夜寒侵，欹枕燈殘耐苦吟。故國青山萬里夢，老親白髮五更心。微官求劾身仍繫，薄俗依人病轉深。自擁孤衾愁達旦，臥聽童僕有哀音。

張實居

字賓公，山東鄒平人。著有蕭亭集。○蕭亭爲漁洋內兄，嘗序其詩，謂生席華贖，鳴鐘列鼎，其所固有，一旦棄之如屣，甘就隱約，豈時命使然，抑有託而逃焉者與。

巫山高

巫山高，不可步。湘水深，不可渡。水有涵湧澎湃之波，山有屈曲崎嶇之路。我欲攀緣狼虎來，我欲徒涉蛟龍怒。相思不相見，沾裳淚如雨。巫山高，空自高。湘水深，空自深。舟車非所願，但願人一心。

雨後

雨歇山欲暝，夕陽在鳥背。孤亭淡清秋，花木有餘態。涼風四面吹，長空蕩殘靄。更望西南峯，窈窕秀如黛。



山樹互幽映。流泉春雲確。獨坐酌芳卮。明月來相對。起寫晚晴入神與高廷禮夕陽雁邊下同妙。

贈宜雨

聞道衡門下。洋洋可樂饑。今茲歷貧賤。斯言若我欺。蘭菊雖可餐。不如藿與藜。芰荷雖可服。不如綌與絺。湘江無快語。監河有哀辭。人生苟困窮。自謀策難奇。北望望北斗。南望望南箕。祇有空倉雀。與我同所悲。

又贈宜雨

世人片言合。盃酒盟新歡。生死輕相許。酒寒盟亦寒。所以古君子。與人愧醴甘。雖言淡如水。水尙生波瀾。末語翻進一層。勉人敦古道交。

九日王秀才攜酒至

繽紛籬下菊。幾枝帶霜妍。物苟有至性。造化亦無權。故人攜酒過。斟酌坐花前。狂歌無宮商。破琴不必絃。麤語桑麻事。稍稍及詩篇。愛茲重九名。不覺已陶然。志節之士與造物爭。爲夷齊一輩人寫照。

落葉

西風吹落葉。解作淒涼聲。一朝辭故枝。飄飄難爲情。坐觀此凋喪。我心亦不平。轉盼陽春至。落者又復生。葉葉還如舊。妍綠映日明。始知天下事。待時貴無爭。得失如循環。消長無定形。

山中卽景

兩髻鬢鬆曳葛裙。閒身許入野樵羣。衆禽見慣皆相識。五穀生成半不分。肌骨春來癯似鶴。心情病後懶如雲。琴殘弈罷先生醉。一枕高眠到日曛。

### 大遊仙

姑射仙人綽約形。初承帝命入天庭。霜清玉斧催修月。水冷銀河看種星。漢女驂鸞雲作旆。湘妃媵鯉霧爲軒。金泥祕籙新讎罷。詔錫長生億萬齡。修月種星工絕。

### 王秀才將卜居象山問風土因答

休將風土問山翁。欲習山翁莫憚窮。有徑皆穿紅樹裏。無人不在白雲中。花香鳥語隨時變。水色嵐光到處同。夜半柴門常不閉。南邨頗有太平風。

### 寄懷王秀才

如君莫歎少知音。萬古文章一寸心。賤至侏儒猶有粟。人能辭統亦多金。魂銷別路梅初發。眼看閒窗草漸深。冀水燕山何處是。蘧蘧好向夢中尋。見庸下之材。偏遇合也。

### 桃花谷

小徑穿深樹。臨崖四五家。泉聲天半落。滿澗濺桃花。

### 初秋偶題

颯颯西風吹薜蘿。炎天伏枕一時過。山中事事秋來好。只恐浮雲變態多。

夜雪

斗室香添小篆烟。一燈靜對似枯禪。忽驚夜半寒侵骨。流水無聲山皓然。左不明點雪讀末句神於賦雪矣。右司門對寒流之後復見此詩。

張篤慶字歷友山東淄川人拔貢生著有崑崙山房集。歷友學殖淹博揮洒千言同時諸前輩不為冠世之才不虛也。試輒冠曹時宮定山中丞為學使以明經薦山左第一人。就京兆試不

過歸而處崑崙山不復出矣。杜門著書有八代詩選。班范肪截五代史肪截兩漢高士贊等書卓然可傳。豈以名位之有無為輕重耶。詩古今體兼善。宋元習氣不能染其筆端。

鸚鵡洲哀辭

炎精滅。龍為鼠。羣雄鬪。烈士忤。懷刺獨行徧九州。誰其識者孔文舉。薦士既不成。翻與死為伍。鄴下小兒競學語。許昌庸奴安足數。監廚借面良堪悔。禰生禰生氣如虎。漁陽按節三搥鼓。岑牟單絞目無覩。睥睨阿瞞相爾汝。借刀殺人向荆浦。江夏豺狼曰黃祖。當筵落筆賦鸚鵡。生平謾罵膺礮俎。不可一世橫千古。乾坤踟躕歸黃土。芳洲何蒼蒼。衰草何茫茫。為君一招魂。魂兮歸故鄉。楚國山川蘭蕙芳。江聲浩宕風悲涼。風悲涼。芳洲澗。乘白雲。兮駕黃鶴。嗟嗟百鷺鳥。不如一鸚鵡。衰世舉足妖氛惡。至今血照晴川閣。鄴下人豔稱之。此目以許昌庸奴真蟻觀曹氏也。為才人吐氣中仍見其以才買禍兩層並到。

杖頭錢

富莫富於杖頭錢。貧莫貧於嚴道之銅山。銅山鑄錢萬萬千。到頭不得名一錢。杖頭百錢真我有。取自杖

頭且沾酒。今日百錢。今日醉得錢。沾酒常酣睡。君不見何曾一日食萬錢。便欲下箸心茫然。洛陽離亂救不得。縱饒沾酒無顏色。眼看荆棘埋銅駝。錢乎錢乎奈若何。爲守財虜棒喝也。後半所見尤大。

宋趙千里海天落照圖

千里名伯駒畫。爲北宗中高品。

南渡以後推丹青。入妙首數天水生。光堯皇帝重毫素。集英殿裏揮御屏。賞賜一時頒內府。珊瑚碧玉黃金繪。雲麾將軍有遺響。夏圭馬遠同馳聲。怪石盤繪世所貴。浮巒煖翠千人驚。零紈斷素久磨滅。譬如孤鶴遺脩翎。今茲之圖何處得。海天落照臨蓬瀛。蒼茫島嶼在雲際。居然蜃市紛縱橫。貝闕瓊樓互隱現。溟渤浩蕩朝玉京。金芝瑤草安可數。時有仙侶飄華纓。方壺員嶠生筆底。又如霞起連赤城。鯨濤鼉虬走寸腕。依稀噴沫蛟龍腥。手招徐福呼不起。三山縹渺開金庭。海堧洲渚勢迢遞。芥舟葉葉飛蜻蜓。碧嵐翠靄千萬疊。畫工得勿勞經營。一峯忽起冠雲杪。遙睇衆嶺猶列星。空齋臥遊到懸圃。便欲擊汰還揚舲。琉璃萬頃海煙滅。濯錦錦江如練明。枕碧亭邊啓紺篋。枕碧亭。焦簡庵亭名。耳畔但覺天風鳴。庭隅落日杳無際。搔首海天何限情。浩氣凌空。近信陽北地一派。

大梁城東南弔信陵君墓

邯鄲應與賦同袍。公子翩翩氣自豪。不少衣冠歸趙勝。誰將戈甲走蒙鰲。大梁上客揮孤劍。臥內兵符勝六韜。今日九京良可作。愧無盃酒奠蓬蒿。平原直豪舉耳。借作陪筆。乃見魏公子之高。

憶舊

廣寒宮裏盼飛仙。月色溶溶玉有烟。半臂偏憐宋學士。曉風爭唱柳屯田。落花無語歸春水。弱絮多情上酒船。聽罷筵前囉嘖曲。不須更憶想夫憐。

述懷

天外層城近日邊。芙蓉爲苑玉爲田。夢迴瓊島三千里。心逐雲和廿五絃。薜荔風高悲楚客。蒹葭霜落對秦川。生憎綠鬢人將老。猶抱遺經亦可憐。悲己之不遇也。託以比興。令人思絃外之音。

碧城

王母西來曉露濃。碧城隱隱月溶溶。雲中懸圃三千里。天畔瓊樓十二重。手種桃花多歲月。自尋瑤草飼鸞龍。雙成已到人間否。海水枯時定一逢。冀賞音之終遇也。懸圃瓊樓雖有三千里十二重之遠。而能手種桃花。自尋瑤草。則海枯石爛。自逢知己矣。與述懷一章。兩兩對相。

明季詠史

倦勤當日說神宗。高臥深嚴祕九重。玉輦經時登漢闕。鸞章隔歲下堯封。千官補缺虛龍袞。四海軍儲廢大農。縱使養癰終必潰。乾坤無恙且從容。神宗晚歲。臣下奏章。有二年不批答。軍儲有經年不發者。自以養癰信然。

盈庭讜議積封章。宗嗣常深未雨防。鶴禁無人瞻少海。龍漈有壘在昭陽。漢高終不私如意。竇后由來愛

孝王辛苦江南王相國重來北闕定儲皇爲建儲不決而言禍水始於鄭氏後三案皆胎於此

蜀洛當年黨議多分曹日日競風波顧厨品藻矜名字牛李升沉密網羅私忿漫勞登白簡濁流真欲棄

黃河堪嗟此輩爭門戶國是調停奈若何爲黨禍而言沈一貫之陷郭正域尤顯然者

敕使當年出未央紛紛礦稅采諸方山川絕少金銀氣誅斂何殊花石綱一任豎貂盤社鼠誰將鹽鐵議

弘羊可憐國脈從茲喪浪說朱提入太倉此極言礦稅四出之害

遺詔何曾立九嬪漢家傾國李夫人龍髯此日方長痛鶴籛經時未即真長信宮中猶卻輦朝元殿上已

批鱗深心終是資元老免使垂簾溷紫宸此言李選侍移宮始末

雕鏤嬉戲擅烹皇婦寺相連說趙張北寺獄成傾俊父西園例在鬻冠裳清流白馬空朝右墨綬青衫去

廟廊郭泰當時憂殄瘁漢家十葉已淪亡時魏忠賢客氏連結楊主假子義孫競進構東林之獄戕虐士類至臺山去國而正士無噍類矣人之云亡邦國殄瘁古今有

同慨焉

同文黑獄少完膚妖燄熏天萬事誣酷吏憑添沉命法奇刑盡隸執金吾勾陳天遠浮雲蔽貫索星明正

氣孤翻借封疆成鐵案誰憐道濟血糝糊時田爾耕許顯純爲鎮撫司特設極刑謂楊左諸公受熊廷弼金因鍛鍊成獄殺廷弼以殺諸公也視同文館獄禍尤烈矣

思陵苛察誤宸聰國計周章踐祚中高棟已看傾大廈神姦轉復認孤忠論兵轆轤終無定馭將寬嚴失

至公獨有儉勤關睿慮年年水旱瘁深宮思陵苛察與憂勞國計一一見之而溫體仁之大姦倚爲腹心尤其所短也溫死謚以文忠真不可解

赤眉分道亂中原。海內征輸怨正繁。天子常虛大盈庫。軍儲折入小黃門。傷心陵墓樵蘇盡。回首乾坤戰氣昏。賴有范倪諸節烈。猶能一死答君恩。流寇四起。府庫空虛。而利權歸於宦寺。此亡國之徵也。范倪諸公一死報國。自盡臣節而已。

潼關不守竟倉皇。遺恨中涓促喪亡。驍賊直聞趨洛下。行營又見潰河陽。將軍力戰捐軀脰。豎子迎降類

犬羊。從此三關似剗竹。誰人決策守金湯。孫傳庭之敗。由於中人促戰。潼關破而大勢去矣。五語言周遇吉之死戰。六語言姜瓖王承蔭之迎降。

銅蹄誰見下襄陽。坐致鯨鯢入未央。祕殿遺音憐赤子。大荒披髮訴高皇。九原龍劍沉王氣。三月烏號哭

國殤。死難紛紜酬養士。由來義烈重綱常。此言思陵不辱社稷。而殉難衆多。由三百年養士之報。從來史書所未有者。

坐使神州竟陸沉。秋江百丈莫言深。南還不少黃潛善。留守空爲宗汝霖。下瀨將軍窺故國。太行忠義感

雄心。望仙閣裏千迴醉。祇是難忘玉樹音。黃潛善指馬士英。阮大鍼言宗汝霖。指史可法言。見史之必不能勝馬阮。猶宗之必不能勝黃汪也。

羽書百道起黃塵。一馬臨江入紫宸。國恥不言教戰士。時危亟欲選才人。空餘跋扈桓宣武。豈有勤王溫

太真。燕雀巢堂朝夕計。延秋門外走躑躅。此見左良玉之起兵。並無勤王之志。比之桓溫極合。○以韻語紀實事。所謂詩史也。祇從神宗起。由國家頹墮。劇於神宗。故不

及穆宗以上。

鄧艾廟

奇兵未阨一丸泥。綿竹懸軍萬仞梯。奄忽當塗更典午。翻嫌多事鄧征西。

錢柏齡字介維。江南華亭人。

遊通天巖陽行先隱處

蘭楫亂奔流。筍輿出幽微。澗路凌高寒。晴空恣雄眺。越彼停雲岡。石勢愈巉峭。仙源湛水木。萬古藏僻奧。鬼斧亦何工。玲瓏鑿一竅。碩人此盤礴。千秋儼遺廟。仰瞻媿後塵。冥搜託前導。更窮邃洞紆。忽訝懸崖倒。羣山青濛濛。惟聞狻猊叫。既異少文遊。良慰康樂好。緬想開闢初。矯首發長嘯。待緝薜荔裳。來臥芙蓉嶠。爲問巖棲僧。荒蘿幾人掃。

吳

字仁趾。江南新安人。○仁趾與寶賢有二吳之目。而寶賢以性靈見。此以情韻見。幾於莫能相尙。

和宋秀才詠折花

今朝蝴蝶多。南園花發徧。佳人競攀折。新粧何婉變。葉低防冒釵。枝高羞露釧。寧辭纖指勞。但恐牆東見。  
傳出美人折花之神。六朝風韻猶在。

舊遊

舊遊最憶三茅峯。往來采藥多仙蹤。菖蒲潭上花紫茸。勾漏井內丹砂紅。朱顏好駐不肯駐。是時只貪山水趣。誰知一別年向衰。幾日浮生悔虛度。逝將重訪煉金人。昨夢華陽洞中去。

哭汪三韓

送我南遊日。傳杯頗盡歡。那知成永別。猶記勸加餐。落木秋城暗。歸舟暮雨寒。依稀追餞處。到眼劇悲酸。



阿玉

阿玉殊堪憶。春來見面稀。去年方解語。臨別一牽衣。鹵井黃沙路。潮灘白板扉。昨逢鄰曲道。日日望予歸。  
詩之至者。不外一真。此直字字真矣。

酬朱穆公天台見懷四韻

遠媿遺榮客。深居桐柏山。有時駕鸞鶴。遊戲九峯間。見我題名處。巖花幾度斑。因風發高唱。千里慰離顏。  
八語一氣。風格自高。

懷吳野人先生

伯鸞居廡下。元亮老籬邊。隱矣吳夫子。高風齊二賢。賃舂常作客。采菊始歸田。想見行吟處。溪流繞數椽。  
五六仍用分頂氣疎法密。

悼亡姬成去豔

春歸無復見蛾眉。漠漠流塵晝掩帷。鬪草尙憐扶病日。看花長記返魂時。  
自注。沒一夕復甦。索桃花數枝插枕畔。少頃而逝。  
翠袖籠猶在。影暗紅窗鏡未移。從此鍼樓愁獨上。去年同製鵲橋詩。

送陳射文出關省親

北望雲山氣早秋。煩將一語慰邊愁。時清屢見生還客。會有恩波到白頭。  
射文之親。應是遺戍關外者。故以生還望之。

展園次兄遺札

草綠池塘夢已殘。西堂無復共盤桓。空餘懷袖二年字。零落銀鈎忍淚看。

卷十五

吳

雯字天章。山西蒲州人。應博學鴻詞。不遇。著有蓮洋集。○徵君詩清挺生新。趙秋谷宮贊謂千頃之陂。不可清濁。天姿國色。粗服亂頭。亦佳。恰稱其詩之分量。

遙題王咸中石隴山房

積水浮九州。東南益蕩涵。人家半洲島。蘿篠互蒙密。具區我舊遊。石隴君栖逸。至今堯峯上。猶上堯時日。窗外一湖明。階前衆山出。春風散巖花。細雨溜崖蜜。仙靈每來往。真儒間儔匹。表聖具生壙。維摩得丈室。泉聲四回抱。嶺勢百峯嶺。何日復籩糧。爲君訪衡泌。堯峯十字。新城尙書。以此賞識。

黃湄先生游太華山遂得結屋地賦贈

車箱谷口雲。白照松間路。誰能訪叔卿。巖竇一身度。黃門具奇情。振策御風步。萬仞入洪濛。理勝境無怖。壑轉晦明錯。樹老丹青誤。俯見蒼蒼原。明河正東注。驟雨忽翻瀑。肘腋蛟螭怒。須臾巨長虹。關陝半呈露。徑側修竹倒。石迸垂藤護。相逢紫烟客。目擊道皆寓。齋房肉芝香。石困松花聚。卜居志已得。探幽坐成趣。嗟我生勞勞。入世每多懼。夢繫毛女壇。身遠將軍樹。日月對晴蓮。塵容自生妬。何年便結鄰。同住雲生處。

十字奇警寫長虹從未到此。

羊山

落日山風吹。長松亂清影。白雲逗殘雪。忽見前峯暝。野鳥下寒竹。孤僧汲修綆。聊欲遂幽尋。理策度西嶺。  
左司

雜詠

樓居有何好。仙人苦留戀。金銀雜玉階。終是世俗見。王頭與士壟。達者兩不羨。富貴不可求。況復貧與賤。嗟我果何從。一愚了千萬。  
即韓子歸愚識夷途意寫來生辣。

次青縣題壁

去年九月長安來。鯉魚風起船旗開。本年三月舊山去。馬上綠楊掠飛絮。舊山風景復何如。昨日家人有報書。當門萬里崑崙水。千點桃花尺半魚。

憶棲巖寺

最憶棲巖寺。招涼有舊亭。河流週郡白。山勢入關青。崖斷蜂留蜜。松高鶴墜翎。盧師吾有約。許共一函經。  
新城欲以山入百蠻青句敵之。

望華山

蓮花五千仞。靈孕自洪濛。每變風雲色。能參造化功。陰將連太白。氣自滿關中。氣自滿關中。五字千古。

### 雲中寺

天半雲中寺。四山皆白雲。我來雲際宿。卻憶雲中君。塔影當晴出。濤聲入夜聞。此中有猿鶴。莫勒北山文。起四語。盛唐人有此風骨。

### 寄向書友

曾聞向始平。能注南華經。之子真苗裔。江山發性靈。寒蛟終謝餌。老鶴不梳翎。載酒鶯花節。長吟入洞庭。

### 古意東徐勝力

美人豔南國。顏色如朝霞。昨來耶溪上。妬殺芙蓉花。秦珠隨月滿。越練逐風斜。獨慕孤高義。今年尙浣紗。太白。

### 宿吳山寺樓簡嚴灝亭先生

蕭蕭暮雨急寒榛。獨倚高樓少四鄰。江上鼉鼉悲鼓角。下方燈火散星辰。梅花何處三更笛。寒食無家萬里人。不是相逢嚴僕射。天涯誰念草堂貧。一句含三層意。從萬里悲秋長作客一聯悟出。

### 明妃

不把黃金買畫工。進身羞與自媒同。始知絕代佳人意。卽有千秋國士風。環珮幾曾歸夜月。琵琶惟許託賓鴻。天心特爲留青塚。春草年年似漢宮。弔明妃并寫懷抱。方脫前人束縛。

吳門初春

聞道江干冰漸消。眼看芳草坐無聊。酒杯總使愁中得。春色終難客裏銷。山鳥漫吟泥滑滑。吳孃偏唱雨瀟瀟。歸時借問金陵路。桃葉新添幾尺潮。秀絕。

齋居

瓠落何須慮大樽。蕭然無客款柴門。春秋未習嚴彭祖。紀傳常輕褚少孫。下澤幾曾驅款段。長河終擬溯崑崙。雷聲太白連朝急。次第牆東過雨痕。

文中子舊居

汾水湯湯繞舊居。白牛溪畔雁飛初。早知道不關窮達。應悔金門輕上書。上書於隋文。非其時也。如此持論文中亦應首肯。

題雲林秋山圖爲查德尹

經營慘澹意如何。渺渺秋山遠遠波。豈但穠華謝桃李。空林黃葉亦無多。石田翁做雲林畫。其師杜瓊從旁觀之曰。又過矣。又過矣。解得

此意方得此詩之妙。

贈少年

二十少年望麟閣。盤馬彎弓氣磅礴。眼前都尉知是誰。雲中但看雙鵬落。

戲贈李武曾

沉醉東風盧女絃。泥人佳句滿題箋。預愁長夜無春色。徧種桃花作墓田。猶有未忘  
生死者在。

馮

樾字个臣江  
南松江人。

過陳留

天邊鵲影客心傷。落日驅車過外黃。誰具草蔬邀郭泰。自慙名姓賞中郎。巴河風起荒烟黑。博浪雲開遠樹蒼。明發梁園舊遊地。十年潦倒愧行藏。典切處有  
自己身分。

楊

岱字東子四  
川彭縣人。

棧道

鳥道與天齊。盤雲萬壑低。層巒飛瀑下。空木亂猿啼。山勢危巴郡。邊聲隔隴西。可憐存輦路。烟雨草萋萋。起步有  
聲有勢。

夜泊

夜船將泊棹歌齊。芳草萋萋野路迷。只有斷猿無宿處。最高枝上徹明啼。

劉淑頤

字百年湖  
廣麻城人。

四時詞

雲母空窗曉煙薄。溫庭筠池邊雨過飄帷幕。許日長風暖柳青青。賈銀線千條度虛閣。韓捲簾巢燕羨雙飛。

隱羅芳草王孫歸不歸。章曾寄錦書無限意。劉篋香消盡別時衣。錢

午睡醒來愁未醒。張子煩襟乍觸冰臺冷。韓白蓮池畔送清香。皮樓角漸移當路影。白居易臨風興歎落

花頻。魚玄又喜幽亭蕙草新。杜永日迢迢無一事。章雙雙鬪雀動階塵。元稹

水映輕苔猶隱綠。馬懷素夜窗颯颯搖寒竹。劉井邊疎影落高梧。羅鳥啄風箏碎珠玉。元稹覺來紅樹背銀屏。

莊露溼叢蘭月滿庭。孫扇閉朱門人不到。魚玄輕羅小扇撲流螢。杜

城上暮雲凝鼓角。許狐裘不煖錦衾薄。岑樓寒院冷接平明。李商簷外霜花染羅幕。陸龜煙生密竹早歸

鴉。郎士元向鏡輕勻襯臉霞。韓遲日未能消野雪。皇甫冉故穿庭樹作飛花。韓愈○音節悠揚無集句痕迹與

贈宋牧仲方伯

曾入甘泉侍武皇。李暫隨紅旆佐藩方。莊長承密旨歸家少。王建出使星軺滿路光。錢謀略久參花府盛。韋

年風流三接令公香。李共言東閣招賢地。孫肯為詩篇問楚狂。周

邵長蘅。字子綸江南武進人十歲補弟子員後為奏銷案結誤以山人終其身著有青門集○山人

滄溟。乃變蘇黃范陸之派亦宋詩中矯矯者然視從前如二手矣茲所存者皆青門鹿稿旅稿中作贖

稿中祇  
略采云。

### 經彭蠡湖口望廬山

晨帆發馬當。景昃停湖匯。北渚搖清陰。南灣走蒼靄。迴眺極芊緜。羣山爭瑣碎。蒼然雲霧中。拔起匡嶽大。絳氣天闕縈。白雲山腰會。遠岑抱積雪。近巖屯霽霽。倒景澄湖光。飛瀑溼天外。延佇情彌結。攀躋阻莫遂。五老空煙霞。九疊竟茫昧。慚愧夙心乖。臨風一長嘅。連下潯陽舟中作。胎源小謝。

### 潯陽舟中作

羈心零雨悲。水宿風潮倦。茲晨廓澄霽。沿流愜佳玩。綠英媚芳洲。雜花覆春岸。青天鏡中流。浴鳧沙際亂。落日碎江光。林巒采餘絢。靡靡遠烟生。霏霏夕暉眩。蒼然望廬山。山靄旦暮變。絳霞晨干霄。嵐氣夕羃巘。近巒或浮黛。遠瀑如縈練。賞奇得新歡。覽物有餘戀。山水憺娛人。客懷爲一遣。

### 雜詩

撫劍忽不懌。去上歌風臺。河流日夕迅。莽莽寒雲隕。帳殿下牛羊。鼃鼠空蒿萊。極目見芒碭。古人骨已灰。蕭曹自刀筆。樊灌奮駑駘。歛起附龍鳳。英風被八垓。途窮蹶駿足。運適伸庸材。擾擾路旁子。疇知衷所哀。起勢慷慨。途窮二語。括盡揚子解嘲中後一段意。

### 漁父



東湖有漁父。艇倚清溪瀨。垂竿秋雨中。櫂歌夕陽外。九月蘆花白。西風鯉魚大。釣亦未必得。得亦未必賣。扣之默無言。鼓枻悠然邁。覺非夷非惠。聊以忘憂。猶不免自道身分。此更超然。

熊經略

經略用遼瀋完。經略罷遼瀋殘。再起田間賜劍印。經撫日戰玄黃分。六萬蕩平竟何有。撫臣主戰經主守。一夜廣寧風鶴驚。撫臣先走經亦走。撫臣庸愚何足齒。奈何經略也惜死。若使慷慨提孤軍。拮据殘疆報天子。縱然馬革裹尸還。九尺昂藏一男子。奈何經略也惜死。不死西曹死西市。九邊傳首魂有知。目炯電光血裂皆。經略之誤在廣寧之走。其實經理遼瀋。具有將略。不應與王化貞同罪也。傳首九邊。羣姦借經略以殺楊左諸公耳。天下冤之。一結凜凜有生氣。

周將軍

櫓槍狂驅萬貔貙。橫嚼九州無完土。邱成血骨益成池。所過堅城孰抗拒。寧武一城如彈丸。誰與守者周將軍。將軍票鶴健絕倫。生駒攪陣刀截雲。見賊如蝟身逾輕。手挈髑髏茜袍腥。力竭罵賊血嚼齧。旗竿矢集怒益震。閨中紅顏能殺賊。十發十殪無虛鏞。崑山火燄紅玉爇。天壤寥寥兩全節。大同宣府真奴儕。兩鎮降書同日來。長驅京闕疾於矢。賊談寧武猶咋指。列鎮盡如周將軍。我輩那能飛至此。賊逼寧武。將軍戰死。夫人劉善射發一矢。輒斃一賊。城陷。闔門自焚。未即用流賊語作結。健悍有力。○大同宣府謂姜瓖王承蔭之迎降也。詳見後李玉洲太史詩中。

解仲長畫十八學士圖歌

秦王虬髯一尺鐵。提槩親攔中原血。畫開天策羣龍趨。諸公袞袞皆英傑。當時立本傳畫圖。千載想像猶能識。我家此障解翁筆。宣和院體工設色。臺榭渲染輝丹青。宮殿玲瓏麗金碧。頗工人物良苦思。舊本摹拓開鬚眉。宮袍緋紫雜青綠。腰帶撻尾紛悅垂。髣髴銅龍散講後。晝遲行樂分曹偶。房公微笑杜公坐。投壺散帙無不有。就中一人落筆酣。細看恐是虞世南。其餘學士貌各異。峨峨列坐影華簷。卽論畫馬亦殊絕。奚駒十八森成列。銀鞍金鏃音晚高纏鏤。三匹翹足五匹齧。太液淡淡春風波。黃鬚奚官白鬪鞞。牽來十匹池上浴。丹鬚翦刷噴桃花。可憐人馬爭輝寵。憑軒坐久神逾竦。憶昔風塵際會初。君臣契合水與魚。功成開府迨清暇。春容翰墨非荒娛。只今朝野仍艱虞。時危整頓英雄需。撫圖懷古心鬱紆。書生豈有封侯顛。慷慨擊碎玉唾壺。高吟梁父浮雲徂。十八人豈能悉數。點房杜虞三人。其餘以虛筆該之。可悟繁簡虛實之法。

### 五人墓行

春光澹沲山塘路。遊絲晴絮嬌芳樹。路旁剝落三尺碑。云是前朝五人墓。借問五人誰。中間突兀顏珮韋。東西四塚排纍纍。墓門晝鎖松風迴。書生曾讀前朝史。依稀能說前朝事。天啓年間歲在寅。緹騎四出驚狂獠。此時一舸飛吳閫。鬪鞞繡襖來昂藏。吏部短衣出就逮。自注周忠介順昌觀者擁塞如堵牆。轟薨萬口那可辨。哭聲震天日色黃。五人大呼奮臂起。形勢欻忽厖羹糖。誰何一校先橫屍。中丞卻避御史忙。詔收棄市罪激變。至今死骨傳芬芳。憶昔逆闖恣塗炭。鏃斧銅甕衣冠殃。諸公駢首填牢戶。東林首指左與楊。篋輿

就考備五毒。尸蟲噬肌不得葬。

叶茲郎切

委鬼更灼燕天燄。穹祠金榜蛟龍翔。鳳闕敢擬至尊埒。龜趺忍立成

均旁。往往嵩呼九千歲。冕旒袞玉爭輝煌。寧知勢歇頓翻覆。阜城自絕閹奴吭。生祠處處毀斥盡。木石估

值充邊防。豈惟閹祠旋毀撤。廿年變故那能說。鼎湖鳧雁飛滿天。鍾山天壽狐狸穴。玉匣珠襦夜不扃。皇

陵白骨愁冬青。眼前寂寞一抔土。參天檜柏蒼蚪鱗。年年寒食山橋畔。指點飛花說五人。順敘魏奄之流

從擊疑騎後。用憶昔二字追敘。自得順逆相生之法。末幅蒼涼激壯。一往神來。

沛縣官舍留別楊簡庵表兄

我騎白鼯浮江來。連濤倒蹴羣山開。黃河咆哮黑浪惡。一月始及歌風臺。骨肉五年不相見。風塵歛覩吾  
兄面。我昔弱齡今有鬚。君亦蹉跎四十餘。薄宦千里不快意。一官仍擁青氈居。感君意氣與君好。流連累  
月開懷抱。夜飲酣呼玉屈卮。晝遊連騎金腰褭。高秋九月天氣涼。呂母塚上塵沙黃。出騎快馬風比捷。從  
少年輩逐兩轡。弓弦拓作礮礮響。餓鴟飛去噉空桑。割鮮野飲氣益壯。肯作新婦車中藏。歸去歡宴不知  
夕。羌樂琵琶鼓箏笛。明河欲沒牛西斜。主人稱壽客離席。吁嗟遊子如轉蓬。作客未幾行窮冬。忽憶故鄉  
行樂好。黃雞正肥新籩紅。明日驪駒更東首。馬上別君但揮手。北風鬢發短後衣。蕭條中野行人稀。廣陵  
驛前暮潮落。京峴山頭雪片飛。河水遙遙接江水。別淚與之誰是非。超然而入。中射獵一段。排宕飛揚神似太白。

雪後登滕王閣放歌

我攜鐵篋羅浮回。豫章城頭吹落梅。羅浮仙人太狡獪。蜚廉滕六供呵撓。亂灑梅花徧原隰。千峰一夜爭  
皚皚。曉披白鶴氅。獨上滕王閣。九疊屏風失青翠。瓊樓十二垂珠箔。長江滟淼迷孤篷。漁舟藏浦高桅泊。  
團團萬頃水晶盤。一片寒光霧寥廓。初疑海上浮神仙。蓬壺縹緲不可攀。其物禽獸皆白色。自注。用封禪書語。銀  
爲宮闕虛無間。又疑誤誇玉虹入月府。玉鸞抱杵凍不舉。霓裳對對舞仙姝。清虛高處寒如許。回頭雉堞  
堆璨瑳。簷冰拄地鐸鈴語。鱗鱗萬瓦溼煙浮。旋覺此身尙塵土。忽憶滕閣今千年。滕王蛟蝶隨荒烟。子安  
退之骨已朽。何況珠簾歌舞當時妍。惟有西山只如舊。此中棲隱多神仙。洪崖丹竈流銀汞。蕭史茅龍耕  
石田。我欲左攜葛勾漏。右挽梅子真。徑呼玉蚪騎上天。雲中縞鶴紛翩躚。或言神仙之說竟茫昧。且飲美  
酒醅。朱顏向晚江山轉清絕。逸興擎雲坐超忽。夜深蹋雪還上來。揮手寒窗招海月。茫洋渾涵。千變萬狀。極才人之能事。

### 江急

江急雨冥冥。江豚吹浪腥。濤奔遠岸白。峯逐去帆青。野戍春低樹。灘舟火聚星。長年趁風便。向晚更揚舲。

### 九江

吳楚一江共。波濤九派分。湖光寒自白。廬嶽曉常雲。虎鬪荒村跡。猿啼落日聞。琵琶亭廢久。楓葉正紛紛。

### 哭亡兒士騷

遺編緜不忍。轉憶課經時。過愛翻成薄。求全屢受笞。一燈寒夜影。十載膝前兒。辛苦成何事。酸心我不慈。

即鞭撻過多，憐較少意。  
一經烹鍊，便覺不凡。

鹽櫛經旬，嬾衣衫。衫漬淚痕，伶俚餘此日。門戶且誰論，痛我無兄弟。憐渠是冢孫，昨朝寒食奠。隻立黯銷魂。  
直白語，悲痛彌深。一結，即柳州寄許孟容書中顧盼無後繼者意。

### 登歌風臺懷古

芒碭真人乘赤龍，故鄉行幸有遺宮。壁埋蝌蚪荒碑在，木落牛羊寢殿空。湯沐百年歡父老，衣冠十日擁兒童。淮陰已族黥彭醢，慷慨何須悲大風。  
歌風時韓彭黥俱已族矣，思猛士何心耶。

### 望鍾山

陪京雉堞迥蒼然，重憶高皇逐鹿年。汗馬北騰穿碣石，長虹南倚劃吳天。鼎湖龍去離宮鎖，複道花繁紫禁偏。悵望寢園今寂寞，牧人秋臥孝陵烟。

### 登吳城望湖亭

鄱湖湖合贛江流，倚檻江湖望轉幽。湖勢北搖匡嶽動，江聲西擁豫章浮。魚龍晝嘯千艘雨，日月晴懸一鏡秋。回首戰爭曾此地，荻花蕭瑟隱漁舟。

### 題冀涓公所藏楊忠愍梅花詩卷

涓公大父梅軒，故官比部郎。忠愍頌繫時，先生傾身囊饋。忠愍高其詣，爲作此卷。同時周旋詔

獄霸州王繼津。太倉王元美。及應生最著。先生事世鮮知者。康熙丙辰。渭公來吳閩。出卷示余。蓋百二十餘年物矣。展卷肅然。敬題其後。

黯淡細縷墨影寒。那能展卷不洩瀾。當關虎豹糜軀易。畏路風波仗友難。濺血九原仍化碧。批鱗一疏獨留丹。文山詩句眉山筆。古瘦清香再拜看。自注。忠愍有古瘠清香原太始之句。○重忠愍及周旋詔獄畫梅意。只用一點已足。

### 登太湖西峯

山色蒼蒼積翠迴。沿緣仄徑入莓苔。嶺邊風葉藏僧寺。樹杪飛泉灑客杯。清磬一聲松子落。白雲萬頃太湖來。三高惆悵俱陳蹟。落日山空樵唱回。

張

字處中。江南華亭人。

### 飲沈驚生池館

嘉樹俯城陰。居然爽氣深。非秋常落葉。不夜有歸禽。邱壑容芝草。冰霜耐竹林。主人山水志。誰與共清音。  
送李素心之岳陽

畫舫中流芳草齊。臨風張樂洞庭西。從官諭蜀通三峽。大將平蠻下五溪。衡嶽雲開鴻雁度。巴陵月落鷓鴣啼。好憑羽扇成雄鎮。荒服於今靖鼓鼙。初平三楚之後。故有領聯。

陸次雲

字雲士。浙江錢塘人。官江陰知縣。著有澄江集。○雲士詩本真性情。出之故語。多沉著。而所選詩。轉在宋元。以之怡情。不以之爲宗法也。

雜感

雷霆能擊人。獨畏操莽威。鬼神能福人。獨於孔孟遺。今古無鑒戒。禍亂相乘除。問天天不言。屈平空著書。  
四十字中。可抵一篇天問。

北地每苦寒。狐貉出天山。南地每苦熱。絺葛生於越。人之所欲須。天意預爲設。大哉造化功。於世何所闕。  
天道自然。君子亦因其自然而已。

芝蘭出穢壤。芙蕖生淤泥。賦性自芳潔。於此徵神奇。君子處濁世。師惠以全夷。何必登首陽。高歌懷采薇。  
見嫩嫩易汗。曉曉易缺也。師惠全夷。指出持身處世之道。

出門

堂上有慈親。身外無昆季。承歡賴妻賢。委之以爲弟。弱女方四齡。初知離別意。恐其牽袂啼。深傷遊子緒。  
乘彼睡未醒。溫存加絮被。拜母不能言。揖妻交重寄。此際心若摧。出門方隕涕。  
字字真至。出門方隕涕。前人未經道過。

回首望家山。漸遠山漸低。側聽岸旁語。鄉音已漸移。放舟入大河。烟水無端倪。偶逢相識人。遙呼心依依。  
無如交行舟。倏忽已遠離。

泛洞庭湖

大浸數五湖。莫大於洞庭。時當春夏交。雪融水氣蒸。仰視但有天。與波同一青。茫茫六合中。不見大塊形。

三老弄洪濤。澎湃意所輕。至此乃敬慎。風正始揚舲。同舟色俱靜。半帆容與行。此中有楠木。千載成英靈。出沒每不時。異響令人驚。舟婦散紙錢。徐徐乃就平。死生呼吸間。宴坐猶兢兢。吁嗟縹緲中。難測鬼神情。或問傳書事。心知不敢應。是賦洞庭別於賦海楠木數言寫來恍惚變幻疑鬼神

### 君馬黃

君馬黃。臣馬白。君執珪。臣執璧。君意皇皇。臣翼翼。四海會同來。有釋和在鑣。鸞在軾。驕驕八駿不齊色。馳驅不向崑崙陟。馬之良。良以德。

### 誌感

人生當貴顯。每淡布衣交。誰肯居臺閣。猶能念草茅。朱輪來北闕。土室訪西郊。古道今還在。淳風近有巢。

### 登岱

得過三觀古。目上岱宗巔。海吸長河遠。天包大地圓。五更先見日。九點半升烟。孰謂方隅廣。迴環睥睨前。天包大地圓形天地之全也。五字極寫岱宗之高。

### 白溝河

道出白溝河。沉吟喚奈何。古今陵谷變。高下戰場多。厲鬼依殘骨。耕人拾斷戈。烽烟嗟又甚。搔首一悲歌。

### 五溪雜詠



崎嶇幽谷裏。盡是碧雲阿。祖每尊盤瓠。祠皆祀伏波。峒民參漢俗。溪女唱苗歌。漑種漁樵暇。悠然臥薜蘿。挂帆將匝月。猶在亂流中。野豕能飛箭。江豚善拜風。安危憑激浪。行止信孤篷。影落南天外。飄零望斷鴻。

天下大師墓

水關西出隱浮屠。燕子飛來半月孤。病虎無心看北固。潛龍有恨遜南都。十三陵外餘坏土。二百年來失鼎湖。一自桑田成海後。總啼鵲血洒平蕪。天下大師係元僧人墓。建文無出亡之事。前人辨之詳矣。此仍舊說而賦之。○病虎謂道衍也。道衍有北固青青眼倦看句。

疑塚

疑塚纍纍漳水頭。如山七十二高邱。正平只有墳三尺。千古安眠鸚鵡洲。大爲文人吐氣。

詠史

儒冠儒服委邱墟。文采風流化土苴。尙有陸生坑不盡。留他馬上說詩書。

題荆山石壁

寄語山靈聽嘯歌。連城再別歎如何。人間碧眼應難遇。莫產瓊瑤誤卞和。七言絕。每能用意不減。岳鳴。

章靜宜

字湘御。江南長洲人。諸生。○湘御爲素文鶴書之弟。九儀之兄。四先生並擅才華。名滿大江南北。間湘御尤工於詩。近人尠有知者。

擬劉太尉傷亂

宗社觀厄運。夷夏亂皇綱。神州盡糾紛。腥羶逼晉陽。余本炎精裔。投職事危疆。思將南山石。一補天柱荒。

妖氛煽四野。中道罹崑岡。上慙楚包胥。請師救國殃。下愧漢竇融。保境拒強梁。遺軌寧不仰。微志竟莫償。身同南冠囚。撫膺涕泗滂。心如高懸旌。因風尙飛揚。吹簾悽我懷。鳴笳斷我腸。孝行旣已虧。忠名徒自傷。功助付逝水。意氣亦何常。

寫出越石心事詩格亦幾如唐臨晉帖

### 汴梁行

汴州城內風鶴驚。汴州城外連軍營。一夜金隄雷電起。千年玉殿波濤聲。大梁自古繁華地。三市風光最明麗。西連伊闕作屏藩。北控成臯如帶礪。高帝當年闢草萊。分封萬騎自天來。蘭窗仍起飛雲殿。樹寢還通造字臺。子孫奕祀承青社。議親常得君王赦。傳來樂府勝河間。製就新聲誇鄴下。東風十里覆長隄。萬樹千條各向西。珠履盡知公子客。寶釵時見舍人妻。金梁明月空平度。玉津芳草迷歸路。園內雙雙蛺蝶飛。橋邊隊隊驂駟駐。雙雙隊隊更如何。紫陌朱城拂逝波。自言百歲來歌舞。自謂三時競綺羅。綺羅歌舞無窮極。炎天烽火嗟何及。北地誰知青犢鳴。東門忽見黃虬入。飄零雉堞少人行。牙旗大纛自縱橫。波翻夏后前朝廟。潮打梁王舊日城。故侯冷落悲徒步。新鬼荒荒泣烟霧。鶴雀高栖敖氏倉。鴛鴦虛抱相思樹。至今榛棘尙成行。落日寒沙古戰場。無忌已知新去魏。相如不復遠遊梁。遊人對此空嗟悼。胡笳蘆管聲中老。牧馬常過屠肆旁。射鵬每向彝山道。淒涼今古不須哀。極目秋風萬里開。試向東都更長眺。銅駝金谷半荒垓。

此感流寇決河灌城而作也。前寫汴梁之盛。後形汴梁之衰。婉轉悠揚。初唐風調。

晚泊京口

舟行易日暮。旅泊背孤城。酒力當秋勝。鄉心逐夜生。人煙都會地。風雨大江聲。明發空南望。蒼然北固橫。

夏日雜感

蕪城柳色綠成陰。詔遣賢王羽騎臨。風急雙鷗辭塞口。天清萬馬浴江心。虛傳此地繁華久。誰念當年戰伐深。歌吹竹西如尙在。休教笳管漫相侵。

金陵

雞鳴山上滿青莎。玄武湖邊空碧波。草滿故陵埋石馬。月明荒徑泣銅駝。六宮夜雨棠梨落。萬里秋江葦荻多。猶有南朝城堞在。景陽遺恨獨悲歌。聖祖南巡後。修葺孝陵。御書治隆。唐宋碑額。非復向時園寢矣。詩成於未巡幸時。故有第三語。

京口作

鐵甕城西鼓角催。扁舟遙自秣陵迴。天清瓜步中流見。風起長江動地來。楚蜀帆檣千里集。金銀山寺兩峯開。秋光潦倒南遊客。落日魚龍夜夜哀。七律。沈雄蒼老。信陽北地之間。○銀山俗名對金山而言。實卽蒜山也。

顧景星

字黃公。湖廣蘄州人。著有白茹堂集。

題內府所藏唐人百馬卷子

開元廐馬四十萬。天寶從龍誰最健。夜讎火鼓延秋門。晝爭豆莖咸陽店。萬里橋頭百存一。騎去東宮還

幾匹當時芻秣盡凡才。急難何曾見騰逸。此圖蒲稍僅百馬。毋乃樂坊教成者。細看不是臨陣姿。可惜登牀汗流赭。黃衫奚官三五人。鏤花玉帶繡抹巾。羈前寶絡墜金鐸。覆以羅帕承錦茵。可憐賊破西京後。此馬全爲承嗣有。鼓聲應節反見妖。血碎桃花死猶吼。圖藏內府已千年。相傳畫手南唐前。畫師有意惜奇駿。不遣驅馳供舞筵。君看老驥還遭放。儘有驂騮氣凋喪。苜蓿難逢大宛種。荏苒屢溼邊庭瘴。俶儻何須四百蹄。壯觀爭多真畫師。轉思腰褭不世出。天子獨乘何所之。芻秣盡凡才二語。比當時象養庸流。臨難直不識爲何如人也。借題發揮。乃見作手。

汪徵遠字扶晨。江南徽州人。

### 天平石入師子林

深松寒白石。僻路到人稀。仰見高峯頂。孤僧采藥歸。雲多從杖起。鳥不上山飛。薄暮一聲磬。猿公來款扉。向遊師子林。雲滿几席。半山卽無鳥聲。讀此詩。知真寫得景出。

### 上蓮花菴

秋山鐘梵寂。蘿徑上崔嵬。意想不到處。峰巒忽盡開。石牀平落葉。古壁滿荒苔。更羨孤雲逸。松顛自往來。頂有到者。方知豈有此理。題額三四語。卽是此意。

### 坐狎浪閣

高閣臨溪水。薄暮軒窗開。不見菴中僧。微雨潭上來。不見庵中僧二語。王漁洋謂其不愧古人。

汪洪度

字于鼎。江南歙縣人。諸生。著有餘事集。○于鼎詩。漁洋定其全集。歌行中賞其建文鐘篇。云。中有史筆。非苟作者。今集中不見此詩。可惜也。

次街口

萬山落飛瀑。競向清溪會。澗洄穿松杉。葱蒨紛映帶。積石竦劍鋸。百里無靜瀨。篙師慣歌嘯。險絕了不礙。攢霄排巖巒。幽異此中最。轉惜嶮巖中。蒼黃出烟靄。漁火半明滅。海月上山背。家鄉送別人。已隔青峯外。遇險而驚。出險轉惜。無情人不知。是語之妙。

七里瀨

日照丹霞西。雨來青嶂東。船頭氣澄碧。船尾陰溟濛。峯交路疑盡。溪迴趣無窮。渚清水禽悅。徑碧巖花穠。束髮志沉冥。思躡客星蹤。曩遊已十載。老大仍飄蓬。山頂石乳滴。服食使顏紅。丹梯不可上。神仙杳難逢。何日謝塵緣。煙波從釣翁。起四語。卽所謂朝躡于西。崇朝其雨也。弔嚴陵意。只於隱躍見之。

蘂菴大師

自注。侍御熊公諱開元。

九尺老比丘。骨立石崖松。楞伽把一卷。兀坐西南峯。舉頭近帝座。低頭睨寰中。批鱗丹陛前。驅鱗滄海東。昔懷寧易平。托鉢降毒龍。陽靈大地匿。雨雪春山空。樵徑白雲迷。何處尋孤踪。

蘆中老人

自注。禮部郎王公諱泰徵。

蘆中人易老。不復刺漁船。悲歌采薇蕨。歸臥西山巔。山路幸嶮巖。足音少人傳。氣衰筑難擊。不如弄雲煙。骨瘦薪難臥。不如枕清泉。清泉滌塵襟。雲煙幻眼前。憂思能傷人。誰禁遲暮年。

### 鼠渡江

江北鼠口銜尾。結伴成羣滿沙觜。飛塵滿野烈日在天。江北農人憂心如煎。江南稻秧齊。沃土不須雨。同類渡江。適此樂土。楚豫稻梁。堪足天下。今年不雨春復夏。估不開倉穀添價。鼠乎鼠乎。勿食禾黍。禾黍食盡。及爾同死。由江北而及江南。兩地之禾同盡也。鼠俱餓死。其人可知矣。此種詩從變雅中來。

### 翁履冰

翁挈稚孫暮歸。履冰上中流。值冰裂。落水死。

東家粟紅。西家粲白。借貸空歸。羞見河伯。河伯羞尙可。一家待我舉烟火。河水生骨膠渡船。攜孫偃僕行難前。誰知河心冰不堅。狐狸隔岸看墮水。枯桑槭槭酸風起。綏綏欲渡愁其尾。狐愁濡尾。翁與孫尙能履耶。愁慘之音。幾不忍讀。

### 紀歲珠

鄉鄰某娶婦甫一月。卽行賈。婦刺繡易食。以其餘積。歲置一珠。用綵絲繫焉。曰紀歲珠。夫歸。婦沒已三載。啓篋得珠。已積二十餘顆矣。

鴛鴦鵝鵝。鳧雁鵠。柔荑慣繡雙雙逐。幾度拋鍼背人哭。一歲眼淚成一珠。莫愛珠多眼易枯。小時繡得合

歡被線斷重緣結未解。珠纍纍。天涯歸未歸。老杜新婚別爲王家守河陽也。此爲行賈而別。倘所云重利輕別離者耶。結意不用說盡。婉約可悲。

懷黃扶孟

從來經易水。誰不念荆軻。有客自驅馬。秋風正渡河。回頭山色遠。直北角聲多。日暮思鄉井。踟躕發浩歌。  
憑空而下。千鈞筆力。

汪洋度字文治。江南歙縣人。

臂痛

那能扛筆氣如虹。自笑千鈞一握中。乍可偏枯猶半士。誰堪全折到三公。斜簪卻似垂翎鶴。子立還疑欲瘁桐。天意佚吾吾正嬾。紙窗晏臥罷書空。大雅之音。可配曹倦圃贈徐子能跋足詩。

吳江舟夜

水驛迢遙望不分。愁心落葉共紛紛。扁舟一夜搖江月。入夢吳歌斷續聞。吳歌以吳江爲最。用來獨切。

卷十六

彭始奮字中郎。河南鄧州人。

滇南

久客愁攀廢苑松。舉家天末盡相從。蠻兒乘象同牛馬。犍道看花無夏冬。近接漏天常作雨。倒流滇水不朝宗。獨期攬勝遐荒外。恨未曾登雞足峯。

寄隴西觀察趙韞退先生

新分采邑陝西偏。上奏仍屯塞下田。部傍先零氍作帳。道通西域雪爲泉。陰山控馭六千里。河套因循三百年。會見殊勳陵海外。那煩班固勒燕然。

陶

字苦子。廣東順德人。○陶氏世襲錦衣。至苦子。刻苦如寒素。肆力於詩。誓不龔牙。慧語亦南粵錚錚士也。詩無鑄本。被其感竊爲己作。恐久而混真。故特表而明之。

古鏡

先秦遺篆在。想像出深宮。明月不生處。清光時與同。有形隨自應。無相本來空。白盡人間髮。全歸一照中。  
賦鏡者未曾道及第六句。可以證禪。亦以明虛靈之體。仍儒家語也。

冬草

三徑經冬掩。飄零對汝時。未充君子佩。徒結美人思。世態看蓬轉。孤心感鬢絲。平生抱微尚。不與衆芳期。  
借以自況。非尋常著題體。

送張超然

閩粵無多路。思君見面難。高文朋輩重。落葉客程寒。殘臘惠相訪。素絲勞共彈。重華不可作。幽思更無端。



望零丁洋寄懷友人

兩年九月此經過。極目蒼茫感逝波。窮島漢槎無限路。秋風禾黍自成歌。忠臣淚帶寒潮長。楚客悲逢落葉多。欲寄相思憑去雁。故人歸夢杳星河。因信國孤忠懷及友人不拋擲零丁洋意。

秋望

數聲離鴈下寒汀。世事相看散野萍。入水苦匏思共濟。望秋蒲柳感先零。憂心滿似將圓月。旅鬢疎同避曉星。獨潔糴糶候槎影。美人空自隔滄溟。有志濟時而撫躬已老。豈尋常栖隱士耶。老杜有感於聖朝無棄物。多病已成翁也。

查

容 字韜荒浙  
江海寧人。

送武曾之宣府

由拳城頭月華白。張燈置酒宴征客。由拳城外柳條青。平明相送出津亭。羨君意氣真無比。此去幽州幾千里。攬轡遙看冀北雲。挂帆徑渡淮南水。大行山高日欲斜。邊風颯颯飛塵沙。候騎千屯吹鬢策。明駝一隊奏琵琶。上谷使者與君厚。轅門揖客論故舊。伐鼓鳴笳部曲前。錦筵紅燭軍麾後。觥籌交錯坐忘疲。玉缸瀉酒醉難辭。壯士橫刀看草檄。美人挾瑟請題詩。丈夫三十猶未遇。走馬窮邊那復顧。野狐嶺下白草枯。臥龍岡上黃雲暮。客中行樂不知年。但看月出幾回圓。沙場忽聽思歸曲。應使鄉關望眼穿。得力於  
岑嘉州。

贈別少典

鳴榔伐鼓不曾停。月落津樓見曉星。芳草自分南北路。垂楊相送短長亭。歌殘銀燭愁難別。勸盡金壺醉未醒。豈爲燕臺師郭隗。一時客去感飄零。

潘

字雙南。江南吳江人。

金山

孤嶼中流峙。橫空勢欲吞。天清江作帶。地闊海爲門。塔影魚龍靜。潮聲日月奔。茫茫千古意。醜酒共誰論。  
造句奇警。

揚州秋感

光岳英靈河雒分。尙餘寒燄射青冥。將軍闔外空專鉞。丞相營前竟墜星。鬼哭郊原淒曉角。鶴歸華表泣新亭。秋風萬里荒林下。手折黃花當薦馨。  
拜史閣部墓而作。見四鎮跋。屢無功。而閣部惟鞠躬盡瘁。死而後已也。比以忠武許之者深。

寄顧茂倫先生

十載江城久未過。美人幽夢近如何。著書歲月窮愁老。對酒湖山感慨多。誼重延陵貽縞帶。節高元亮臥煙蘿。還期鼓楫成良會。聽取尊前白石歌。

彭

字爰琴。江南溧陽人。○陳子山學士。攜爰琴詩見示。係鈔本。屬予選定。刪存四卷。催取甚促。因節錄九章。終以不能多取爲憾也。

出宣州過箬嶺入歙州界遇雨

遊子倦行役。攀折畏險阻。宣歙盡山城。峯巒互撐拄。叢箐裹郡縣。仄澗跨垣堵。茲嶺何峿嶢。懸道通一縷。峭壁插天門。裂石界地戶。泉奔腳下雷。風嘯空中虎。朗日眩神魂。旅人怯亭午。況乎我獨行。縹緲入雲雨。

揚州鹺署爲董江都故居署後有祠遺井尙在丁巳秋瞻謁感賦

鄒魯儒風溼。嬴秦強力逞。蘇張舌肆矛。申韓智設筭。典籍付劫灰。仁義棄荒梗。亭長馬上來。功成亦僥倖。苟且由蕭曹。因循及文景。卓哉江都相。量賈非可並。三策本春秋。反覆誠修省。正誼與明道。功利所亟屏。至今兩廡祀。千秋日星炳。管子霸者佐。思以富強騁。官海始熬波。國用因不窘。後世桑孔輩。錙銖收幾盡。淮南百萬租。設使俾專領。趨羶如蟻蠅。處濁同鼃黽。誰令先生居。一朝作金礦。我茲瞻荒祠。三歎中耿耿。幸有遺井存。悠然自清冷。獨來對寒泉。對之滌心影。前以蘇張申韓諸人引起。見道術久裂。得董子而始正也。後又從管子之熬波說。到桑孔盡利。淮揚之間。

蠅屯蟻聚。而董子之居。竟爲堆積金錢所矣。幸有遺井存。可以洗心鑿影。猶極炎熱時服清涼散也。此種詩不同風雲月露之作。而又不入於腐。所以爲高。

夜飲閣再彭席上聽孫良侯搗鼓歌

空堂昨暮聞疎雨。颯颯秋聲滿庭戶。可憐今夜露華中。明河碧漢還如許。堂中燒燭夜譙客。有客酒闌起離席。自言搗鼓聲最豪。奮袖操槌將欲擊。欲擊未擊手徐低。坐上先教衆樂齊。衆聲雜作一聲下。倏如蟄雷動。春谿鼓聲如雷手如電。須臾迸激飄飛霞。管音何亮磬何幽。忽捲諸音聯作串。初聽緩。巖裂一聲迴抱腕。乍聞急。百萬軍中單騎入。急復散。蘆荻蕭蕭徧鳴雁。散終促。懸崖萬點亂噴瀑。有時宮海濤。洶湧紅

日中。有時商。鳳皇九子鳴鏘鏘。有時角。擲地兜鍪起舞槩。有時徵。有時羽。徵如嗚咽灘流水。羽如間關鶯滑語。五聲都會鼓聲中。低時能辨高能融。直教上拂星斗亂。直教下徹井泉空。仰看缺月銀牆上。邊風露草吹相向。鼓聲闌出畫堂中。只覺天清與野曠。於中能識鼓中神。揚桴擊節旁無人。淵淵沈沈有妙理。能動高雲不動塵。聽君擊鼓悲無那。好歇鼓槌來入坐。自從驚起漁陽鼙。多少江山都入破。二十年前日夜聞。野花沙草弔殘軍。到今凝碧池頭問。祇有雷生曾報君。客聞此言神欲奪。兩手忽落雙槌歇。鼓聲一止截衆聲。空裏餘音猶恍惚。耳邊尙覺來闐闐。與君盡醉酒杯前。開顏但爲主人飲。今年歡會知何年。勸君打鼓莫輕下。世無曹瞞安足罵。主人縱有岑牟衣。不遇禰生未許借。迤邐而來。備極音節。後半借漁陽鼙。不輕擊鼓。真覺四座無人。目空一世。

建初弟來都省視喜極有感

相持莫下拜。拭淚認分明。訝爾顏何瘦。令余痛失聲。饑寒留剩骨。患難得餘生。乍見渾無語。那堪悲喜并。  
爲致慈親語。殷勤勸早歸。歎余違井邑。況汝別庭闈。每念尸饔苦。深慚彈缺非。向來多少淚。都染手縫衣。  
弟傳親語勸歸而已。與弟轉並滯客途。倚闥之思愈切矣。此種是真杜詩。

更傳兒女意。盡解憶長安。索飯啼堪念。牽衣別自難。兩人今旅次。八口在江干。此際愁何似。秋風暮更寒。  
比不解憶長安。更覺可悲。不解憫其無知。盡解又憐其聰慧也。

同蒼符過王勤中怡老堂

自注堂爲文恪公歸沐之所勤中其七世孫

宰相當年怡老堂。雲仍七葉守青緇。成弘盛世思元老。晉宋新亭滿夕陽。蕉葉雨斜侵硯几。藤花風細落書牀。推君逸少兼摩詰。文藻東吳獨擅場。

答懷閻再彭

記別淮陰擲釣竿。楚天雲樹竟漫漫。徒勞問答皆賓戲。始信文章果說難。肥馬塵中孤客賤。嚴霜夢裏故鄉寒。自慚未得酬知己。腰下吳鉤怕解看。

彭

字則翀。江西南深陽人。

得爰琴兄都門信

牀頭寶劍泣魚腸。賦就三都價未償。絕不待人惟歲月。最難爲客是風霜。春山自灑啼鵲淚。慈母曾縫遊子裳。今夜挑燈應獨寐。好將歸夢繞高堂。

吳之振

字孟舉。浙江石門人。○宋代詩前此無選本。孟舉刻宋詩鈔共百數十家。已所成詩亦俱近宋人。

疊韻送葉星期歲暮還山

空山鸞嘯激清音。壑斷雲連咫尺尋。老去貧交難聚首。眼前生客怕輸心。長鑱劇處霜苗短。柔櫓聲中落葉深。萬頃菰蘆堆碧海。星星漁火入香林。中有佳句。

崔岱齊字青時江南江都人諸生

燕來巢爲李秋水作

去國懷鄉莽自哀。舊時庭院鎖莓苔。塵凝風幔人初至。梁落春泥燕又來。紫海路深音信斷。紅顏年遠雪霜催。營巢哺子依君屋。也自逢秋未忍迴。

歲暮送戴衣聞還苕溪

荒郊晴雪映行裝。送客江亭恨淼茫。鳥近黃昏皆繞樹。人當歲暮定思鄉。經年文酒情相似。異地雲山夢不忘。最愛苕溪好風月。明年我欲擢輕航。高青邱清明無客不思家。推天然名句。此亦不讓前人。

龐鳴字遠公江南嘉定人

吳宮詞

屢廊移得苧蘿春。沉醉君王夜宴頻。臺畔臥薪臺上舞。可知同是不眠人。吳宮之女采香。越王夫人采葛。猶此意也。一用井說垂戒。悚然。

周穉廉字冰持江南婁縣人。○冰持爲宿來之孫。鷹垂之子。少以錢塘觀潮賦得名。因不永年。故詩傳絕少。

送馮寶初

木末花開柿葉稀。旗亭分手淚沾衣。憐君身似江南燕。又逐秋風望北飛。不落落送。

洪昇

字昉思浙江錢塘人。上舍生。著有稗村集。○昉思名滿京洛。因演所著長生殿傳奇。至於斥革受辱。又遭家難。坎壈終身。五十餘墮水而沒。天之厄之爲已極矣。而其詩疏澹成家。漁洋

及門中在吳天章下餘  
子之上應以可傳許之

石門

先賢逝已久。予亦宿石門。天寒鳥自歸。林表斜陽昏。吏隱計難得。詎知憂世屯。棲棲終短褐。此意向誰言。  
玩詩意乃魯地之石門也。  
憑弔晨門亦自抒懷抱。

征途曉發

夜發薊丘道。馬蹄踏霜華。月照千里白。不辨冰與沙。行行三十里。始聞啼曙鴉。朔風起何處。隱隱鳴悲笳。徒侶慘不樂。從者咸咨嗟。揚鞭強笑語。前村有酒家。

送吳位三歸宣城

宋家丞相後。喬木到如今。之子獨古處。對人無俗心。偶來京洛道。旋反敬亭陰。芳草白雲外。春山深復深。

雪望

寒色孤村暮。悲風四野聞。溪深難受雪。山凍不流雲。鷗鷺飛難辨。汀沙望莫分。野橋梅幾樹。併是白紛紛。  
山凍不流雲五  
字寫盡雪望

蒙山道中

亂石繞東蒙。崎嶇古道通。一身千里外。匹馬萬山中。密樹遙遮日。輕花細逐風。望雲雙淚落。豈是爲途窮。

寒食

七度逢寒食。何曾掃墓田。他鄉長兒女。故國隔山川。明月飛烏鵲。空山叫杜鵑。高堂添白髮。朝夕淚如泉。

東李東琪

聞君昨日到長安。驛路風塵乍解鞍。古寺樓臺高避暑。晴天松柏晝生寒。親知把臂他鄉少。貧賤論交此地難。我自飄零歸未得。秋江勸爾弄漁竿。貧賤論交到處皆難。長安尤甚。此身親閱歷之言。

衢州雜感

巉崿嶺勢矗仙霞。阻遏妖氛建虎牙。障日叢篁寧容騎。連雲列戟不通鴉。居人亂後惟荒壘。巢燕歸來止數家。一片夕陽橫白骨。江楓紅作戰場花。鳥飛者伏也。此爲下有伏兵而言。若連雲列戟。則鳥不敢飛矣。體貼入微。下半寫亂後景象。如置身古戰場間。

將遊大梁

匹馬嘶荒野。羣山擁亂雲。迢迢二千里。去哭信陵君。

公子行

春明門外酒樓高。稱體新裁蜀錦袍。花裏一聲歌子夜。當筵脫與鄭櫻桃。

釣臺

逃卻高名遠俗塵。披裘澤畔獨垂綸。千秋一箇劉文叔。記得微時有故人。非表光武正。慨在貴忘賤者之古今皆然也。



答友人

君問西泠陸講山。飄然一盞竟忘還。乘雲或化孤飛鶴。來往天台雁宕間。  
陸講山。謂麗京也。麗京或傳仙去。或傳爲僧。或傳相遇於天台。

石梁。故有此詩。

毛師柱字亦史。江南太倉人。

兵過

寧夏三邊要。防秋萬里屯。營移千帳白。馬飲一河渾。但覺旌麾靜。真看節鉞尊。軍容同細柳。知不負君恩。  
沉雄。

舟中兩夢亡婦詩以志感

落月篷窗照水濱。音容疑假又疑真。境分生死傷心切。愁繞關河入夢頻。酒醒乍驚身在客。淚殘猶道汝爲人。廿年舊事從頭記。荆布相依最苦辛。  
切舟中切夢并切兩夢別於尋常悼亡。

喜雲間徐合素至自甘州幕府話舊有贈

挾策攜琴絕塞行。將軍長揖重書生。題詩好徧雲中戍。射獵應過雪外城。綠酒黃羊晨草檄。黑貂紅燭夜談兵。歸來萬里雄心在。莫惜離懷醉後傾。

二鸚鵡

綠襟細翼赤欄東。雙立雙棲入畫中。縱炫羽毛休見妬。爲能言語卻爭工。堂前報客聲相應。隴首思鄉夢不同。枉自含愁頻對舞。何須玉粒戀雕籠。語語從雙意著筆妙能渾然無痕第

朱仙鎮拜岳武穆王廟

破竹真能復兩京。十年功績痛垂成。但知金幣堅和議。忍使香盆聚哭聲。手挽山河心未死。身騎箕尾氣猶生。經過當日班師地。千古令人涕淚橫。

追感杜茶村先生

一生心事向誰陳。道路皇皇老更貧。白髮幾人懷故苑。青山何地葬遺民。狂來自合歌衰鳳。絕處猶堪紀獲麟。名並少陵身客死。自注先生沒於維揚旅寓空餘書卷照千春。陳北溟守江寧時始葬茶村於聚寶門外此時猶未葬也或云紀獲麟措語太重此言誠然然太白古風云希聖時有作絕筆於獲麟詩人之辭不必過於執著

方山阻風

征帆早喜到江東。凝望鄉關咫尺通。豈謂三朝又三暮。依然愁水復愁風。空餘山色煙波外。枉卻秋光道路中。但得快哉旗腳轉。更何分別問雌雄。

陳學洙字左原江南長洲人康熙甲子舉人○左原先生與弟右原爲學生兄弟形體性情學問志節無不相同不止如雙丁二到已也詩品雅潔並追唐人尤悔庵太史謂陳氏兄弟昔稱二

難今日二難復見陳氏其言洵然

君子行

君子畏幽獨。大廷乃敢言。小人讐稠衆。衾影不可捫。繩尺君子心。之死靡所奪。脂韋小人態。臨難思苟活。譬如丹山鳳。煌煌世之儀。蛇蝎藏陰房。白日難逞威。又如青松枝。經霜不渝色。厭彼荆棘繁。剪伐何足恤。緇素既異染。砒瑜僅同形。瀉水一器中。當辨渭與涇。漢樂府祇說君子避嫌。此則君子小人之分判。如冰炭白黑矣。未歸到人君之能辨。尤爲得要。

閱省試錄見璋兒名喜而作此

羈人百憂集。煩亂不能理。觀空息羣妄。澹泊對流水。簷端噪乾鵲。何事聒吾耳。南國賢書來。郵騎持片紙。解額六十三。有汝名在裏。大江巨南北。鎖闥萬餘士。高才動淪落。老至常拊髀。流年燦筋骨。飲恨積塊壘。汝年弱冠餘。腹未飽經史。不遇何足歎。得之亦偶爾。憶汝周歲時。呱呱而索乳。汝母躬撫育。一夜常數起。抱置大母前。呼名輒唯唯。姑婦相視笑。吾宗有孫子。安得若長成。讀書取青紫。斯言宛昨日。逝者已如彼。傷哉泉下人。不及親見此。吾衰久於役。蹙蹙靡所止。膝下無他兒。舉目惟在汝。幸汝名稍成。使我心竊喜。會須覽皇都。貽書趣行李。前見遇合之偶然。失不足悲。得不足喜。後見大母與母氏之屬。望而冀其成名。不及親見。深足感也。詩到布帛菽粟纔是真詩。

別弟

不敢垂雙淚。孤懷自黯然。恐添慈母念。郵免病妻憐。書札從人寄。家庭賴汝賢。歸心倘可遂。應得在春前。少陵與諸弟詩。字字從心坎流出。所以獨絕。作者直如面語。忘乎其爲韻語矣。

行次滕縣

望裏煙生雉堞低。滕陽城外草萋迷。井田舊業安征稅。淳樸遺風厭鼓鼙。青杏園林禽上下。綠楊村舍水東西。此中鄉土殊堪樂。莫惜從容駐馬蹄。井田淳樸能舉滕縣之大前輩滕縣花開色似銀舉其瑣細而已。

燕京雜詠

萬里風煙古北平。蕭蕭牧馬遍龍城。旌旗曉接長楊苑。刁斗宵催細柳營。輦下公卿多結客。市中屠狗亦成名。儒冠拓落知何事。自笑江東一步兵。

帝城高接太微垣。龍虎蟠迴勢欲騫。關鎮居庸當北面。河流滄海抱中原。葡萄翠色來安邑。騏驎花鬃出大宛。正是金輿巡幸後。九重無事只臨軒。

一從丹詔下明光。封事朝朝獻未央。聖世保衡商左相。金門待詔漢東方。碧雞久說通邛僰。白雉初聞貢越裳。自此萬方歸有道。扶餘海外不稱王。時三藩海氛俱靖故有是篇。

與繆天自夜話

牢落蕭齋病後身。燈前款款話相親。寒暄世態吾偏拙。貧賤交情爾最真。縱酒莫辭今夜月。悲秋俱是異鄉人。明朝便作河梁別。天末涼風起白蘋。惟貧賤交故其情乃真感慨係之。

茉莉

玉骨冰肌耐暑天。移根遠自過江船。山塘日日花成市。園客家雪滿田。新浴最宜纖手摘。半開偏得美人憐。銀牀夢醒香何處。只在釵橫髻驪邊。花取半開留餘韻也。於此花尤宜。西樵考功後又添名作矣。

哭外舅劉西翰先生

西臺慟哭血沾巾。百結麻衣剩一身。地北天南拋骨肉。魂來夢往傍君親。孔融收繫無完卵。張儉流亡少故人。支遁峯前聊寄跡。此生<sub>尊人</sub>長作宋遺民。公旦公全首陽高節。西翰先生。書砥行年九十餘終故以宋遺民況之。

獨行歸然老布衣。耄期不特古來稀。立錫無地能安道。抱甕何心但息機。愛女早歸泉壤去。遺孤尙作斷蓬飛。山頽木壞人嗟歎。星象於今暗少微。

送倬雲南還

滿地風塵急暮笳。歸程好覓渡江槎。故園兄弟如相問。只道征夫不憶家。征夫憶家。人人能道語耳。此轉也。傳

紙窗矮屋似僧龕。春去春來摠不堪。忽見桃花紅映面。一時回首望江南。

悼內

簇蝶金泥杳不存。空箱顛倒月黃昏。牛衣一挂渾無恙。猶有當時對泣痕。牛衣對泣。尋常引用。此以追憶出之。其情更深。

紗窗曾弄管斑斑。剩粉殘脂次第刪。略記紅箋留片語。一鈎新月照愁顏。自注。內子幼好吟咏。繼以非婦事。盡毀之。頃檢廢篋於紙尾得

此句爲  
之一勸

李國宋字湯孫江南興化人康熙甲子舉人著有螺隱居詩

### 牛首山

獨上藏龍窟遙瞻踞虎邦。四天圍碧嶂一氣滾寒江。淨貝安禪悅香燈冷法幢。頓令塵思盡高倚白雲窗。  
渾然而來大氣大力

### 朝天宮感懷

冶城山色帶殘暉絳節中天渺翠微。自昔鼎成龍已去只今松老鶴還飛。齋宮寂寞聞金磬泉海蒼茫想  
玉衣唯有步虛諸羽士秋風時禮白雲歸。

### 望國山

岳麓銅峯面面分雨中遙望國山雲紫宮祕記金函冊青嶂殘碑石鼓文。虎踞幾年瞻王氣龍驤他日駐  
新軍九岑環繞荆溪水留得司徒半畝墳。國山有皇象篆碑此孫皓封禪文也國運將殄猶對天鴻休之詞頸聯殊見譏刺

李馥字汝嘉福建閩縣人康熙甲子舉人官至浙江巡撫著有鹿山詩鈔○鹿山公虛已受益有指其詩瑕類者應時改定詩多見道語因未寄鐫本祇錄其蠹時記誦一章

### 過司空表聖墓

古道瞻遺墓豐碑紀有唐榮華辭黻冕泉石殉君王。詩品卑元相清風慕首陽如何長樂老黃髮耐興亡。

表聖評元相詩。比之都市豪估。○表聖處危亂之朝。無宗社之寄。隱居王官谷。被召陽為衰耄。丐歸。後聞哀帝被弑而卒。跡近隱淪。心實忠良也。泉石殉君王。移入他人不得結。以馮道反觀。倍覺有力。

史騏生字千里。江南溧陽人。康熙甲子舉人。

寫懷

覽鏡何顏面。江東一腐儒。父書空滿篋。母線尙縈襦。窮巷慚南阮。騷壇廁小邾。世人憎愛錯。不賣櫝中珠。  
胸中有物。目中無人。

藍啓肅字恭元。山東卽墨人。康熙甲子舉人。

送郭華野總制湖廣

中旨纔傳出漢宮。直教歡喜到兒童。如聞元祐徵司馬。未許東山臥謝公。列郡應多投墨綬。當朝誰不避

青驄。澄清豈但荆襄路。佇見訐謔沃聖衷。  
華野名琇。彈劾要人。直聲震朝野。後以報復摧折。聖祖南巡。問吳江士民。誰為廉吏。衆以琇對。聖祖命總制湖廣華野。舊令吳

江。湯文正公斌。薦為侍御者也。

馬之鵬字文淵。湖廣蒲圻人。康熙乙丑進士。歷官戶科給事中。

別毛姬黃陳相宜

薄遊至西江。東南逢二妙。本是同門友。同心復同調。樂奏金玉聲。情深知仁樂。  
去聲清風披素襟。明月朗餘照。已見投膠漆。無庸判紵縞。胡然忽分張。殊方理征棹。越俗斂文華。楚風戒輕剽。安驅越中和。研精歸道

要。江湖暫分流。終焉合廊廟。矢心展大猷。毋爲戀蓬藿。毛與陳皆越人。已爲楚人。勗以化風氣之偏。而歸於中和措詞何溫厚也。未望其策名清時。所見尤大。

### 除夕得廬字

臘雪初消歲又除。鑪灰徐撥定更餘。親闈此夜思遊子。客路經冬阻尺書。卷軸隨身成故友。乾坤何處是吾廬。添年便惜年華滅。飲罷屠蘇轉歎歎。

徐元正 字靜園。浙江德清人。康熙乙丑進士。官至工部尙書。

### 廣陵懷古

閒追舊迹檢殘編。繡柱珠簾盡惘然。東閣詩成何水部。揚州夢覺杜樊川。尋春易過佳風月。送老難忘好墓田。莫怪無人能跨鶴。誰齋十萬作腰纏。

汪灝 字文漪。山東臨清人。康熙乙丑進士。由翰林官至河南巡撫。著有倚雲閣集。

### 拜楊伯起墓

蟠龍關塞近。大鳥墓門深。萬古長河水。千秋暮夜心。衣冠朝嶽麓。蘋藻薦桃林。夫子應知己。囊無陸賈金。無剩語。便是作家。

### 送謝方山郎中告歸



孤心霜月迥秋清。三十年來翫世情。真得意時惟嘯詠。不如人處是功名。三臺後輩多迴席。五字偏師盡卻兵。舒卷從心難繫縲。白雲天際任縱橫。五六承三四言之。唐人每有此格。

施何牧

字贊虞。江南崇明人。康熙乙丑進士。官吏部稽勛司員外。著有一山詩鈔。○一山先生。中歲歸田。守正履道。詩學斷斷唐宋之分。不肯隨時趨嚮。今沒世三十餘年。詩卷零落幾盡矣。茲錄其向日所鈔五篇。聊志風概云爾。

效諸將三首

萬壘雲山山外城。登陴一望氣崢嶸。渠搜西去新傳箭。弱水東來盡列營。有俟絃歌工化俗。且將韡帕學論兵。鬼方親見高宗伐。奇績無須三載成。

關河日夕羽書傳。億萬芻菱悉帑錢。不爲陳師來紫塞。何緣轉粟上青天。至尊減膳龍庭外。諸將忘身虎旅先。自古足兵謀足食。四方願祝屢豐年。

天山八月朔風吹。兩道飛符並出師。突騎全憑白馬將。彎弓已斃射鵰兒。金城舊日屯充國。瀚海今朝斬邳支。蠹爾西戎稽顙後。還祈干羽格諸夷。味詩意應是聖祖討噶爾丹時事。時出師既遠。轉粟甚艱。故聖人斯得。兵不血刃而已。奏蕩平。從古王師所未有也。錄考功詩。因恭紀聖人神武。俾後之覽者有所考云。

九日放舟山塘

老去登臨興未刪。便乘小艇放溪灣。高原水淺苗初出。密樹霜濃葉漸斑。半世功名隨旅鴈。百年心跡對

秋山黃花此日何岑寂。一笑層臺懶更攀。

贈焦山人

泠泠秋閣大江臨。中有幽人繡玉琴。一自霓裳檀板歇。幾回鐵甕戟枝沈。孤鐘斷續迷寒雨。冷燄高低起暮陰。此日孝然如可作。白頭肯負紫芝心。此贈焦山冷秋江作。嘉其高隱。勉其不負初心。得古人贈言之意。

黃庭

字叢山。江南長洲人。康熙丁卯舉人。

延川道中

水似瞿塘險。山如劍閣雄。奔濤時齧岸。盤磴半臨空。馬踏雲頭上。人行石腹中。那知巫峽雨。翻作塞門風。能作奇語。

寧夏渡河

峽口回波繞塞流。自注。峽口山名。兩山相夾。河流其中。黃河利獨擅邊州。千屯得水成膏壤。海壩分渠據上游。自注。漢渠唐渠。今名大壩。小壩蓄水漑田。獨受河利。雞犬人家紅稻岸。魚鹽賈舶白蘋洲。那知澤國隄防急。百萬金錢擲浪頭。

正月既望自錢塘進艇新安江行十日達紫陽門卽事寫懷得船字

吳榜停時櫂越船。溯原浙水出山泉。一千里近新安路。三百灘齊天目巔。自注。新安平地。與天目山齊。軒后臺前神獨往。羲皇卦外歲初遷。自注。予今年六十一。衰年興待名山助。擬向雲端采石蓮。予遊黃山。年七十有八。視作者多十有七年。興待名山助。其言果然。

送陸翼王徵君南歸

天際冥鴻不可求。高飛豈爲稻粱謀。山中大隱徵弘景。海內奇書問鄴侯。風雪五年留上谷。鶯花三月下長洲。吳宮春色應如舊。眺望先登開府樓。

馬嵬

方士鈿釵何處得。農夫羅襪此間收。蒙塵莫漫尤傾國。猶剩唐家土半邱。

本禍水也。偏說爲唐家生色。見文人筆舌之巧。

梁佩蘭 字芝五。廣東南海人。康熙戊辰進士。官翰林院庶吉士。著有六瑩堂集。○藥亭中順治丁酉鄉試第一。至成進士時年六十餘矣。未一歲即乞假歸。同榜中俱以前輩事之。

養馬行

庚寅冬。耿尙兩王入粵。廣州城居民。流離竄徙於鄉。城內外三十里。所有廬舍墳墓。悉令官軍築廐養馬。梁子見而哀焉。作養馬行。

賢王愛馬如愛人。人與馬並分王仁。王樂養馬忘苦辛。供給王馬王之民。馬日齧水草百斤。大麥小麥十斗。勻小豆大豆驛遞頻。馬夜齧豆仍數巡。馬肥王喜王不嗔。馬瘦王怒王扑人。東山教場地廣闊。築廐養馬凡千羣。北城馬廐先鬼墳。馬廐養馬王官軍。城南馬廐近大海。馬愛飲水海水清。西關馬廐在城下。城下放馬馬散行。城下空地多草生。馬頭食草馬尾橫。王諭養馬要得馬性情。馬來自邊塞馬不輕。人有齒馬服以上刑。白馬王絡以珠勒。黑馬王絡以紫纓。紫駟馬以桃花名。斑馬綴玉鑠。紅馬綴金鈴。王日數馬。

點養馬丁。一馬不見。王心不寧。百姓乞爲王馬。王不應也。以贊頌之筆。寫風刺之旨。貴畜賤人如此。其敗亡生面之作。○城南馬廄近大海。以上用眞文通韻。以下用庚青蒸通韻。莫認作一韻到底看。

### 日本刀歌

市中寶刀五尺許。市中賈人向予語。紅毛鬼子來大洋。此刀得自日本王。王使紅毛預齋戒。三日授刀向刀拜。龍形虎視氣生驕。抽出天上星搖搖。黃虵之珠嵌刀首。百寶刀環未曾有。有時黑夜白照人。殺人血漬紫繡新。陰晴不定刀氣色。風雷閃怪吼牆壁。相傳國王初鑄時。金生火尅合日期。鑄成魑魅魍魎伏。通國觸體作人哭。人頭落地飛紙輕。冰光在水鋪欲平。國王恃刀好戰伐。把刀一指震一國。紅毛得刀來廣州。大船經過海若愁。攜出市中人不識。價取千金售不得。我聞此語空歎呼。兵者凶器胡爲乎。中國之寶不在刀。請以此刀歸紅毛。字字鋒銜逼人。駭膽慄魄。未見中國所寶。在明德不在武事。尤得尊崇之體。

### 易水行

易水悲歌動天地。荆卿入秦爲燕使。秦王尊禮設九賓。殿間顧笑旁無人。於期之頭奉上殿。血光直射秦王面。取持督亢色倉皇。咄哉年少秦舞陽。圖窮不覺見匕首。秦王睨之環柱走。荆卿不得刺秦王。無且在殿提藥囊。爲謀不成實天意。祖龍膽落荆卿死。一死可以報太子。君不見沙邱之椎亦如此。荆軻刺秦王。一係劍術之疎。然秦王之魄已爲之奪矣。以沙邱狙擊作結。倒瀾有力。

惠州王紫詮太守築羅浮子日亭落成作歌寄之

登山不到羅浮巔。舉足萬里真徒然。瑤房璇室七十二。羣真笙鶴長喧闐。況支蓬萊一左股。金陵地肺遙相連。風雲雷雨出其下。上界澆沆涵澄鮮。夜來星宿照分野。有若榆樹垂金錢。齊州九點盡可數。中原一縷搖輕煙。就中飛雲更奇絕。天門詖蕩雲聯緜。銀河屈注倒在背。帝座豁落平當前。神霄斧鑿施不下。烏道豈有藤蘿牽。何人築亭在其下。循州太守今豪賢。爲亭命名曰子日。意象直探鴻濛先。世間萬事起根本。黃鐘子氣無不全。靜爲動本太極理。循環迭運非言詮。陰陽旋轉推晝夜。陽明玉燭光回天。紫微垣中日杲杲。太陰蟠螭安能纏。此山三更坐見日。高與泰岱齊比肩。天雞大叫海水動。海中湧出金盤圓。羲和整轡升若木。神人枉用迴秦鞭。太守名亭復爲記。二樓伐石爲碑鐫。大書年月人某某。千秋萬世名山傳。附書仙人海瓊子。倡和共掣雲霞箋。平生濟勝仗筋力。匡廬白岳隨攀緣。羅浮家山望咫尺。反似往昔遊幽燕。山靈待我謝招手。不久黃鵠來高騫。洞門借騎蝴蝶入。峯頂或就桂父眠。煩君剽取龍葱七尺遺。贈我相酌先寄飛龍篇。波瀾層疊中就子日二字闡明動靜互根全理而仍不入於腐筆故超氣故達也仙人海瓊子作者自謂

次京口

繞郭盡江水。長虹跨不來。地形山勢截。天塹海門開。白晝鼉鼉出。中宵鼓角哀。往時征戰處。臨汎重徘徊。

沛中

黃河西出南徐路。馬首經過識沛中。一代帝王還故里。幾家雞犬入新豐。天垂芒碭雲疑在。山擁彭城氣已空。湯沐昔時諸父老。相逢誰爲述歌風。

### 閣夜

百尋古閣郡城東。簾捲前山一角風。哀壑有光星在底。明河無影月臨空。羣生靜息鴻濛裏。秋氣森歸耳目中。不是夜深能獨醒。海門誰見日初紅。

湯右曾

字西厓。浙江仁和人。康熙戊辰進士。官至吏部侍郎。著有懷清堂集。○浙中詩派。前推竹垞。後推西厓。竹垞學博。每能變化。西厓才大。每能恢張。變化者較耐尋味也。後有作者。幾莫越

兩家之外。

### 相見坡

清風生山巔。微雨在山腳。後山路始窮。前山壁又削。飛龍中忽斷。奔馬勢旋卻。兩山鬱崑峨。一水相互絡。洩雲天光漏。仄壁石氣錯。俯逐飲澗猿。仰睇投林雀。高低總艱艱。下上殊苦樂。彼途俄復經。此路邈如昨。相見難相從。青冥倚寥廓。

極形兩山之險。而未以相見難相從五字括之。可云經營心苦。

### 澄海樓

大海東迴水波惡。如山浪打長城腳。千年萬年鬼夜哭。冶鐵銷沉石崩落。王公設險古制存。屹立重關嚴鎖鑰。干戈相尋遠不數。六十年前事如昨。大盜移國明社墟。瀕洞烟塵昏六幕。是時關門臨賊壘。白日旌

竿莽蕭索。奸兇滿盈。人鬼怒。世運艱屯。神聖作。飛龍首出。在九天。熊虎戎衣。只一着。石河西南。破賊處。父老猶言戰時樂。後漢書。今見其戰。樂可言耶。不聞人聲。聞刃聲。霹靂摧枯。風掃籜。只今車書通萬里。天下一家無厚薄。名都貨貝街喧闐。屬國賚琛。驛交錯。承平暇日。展遊眺。賓客閒情。寄觴酌。茲樓我到。亦偶爾。萬古心胸。忽開拓。更喜天容。海色清。側身東望。蓬萊閣。自注。土人言天氣清明。往往見登萊也。○蟻賊毒亂。與朝戰功於登樓時。揮灑出之。豈同苟然之作。

登雲麓峯望南嶽歌

我聞三神山。遠在東海東。神仙恍惚。路難到。世上五嶽。蟠胸中。憶臨滄溟。倚日觀。九萬曾踏扶搖風。昨辭蓬萊。建羽節。陽景一翳。迷高嵩。西南萬里。入羅鬼。似墮幽井。窺圓穹。東還雲夢。吞八九。張樂已在軒轅宮。七十二峯。青聯屬。蒼梧天外。雲濛濛。清湘水流。環九面。南嶽神鎮。齊三公。靈妖物。怪藪藏。納丹雘。赤幕光。瞳矐。峯峯低昂。宛相次。獨有紫蓋。爭祝融。雷泓風穴。互開闔。玉書金簡。留穹窿。岫嶠山尖。蚪蚪字。人跡欲到。路已窮。使者虛亭。花藥繞。山人仙骨。雲霞通。似聞綠髮。有毛女。不少翠羽。來青童。離宮福地。入縹緲。目所眺。矚攀躋。同衡陽。縣前昔。騁望壓陣。巉嶮雲排空。仙山咫尺。俗緣誤。況今百病。中交訂。升高視遠。腰腳軟。左右扶掖。如衰翁。道人鐵瓦。緬遺構。拜嶽之石。高龕窅。九疑清猿。怨遙夜。洞庭落日。浮孤篷。漢女幽蘭。冉冉翠。楚妃淚。竹斑斑。紅振衣。周覽窮。上下忽與。意思增清雄。人間擾擾。等蟻螻。慎勿變化。隨沙蟲。君不見迴鴈峯。來八百里。揮手欲駕。冥飛鴻。前從使滇回說入。便有波折。次寫望衡嶽處。淋漓飽滿言之。後憶往日經衡陽而未登。益見今茲將老。不能更登也。於望字更添一

倍襯托作長  
篇須解此法。

### 放舟至下鐘山

空濛一片雲滿湖。西南風起吹檣烏。淵淵且止發船鼓。秀絕下鐘山色無。褰裳直上捷猿狖。樂哉一幅寒  
林圖。絕頂飄飄目四豁。左右江湖渺空闊。烟波盡處洲渚微。彷彿扶桑見窮髮。天旋地轉不少留。迴看星  
氣忽已周。扁舟歲晚夢吳越。匡廬五老空船頭。銜鱸如山萬商集。使者纓旌騎吹入。行人擾擾競錐刀。落  
日悠悠下城邑。前臨巨石紛盤陀。仰看絕壁青嵯峨。玲瓏窈窕萬竅出。安得澗汨生流波。風聲水聲奈爾  
何。只今埋沒塵沙多。無絃之琴張素壁。歲久抑鬱恐不和。一歌如扣鐔。再歌哀知音。洞庭木脫水深深。天  
高月白風入林。或鼓或考聲欽欽。嶺猿江雁同夜吟。潛蛟出聽老龍泣。漁父滄浪知此心。石鐘山記坡公  
透暢言之遊下  
鐘者不必更從鐘聲落想矣。  
作者別行一路故語無雷同。

### 黑石渡

昨從邨山來。今從邨山去。邨山朽骨萬萬古。惟有行人朝復暮。黃金蝕盡白石爛。螻蟻三泉尙知處。我來  
欲醉酒一杯。落日荒荒下前渡。朝暮行人。卽是邨山中人。  
末語欲盡不盡。黯然神傷。

### 山海關

東西誰界絕。封此一泥丸。地接長城險。天浮渤海寬。連山趨碣石。積水見辰韓。吹角關門出。邊風馬首寒。



連下章。盛唐音節。

辰龍關

束馬懸厓險。關門鬱不開。居然橫戟地。曾此挂弓回。浩蕩妖星落。蒼茫角吹哀。兵家爭問道。爲語勒銘才。

上玉峯徐公

海岳英華蓋代人。由來絕業迥殊倫。六經屢折羣儒角。九服齊扶大雅輪。無事心常愛丘索。有才誰不仰陶鈞。每看元老虛懷處。吐握風流一旦親。

春官玉尺手親持。科目光華此一時。嘗惜文辭傷篆刻。獨將經術作宗師。士當失意猶無恨。才苟懷奇定見知。只有公門慙小草。也滋化雨伴仙芝。健庵誓欲蒐羅天下英奇。才苟懷奇定見知一語。非虛譽也。少宰爲司寇特賞識人故言之親切。

登峴山亭至甘泉寺

籃輿嘔軋傍城隈。積霧霾陰黯不開。一磴自穿雲氣入。萬峯爭送雨聲來。山川浩蕩今如此。裘帶風流安在哉。千載牛山共揮涕。古苔秋井易心哀。

雲藏巖谷晝冥冥。忽聽天風響佛鈴。草際老僧迎客至。烟中修竹入門青。坐來瀛海茫茫地。盡失山川漠漠形。休問葡萄撥醅後。甘泉一酌自清泠。次章承萬峯爭送雨聲來言之。

荊州

剩礎遺隍問舊疆。龍門馬牧摠茫茫。接天波浪三江口。橫地風雲百戰場。尙有帆檣下巴蜀。無多戶口在耕桑。不堪原野蕭條地。吹角重城倚夕陽。

戎馬壬申逮甲申。萬家煙火幾家存。人如刳豕屠羊慘。事異黃巾青犢論。妖樹禍生天北極。怪風寒捲郡南門。龍陂橋外坡陀血。誰洗忠臣九地魂。流寇之亂於荆襄尤甚。篇中憑弔往事。故極形亂後蕭

### 黃尊古上都秋色圖

落日牛羊下遠村。平沙萬馬別開屯。君看鶻沒鷗盤處。莽莽青山是塞垣。

## 卷十七

唐孫華

字實君。江南太倉人。康熙戊辰進士。官吏部主事。著有東江詩鈔。○東江勤於學殖。不重祿。晷歸田後。與二三老友登臨讌飲。有香山洛下之風。至九十餘乃辭世。生平故天爵自尊者也。論詩謂詩必有爲作。每與史事相表裏。故其詩不趨高超。尊崇實實。皆其言有物者。咏門神詩。偶然戲筆。而外間傳誦和者紛紛。毋乃探驪龍而專取鱗爪耶。

### 述古

讒口成鑠金。沉舟由積羽。蒼蠅正羣飛。白壁無完素。臧倉沮孟軻。伯寮愬子路。正直枉者非。妍好醜者妬。芳蘭每見鉏。實以當門故。道義苟無讐。特立何足懼。由貪而跖廉。毀譽每錯互。孔光詆王嘉。馬融排李固。孔馬皆大儒。物情常嚮慕。一朝勢利奪。顛倒迷好惡。嗟爾名教人。毋令青史汗。孔光何足惜。以馬融之儒學。而排擠正人。則名節盡

喪矣。時有名人而譏湯文正者。意作者借古以況今人耶。

贈趙松一趙曾著讀史一質疑一書

尼父著春秋。大義揭星漢。功罪無匿情。是非有定案。作史與論史。宜以經爲斷。後儒恣穿鑿。如絲各棼亂。收誇爾朱功。壽訾武侯短。蜀魏爭正閏。島索互詆讎。馮道善變通。武媚宜郊禩。邪說旣紛紜。大道日離畔。矯矯趙夫子。朱墨久研鑽。家貧出負米。賓席弄柔翰。六經貯巾箱。三史供點竄。上下數千年。一一如珠貫。筆挾董狐直。書過袁豹半。辯如懸河注。目如巖電爛。論準過秦覈。語陋美新謾。示我兩卷書。明窗得吟玩。潛德有必彰。姦諛死無道。南山豈可移。先零何足按。霍若霧霧披。渙若春冰泮。明史今未成。授簡多疑憚。白頭雖有期。青竹何由汗。如君著作才。固宜參史館。說經常硜硜。陳史亦侃侃。形諸直如筆。千秋事可判。庶稟魯史程。得隨游夏贊。惜哉擅三長。無從置一算。抱書菰蘆中。慨然發永歎。概舉論事不平者。逐一披之。何等光明正大。

閒居寫懷

屈伸固有命。秋毫非人功。三世不徙官。執戟揚老雄。苟爽起布衣。百日至三公。猿臂終數奇。李蔡本下中。方壯旣悼顏。皓首仍悲馮。世有巧而躓。亦或拙而通。憂喜塞翁馬。得失楚人弓。時命苟不諧。不如安固窮。巧拙躓通。俱可不問。而一歸於安命固窮。君子視躬。莫踰於此。

同宋葯州太史登滕王閣

平生想慕滕王閣。未能千里驅輪蹄。豈意雲山落吾手。飄然直上凌飛梯。天風浩蕩入懷袖。頃刻塵眼開。金篋畫棟朱欄照城郭。丹樓碧瓦纓虹霓。吐納江流九派小。平壓雉堞羣峯低。落日倒射澄潭影。金波千頃浮玻瓈。上捫星辰若有路。下臨洞壑疑無蹊。賈客帆檣自來往。風濤出沒如鳧鷖。跼鳶飛鷁不敢到。長空杳杳鳴天雞。憶昔驕王盛意氣。臨風歌舞飄華桂。不惜金錢構飛閣。巖巖上與煙霄齊。子安文字當時體。縱橫萬象誰端倪。如何俳語笑倉猝。穎濱一老猶相詆。自注子由滕王閣詩云俳語笑倉猝江河萬古終不廢。少陵不敢輕排擠。人生遊跡過如掃。鴻爪一瞥飛東西。洪都勝地獨數此。偶然匹馬隨雙奚。閣公賓客今寂寞。幸有勝友能招攜。憑欄徙倚三歎息。山雲亂起煙悽迷。一代繁華有衰歇。三王文藻誰攀躋。我行自晒真孟浪。此遊聊可驕昌黎。落窠白題須出以新意中間子由之詆一段是也昌黎作記始終未到此閣末以己之遊覽驕昌黎之未遊亦是別尋蹊徑始

鷹坊歌與夏重愷功同賦

水磨自注地名園亭清且幽。碧柳陰濃古木稠。偶然攜客避炎暑。腥風忽覺來鸚鷗。云作閒坊爲養鷹。名材不惜千金收。板屋羈棲拳鐵爪。浮雲仰視張金眸。就中海青獨稱最。傳聞出自青海頭。銳頭猛腦特神俊。自矜恥與羣鷗儔。杉雞竹兔不足取。氣吞乳虎欺鼯牛。白山黑水出異產。在昔遼代曾窮搜。誅求因結女直怨。無端兩國興戈矛。愛鶴愛鷹皆速禍。羽物何事常招尤。頭鵝盛宴付逝水。晾鷹高臺成古邱。冰天朔漠

餘殺氣江山不改奇毛留。從來異物聚所好。攜籠走馬來荒陬。人間養鷹如養士。一時效用三時休。多畜馴鴿供餵飼。流血滲漉霑衿喉。填腸滿嗉意未已。一飽欲傲梁邊鷺。乃知惠養多倖竊。肉食未必皆能謀。虞人懸衡揣斤兩。軀骨輕重須相伴。自注。鷹必稱斤兩。以十八兩為準。肥苦鈍遲瘦無力。上臂能辨劣與優。空倉飢雀日叫噪。一出往往逢罝罟。爾曹攫肉偏遠患。得食那敢辭籠囚。譬若猛士饗牛酒。投石奮欲償恩讎。背距久閒求自試。常思一舉翻高秋。鷹乎鷹乎盍努力。霜天風緊將離鞬。鳥中惡物正不少。早拉訓狐擒鶴鷄。功成山藪得清廓。願汝仍化林間鳩。勿戕胎卵驚鸞鳳。阿閣萬一重來遊。先說金遼爭鷹。以致兩國起釁。次說養鷹不用同於肉食謀國。後說搏擊惡鳥。分別梟鸞。而歸於仍化爲鳩。仁厚不殺。此通篇結穴處。

讀梅村先生鹿樵紀聞有感題長句

一旅誰知扼紫荊。蝸蟻聒耳正紛爭。腹書競伏狐鳴火。手蔗頻驚鶴唳兵。直待臨危思剪牧。可應先事戮韓彭。石頭袁粲真堪惜。自壞邊關萬里城。自注。指東莞督帥袁公崇煥。○誅袁崇煥。此我朝用間。而前明爲間所愚也。事後追悔。何益哉。

東山卽事

湖風盡日響松杉。接席連牀共一巖。文到無情真悔作。口除飲酒只宜緘。晚涼欲試蒲葵扇。暑汗頻嫌葛越衫。破硯生涯今更拙。謀身端合託長鑱。

永嘉令馬公死寇難令嗣觀察公請於朝賜諡忠勤索詩

青袍白馬塞甌閩。一命官卑大義均。豈有兵符麾士卒。要將全節感臣鄰。君王未識真卿面。戰陣甘捐先軫身。尙念天恩未酬答。生兒留作報恩人。

諸葛武侯祠

臥龍潛下國。逐鹿走羣雄。慷慨吟梁父。撝謙拜德公。管蕭才豈匹。伊呂望應同。漢廟靈猶在。劉天姓未終。  
一犂畊隴畔。三顧出隆中。旒綬千年璽。絲懸九鼎銅。黃圖分社稷。赤壁掃艨艟。入蜀神基固。分荆隘路通。  
一噓火井燄。自注蜀有火井。漢盛時火熾。漢末漸微。孔明一窺之火。乃復盛。再起沛鄉風。操懿真如鬼。關張並是熊。自注周瑜謂關張熊虎之將。崎嶇箕谷路。流涕永安宮。定計收關隴。深期卜鎬豐。雜耕屯渭曲。籌筆洗荒戎。吞貉曾無芥。鞭狐欲折兇。自注石勒謂操爲狐媚。風雲開絕業。日月照孤忠。委寄尋前諾。艱危誓鞠躬。三分非素志。八陣漸成功。炎景終移祚。流星忽隕空。宅桑仍索寞。廟柏自菁葱。異地留祠宇。靈旗捲暮虹。綜忠武平生而言。工整蒼鬱。胎原出於少陵。

田從典字克五。山西陽城人。康熙戊辰進士。官至大學士。

擬七德九功舞歌效樂天體

七德舞。九功舞。武緯文經耀千古。朝廷干羽在兩階。天下車書盡九土。我皇御極垂衣裳。四方萬國來享王。自朝乃至日中昃。堯兢舜業不敢康。爲念斯民亦勞止。丹詔夕封馳萬里。咨爾強藩且載戈。釋甲歸來見天子。苟有三蘖方憑陵。一朝敢弄潢池兵。蕩搖滇黔連楚蜀。虔劉閩越驅鯢鯨。驛聞天子赫斯怒。皇言

一宣天日午。誓將滅此後朝食。取彼兇殘界豺虎。臨軒命將親推轂。中有天潢建牙纛。日射春旗萬馬鳴。雲開曉帳千官肅。一從荊鄂向三湘。一自江州下豫章。西指秦川臨劍閣。南經吳越度錢塘。王師所至如風電。合圍掩羣開一面。狼奔鼠竄皆倒戈。市肆不驚芸不變。王師所至多謠頌。行者願齋居者送。天語殷勤再四宣。無令南畝妨春種。一年轉戰雍梁間。二年克敵威荆蠻。三年掃清甌與越。一鼓遂進仙霞關。四年官軍收閩地。逆臣稽首歸藩位。五年賊渠死岳陽。六年百粵置胥吏。七年一舉入成都。夾擊東西疾度瀘。八年蕩掃昆明穴。普天率地歸皇圖。羽騎宵馳傳露布。從此江山復如故。侍臣拜手賀昇平。武士鳴鐃歌大獲。我皇恭己開明堂。木鳳銜書下八方。嘉與吾民共休息。欲偕斯世爲陶唐。思齊太任及太姒。翼子貽孫旣受祉。恭上徽音萬國歡。再沛恩綸與更始。昔時民間苦被兵。烏鳥聲樂多荒城。今日言旋復邦族。閭里不聞愁歎聲。昔時民間苦征役。男子輟耕婦休織。今日公家免踐更。鼓腹行歌仍作息。櫓槍滅迹三階平。我皇宵旰猶未寧。手披目覽釐庶績。早朝宴罷勤蒼生。天縱聰明兼聖學。研精書史窮邱索。著述開天冠百王。四海文明生禮樂。舞七德。舞九功。五絃之琴歌南風。願令世世陳王業。王業艱難萬古同。康熙二十

年十月。官軍收滇南。頒詔中外。示天下蕩平。允羣臣請上太皇太后。皇太后徽號。恩逮臣庶。陽城因傲。唐代七德九功之舞。作爲歌詩。中間三藥之畔。三藥之平。一一可考。當以詩史目之。詩之曲折頓挫。迤邐往復。得昌黎平淮西碑之體。不專學白樂天也。詩亦見翁司寇集中。豈翁爲大司成時。田爲太學生。代師長擬成稿本。耶。唐人詩中。兩見者有之。

趙俞字文饒。江南嘉定人。康熙戊辰進士。官定陶知縣。○定陶以他人累。牽引對獄。吏者再。後雖昭雪。然亦瀕於危矣。詩體靈敏之中。沖和自在。是爲正聲。

古風

弧矢用威敵。還爲奸宄利。蒼姬六典書。莽新實階厲。國息旣數慝。況乃肉刑議。後聖師前古。顛在行仁義。本司末則殊。沿革隨時世。孟軻今復起。亦不講井地。未聞書契作。仍可結繩治。聖人大法天。亦行所無事。介甫行周禮。適爲厲階。師法古人。在意不在迹也。安得此通達治體之言。

鴻纖列萬品。一一自稟賦。削觚使就規。涅縞忽失素。變本乃爲奇。矜新衆所驚。人於大塊中。果蓏一蟲蠹。吾欲追淳朴。各各安其故。因物付物間。斯理則已具。

斯蠡夏切股。翰音晨引吭。彼豈能自主。時至乃翕張。測天憑儀器。俄已易躔次。測晷以刻漏。時亦乖啓閉。夫豈聖人作。而顧謝物智。任人斯有爲。任天故不二。任天而行。人力不與。欲還淳朴。而不流入老莊。斯在有爲無爲之別。

踏車曲

杉櫛作筒。檀作軸。烏鴉銜尾聲。歷鹿赤露兩肘腹。無粥踏車辛苦歌如哭。前年井底泉脈枯。去年甌窰長菱蘆。旱年掘窩轉水入。潦年築隄翻水出。水入水出車欲裂。農夫那不筋骨折。無奈今年又苦旱。塘水少於衣上汗。往年車完人盡力。今年車破人無食。人無食不足卹。努力踏車聲太息。伍伯催租秋賦迫。連年未報災傷册。歌聲如哭。水少於汗。皆十成奇警語。聖朝恤民。不啻父母之於赤子。而連年水旱。猶有未報災傷者。何知有官而不知有百姓耶。

射虎行



居人傳言郭有虎。白晝咆哮出林莽。將軍蝟毛鬚倒豎。遣使發卒悉所部。白羽長箭大黃弩。皮作車茵肉治肺。虎見千人若無覩。千人驚顏色如土。箭未脫弦弩折附。虎起攫人如捕鼠。突出圍場公然去。當今四海樂昇平。軍士逍遙無什伍。將軍錦裘玉帶醉氍毹。胡爲輕擣虎鬚撻虎怒。從今軍府耀威武。只射兔巒莫射虎。

侶臺弟以悼妻哭子詩索和。憔悴篤情有不能已者。余欲發乎情而裁之以義也。輒有是作。

至痛君難割。前型我所師。延陵於禮合。奉情太情癡。尙有君親重。休爲兒女悲。節哀宜引義。不敢再題詩。  
以義節情歸於義。若助之悲悼。不猶醉人扶醉耶。只一製題。便得儒者立言之體。

舟行晚過青浦

孤篷秋氣入。此夕客心驚。露白浩無際。蟲吟併一聲。塔隨帆影走。潮湧月輪行。礫礫城烏起。譙樓已二更。  
浩字併字。鍾鍊而得。併字尤佳。

和查夏仲敞裘詩

無復如膏耀日輝。關河難禦雪霜威。配宜東郭先生履。煖勝西華公子衣。絁絨猶餘清節在。蒙戎轉覺旅情非。只應五月能忘暑。披上江鄉舊釣磯。  
典而雅。

岳忠武祠

檜樹枝生宋祚微。將軍那許總戎機。出師累捷身應死。與敵同讎事已非。脫幘收時光燄動。屬鏤賜後怒濤飛。孤忠願抱千秋恨。不共蘄王早見幾。以道濟伍胥比之冤抑相同而關係尤大此空際着題一法

彭無山給諫自河工召復原官喜而有作

三年薄宦臥江干。鳴鳳今朝刷羽翰。暫屈鄴侯參幕佐。忽宣唐介拜原官。重來寰海皆傾聽。一入朝廷便改觀。漢室淮陽終不召。須知納諫古今難。使事典切結意反襯出聖朝納諫工於立言

督亢陂

提劍荆卿勇絕倫。浪將七尺殉強秦。燕讐未報韓讐復。狀貌原來似婦人。見重智而不重勇也

王導

本無助德濟艱危。儒雅風流事又虧。臣族早知三窟就。風塵休障庾元規。江左夷吾何處生語

溪聲

結廬何日住深山。竹月松風相對閒。卻笑溪聲忙底事。奔流偏欲到人間。

聞鷓鴣

月照霜華石磴危。鉤輈苦怨客歸遲。故鄉亦是驚魂地。只恐山禽尚未知。

陶元淳

字子師江西南常熟人康熙戊辰進士官昌化知縣

暮歸僧寺和潘九儀韻

暝色城先到。人聲野更稀。山深難得月。水暗欲濺衣。魑魅憎人過。蟲沙得地飛。迷途知未遠。鐘起喚君歸。

臬使劉公枉書惠存詩以志感

一官萬里尹蒿萊。幾個生前歸去來。況復勞心陽子拙。敢云流涕賈生才。睨消瘴霧千山淨。春到蠻花滿地開。從此不愁風土異。生還終望我公哀。

和唐張謂韻

道路非難作吏難。一洲鰲背立郊壇。人言瓊管曾開府。我道囚山合挂冠。萬里親知春夢斷。一生事業暮潮寒。新恩已是投荒處。卻望新恩福地看。

如此途窮欲進難。朝天漫上越王壇。踟高不合伸強項。逐裸何須岸大冠。徼外山河逢帝醉。心頭鐵石向人寒。長安日下猶言遠。窮海孤臣那得看。二章與遺臬使劉公詩同意

史中義字蕉飲。江南江都人。康熙戊辰進士。官翰林院編修。著有蕪城集。

由富陽至龍游

沙禽亦無數。格格野塘秋。孤棹有時泊。遠山相向愁。月明烏柏樹。人散白蘋洲。何處津樓上。無眠聽櫂謳。

南海雜詩

石壁猩猩語。驚心百粵東。四時山葉綠。五夜海霞紅。日月搖溟渤。星河浸祝融。鷓鴣飛不斷。只在荔支叢。  
三語言地氣之暖。四語言東土日出早也。即海日生殘夜意。

曉上越王臺。扶胥海色開。山連鰲闕近。朝射虎門迴。灑座荔奴雨。吹香椰子杯。崎嶇未朝漢。割據亦雄哉。  
此弔尉佗之霸。

海雨花陰候。春泥屐響聲。鷓鬢簪抹麗。紈扇過清明。瑇瑁潮通市。芭蕉綠上城。昌華鼓舞院。銷盡美人情。  
此狀風物之明麗。

### 南昌

吳楚中流勢未平。章江雄闊客心驚。芒寒牛斗雌雄氣。風偃魚龍日夜聲。黨錮人高徐穉宅。封侯事往灌嬰城。豫章樓閣猶堪賦。賓主東南異代情。

### 朝雲墓

散盡泥金蛺蝶裙。雲藍小袖劇憐君。傷心白鶴峯前路。一樹榕陰蓋古墳。  
一女子而死於萬里之外。亦可傷矣。一樹榕陰。其人如在淺淺語。自有遠神。

吳

曠字元明。江南太倉人。康熙戊辰進士。官兵科給諫。有西齋集。○西齋爲梅村令嗣。工於詩筆。近體清穩。尤稱雅音。

### 和振西贈王將軍紫厓

九尺須眉七十身。眼中遺老更何人。將軍競病詩無敵。弟子丹青筆有神。談笑尙能開霹靂。太平不復畫麒麟。酒酣拔劍聽君語。爲感窮途意自親。

玉殿風流講席重。故山歸去拂塵容。門生爲致荒廚菜。禪客同尋舊院松。夢後莊周從笑鷄。書成揚子解嘲龍。歐陽筋力猶強健。不羨扶藜手一筇。揚子解嘲中云。執螻而嘲龜。龍去一龜字。古人每如此用。

著書不復爲窮愁。獨樂園林散百憂。人乍拋殘塵海夢。天教管領太湖秋。槎形東第奇章石。釣具南江魯望舟。從此終身巢許穩。風光真擬洛濱遊。將軍能詩。復能著書。管領名園。僧遊禪客。比少陵所咏將軍。好武稚子。總能文。尤得幽居之樂矣。太平盛事。於詩中遇之。

題徐太僕遺像

金璫禍國歎荆榛。只爲須眉不計身。四海清流真直節。五朝舊德老遺民。獨先元禮彈常侍。共幸林宗免黨人。畫像吳中前事在。團溪好寫白紗巾。自注。世傳吳中先賢畫像一卷。此効魏奄而未。被禍者。惜未詳其名。吳中先賢畫像。係張蟾筆。共三百餘人。今大半歸余家。

題顧亭林遺集和汪安公編修

野哭東風學采薇。纍臣白首尙單衣。江山有恨憂天醉。草木無情長地肥。避吏趙岐誰共語。離家王粲不思歸。祇餘帷蓋蘭臺舊。萬卷淒涼辨是非。

奉和座主東海公山居存一

東觀西垣按部居。牙籤萬軸載牛車。集賢手筆詞頭重。元祐文章叢目初。白髮乞湖狂道士。青山思穎老

尚書閉門碧草閑。秋色獨把遺編恣獵漁。時健菴尚書榮欲致之重辟而聖祖許其書局自隨保全舊臣者至也擬以賀監歐陽公不言君恩而君恩在言外矣得立言體之

### 贈張穉昭

相府蓮歌樂府春。清尊檀板話窮塵。誰傳天寶淒涼曲。柳市當年舊玉人。

花前月底奏新聲。夢斷昭華玉殿塵。記得雲間歌第一。貞元朝士已無人。此贈舊歌者與劉夢得贈歌者何戡聽舊宮人穆氏唱歌二絕

句一種風神

徐

賓字虞門江南華亭人康熙戊辰進士官給事中

### 遊梁詩

雄都形勝古梁州。匹馬衝寒訪上游。地控燕秦開闢域。天分南北鎖咽喉。平鋪白草千原曠。忽折黃河一線流。試上高臺還極目。城邊睥睨夕陽秋。

董思凝

字養齋山東平原人康熙戊辰進士官觀察使

### 擬古

楚人重葦施椒蘭。爲荆杞。宋人寶燕石。安知球琳美。真僞詎難分。奈何徒貴耳。觸熱趨炎翁。浮名取青紫。豈不羨時榮。願言敦素履。黽勉以爲期。毋爲識者鄙。

聽周紫海先生話海外三山之勝

塵世難向蓬萊遊。空懷三山縹渺之銀樓。年光彈指如飛電。安能一室兀坐生煩憂。嬾雲先生負奇氣。青瞳綠髮仙人儔。與余素心授寶訣。人間何處無丹邱。更言曾廁仙人裏。天風颯颯雲霧起。左攜東王公。右攜赤松子。仙山迢迢高入雲。方壺員嶠氣氤氳。側身俯視小天地。鸞啼鳳噉空中聞。忽然駕岱輿。羽蓋斑麟車。琪花雜瑤草。六甲備行厨。於是振衣長嘯。躡足雲巔。滄海一掬。萬山如拳。白鶴翔兮凌厲。神龍下兮蟠旋。雙童醉舞兮婉轉。素女含笑兮翩躚。螺書雍篆人不識。赤文綠字誰與傳。我不知方丈之峯幾萬里。扶桑之木幾萬年。白眼悠悠誠下士。欲往從之道如咫。古來慧業多能仙。何必丹砂與玉髓。秦皇漢武非仙才。鞭山驅石何爲爾。詩成笑傲俯人寰。天驚石破開心顏。朱草紛披誰處所。白雲蒼莽何時還。識得入無丹邱。則篇中所云。俱作夢遊天姥觀可矣。詩境超逸。亦傲青蓮。

孫致彌字愷似。江南嘉定人。康熙戊辰進士。官侍讀學士。有林左堂詩。

江行雜詩

一舸淹晨夕。平沙艤落曛。江潮晴湧月。山火夜燒雲。黑想蛟涎出。腥愁虎氣聞。明朝牽百丈。回首白鷗羣。  
鍊句近岑補闕。宋人便一直寫去。

鷺鷥村下路。停策弔沉淪。大義存晞髮。高風緬補脣。明時甘浪迹。亂世得全身。搔首嚴陵瀨。南陽有故人。

睡髮補脣一聯。過謝翱墓。方千宅也。五六分承。結到殿陵釣臺。乃見宗主。

城迥浮雲外。舟移亂石間。波光能奪月。灘勢欲驅山。過險心猶悸。思鄉鬢欲斑。君看松頂鶴。雲暝亦知還。

### 福州道中

指點三山近。輕雲護翠微。曉煙榕葉暗。春雨蔗田肥。野女修櫻笠。溪人浣氍毹。啼鶉苦竹裏。爭道不如歸。

### 秋感

遼海關門百二雄。長城萬里憶先公。儲胥自有風雲護。部曲空成帶礪功。一戰龍旂勞汗馬。廿年貝錦怨藏弓。不堪蔓草祈連塚。況復銅駝恨未窮。

原上英雄骨。半向君家養。馬來詩中亦同此感也。

### 詠史次王玠右先生韻

南都歌舞動雲霄。回首燕臺王氣遙。燕領何年馳鐵馬。羊頭此日總金貂。霓旌小苑明秋月。錦纜長江泛暮潮。龍虎親軍三十萬。登壇空想霍嫖姚。

此見四鎮不能周防。而金貂皆歸銅臭。雖長江天塹不能守也。下章兼選優伶言之。

六朝遺恨水潺潺。金殿繁華閉翠煙。但聽臨春歌玉樹。不聞清廟奏朱絃。銅駝泣露飛鳴鏑。鐵鎖沉江渡戰船。虎踞山前明月在。秋風怨絕李龜年。

### 同峻思大年訪華天御先生



蒲帆片片帶斜暉。路轉蒹葭興不違。白露爲霜楓欲脫。澄江如練鴈初飛。滄桑廿載衣冠在。猿鶴三軍事業非。回首悲笳驚日暮。新亭風景一沾衣。

感舊示魏禹平

寒燈無燄醉蒼騰。獨對遺編感慨增。複壁人曾藏北海。墓門劍許挂延陵。全家大節存忠孝。三世深交歷廢興。郭隗臺荒荆棘裏。茫茫棖觸恨難勝。自注。魏忠節公被逮。子敬先生從行。先中丞獨匿之邸舍。及忠節卒。先公盡斥衣物。佐其歸裝。延陵許劍乃與子敬札中語也。  
○忠節公父子忠孝。中丞公身子仗義。三世交情。合并寫來。遂覺生氣滿紙。

至江寧再疊前韻

蔽日浮雲已暫開。先秋偏覺氣悲哉。燕歸知入誰家巷。鳳去愁看舊日臺。胥靡敢期通帝夢。檻車羞比霸齊才。炎歊苦憶涼颼好。憑仗悲笳及早催。此學士脫罪後。重至金陵作也。胥靡之夢。虛期檻車之徵。無望詞近。退藏而用世之懷。勃然言下矣。後之遇合。已兆於此。  
同介脩孟游集元夫園居卽事抒懷

朱絃寥落賞音微。尊酒論心靜掩扉。遮莫文章供齒頰。底須愁病減腰圍。駃騠七日堪千里。大鳥三年始一飛。醉拂吳鉤談轉劇。主人忘送客忘歸。

張尙瑗

字弘遠。江南吳江人。康熙戊辰進士。官翰林院庶吉士。改江西興國縣知縣。○損持太史詩。風神未足。沉著有餘。猶書家之顏平原。柳誠懸也。生平宗法昌黎。故尤工古體。詩稿止鐫遊閩粵作。今全稿散失矣。深爲惋惜。○去官後。箋疏諸經。甚富已鐫者。有三傳折諸。

上灘

順流船似箭。逆流船似絆。衢陸地勢殊。牽輓程難算。江底清無泥。齒齒白石粲。船石相磨治。碯确冰初泮。深者四五尺。淺或未及半。牽船蹋冰行。挽衣不掩肝。膠淺筮難施。肩舁雜呼喚。已前而復卻。欲迎或還扞。一灘抵數里。一里或數灘。灘灘行相續。侵曉到日旰。惶恐黯默名。熟聞心已憚。豈識灩紋江。驚湍爾許悍。長歌行路難。擊楫發三歎。起二語謠諺已領一篇之意後形容上灘險艱不遺餘力令讀者目駭心悸灘亦音歎收十五輪中

九鯉湖

艱哉觀瀾亭。所歷皆懸度。過此鳥道絕。從遊慄相顧。途危景益佳。興發情無怖。身非鄴侯骨。暫作壁間步。強半蛇螻曳。有時猿攫鶩。磴斷體欲絕。根蟠足稍駐。琮琤絲竹澗。爛漫琪玕樹。壁水石雙門。挂嶺玉三柱。卻望珠簾垂。銀潢屑煙霧。直下去無幾。逴迴勞予溯。湍駛何潺潺。褰裳不可渡。長嘯向白雲。茫茫蒼靄互。徑路斷絕緣壁而行地螻同曳猿攫並騰服其真寫得出巖遊黃山蓮花溝百步雲梯曾親歷此境

謁韓文公廟

總角誦公文。不啻編三絕。半世味公道。無能劍一映。維公不朽姿。薄雲貫虹蜺。謗傷與誇銜。兩者均螻蟻。氛氳一瓣香。萬古應同爇。舉舉何末生。敢云景行切。潮陽謫宦區。偶然鴻爪雪。藉此滌炎陬。海濱斗杓揭。湖流漾清派。峯勢環飛岵。江山銜明德。臨眺心神澈。白雲飄檐楹。恍憶靈旗掣。公之行道只在倫常用不特謗傷者可嘖即誇銜

者亦見之未真也。讀原道篇自得。次章并其弟子表之。明其鎔冶人才有功後學。

史公識尊聖。世家表弟子。後雖未敢例。義在可竊比。濟濟伊洛徒。游揚復羅李。韓門數入室。若籍湜服喜。唐宋兩朝史。附傳共編記。匹夫百世師。坡言得之矣。配禹尙非誇。傳軻又何訾。荒荒海水南。明珠孕天水。過化遂成材。廟食芳蘋芷。蚪枝侍郎木。檜楷同薤薤。

觀音巖

巨靈施崑刀。劈破青玉筍。千里插江面。削平如概準。羣岡互起伏。離立車連軫。獨此琨瑤屏。截肪無粟疹。頂轟日黯黯。趾沉波泯泯。一線裂石罅。虛中駕闌楯。香華鬘陀像。瀕洞棲谷牝。淒風颯然來。獠獍度必實。安得立三分。言從伯昏瞖。王漁洋賦此題。中云。騎危躡虛空。險絕緣鈎梯。此云。一線裂石罅。虛中駕闌楯。可以互證。想見左右石壁。危闌駕壑。此巖未易登也。

彈子磯

競秀英州山。臨江多俯瞰。觀音與彈磯。巉絕奇尤占。劃然千仞壁。削出長天塹。鴻濛開闢時。鬼斧安施鑿。蚪柯縷絡之。蒙茸紛碧紺。乳竇小於拳。纍然不容觚。相傳廣明賊。彈落金丸陷。雄非天山矢。險異蜀門劍。但見灘流駛。湍急不可纜。懷古夫如何。寒風江湛湛。漁洋南來志云。彈子磯懸崖千仞。如洞如厂。斧鑿鑄鏡。擬於鬼神。詩中亦可互證。廣明賊未詳。

仙霞關

七閩路與中原通。怪事咄咄驚天公。岡連嶺複雲樹匝。飛鳥不度猿獠窮。微茫一線走絕壁。誰鑿溟津開。

鴻濛二十八盤尤斗絕。路難直似摩蒼穹。王公守國天設險。崑函轘轅自古崇。茲豈小巫怯百二。偏隅冷落箒篁中。正恐五丁力不到。無諸倔強憑籬泐。爾來文物盛唐宋。舟車衢信當要衝。虵形蟠曲盤磴道。史浩於此開榛叢。宋明王孫兩遺種。哀哀望帝啼鵲紅。日者井蛙跳涔水。高擁黃屋彎朱弓。陰平夜縋渠帥縛。崑崙電掃巢穴空。雖云負固不可恃。車箱箭筈名益隆。熱行五步一回首。僕夫告瘁心神忡。殘旗折戟渺何許。故壘瓦礫餘蒿蓬。淙淙飛泉下幽壑。棚衝百道鳴豐饜。迴谿互證前路失。恍惚七聖迷崆峒。南風不競自天道。嗟哉豎子時無雄。欲呼真宰鏟疊嶂。永俾灌莽無伏戎。左鼓右旗列几案。挖舟舁輜從西東。懷古登危重興歎。溟茫襟袖侵霧縹。仙霞關爲閩越扼要界。高二十里。爲級三百六十。曲二十二。宋史浩以就禽。中一段正指其事。縱橫排奐。一氣蜿蜒。得昌黎之氣骨。

查

昇字仲章。浙江海寧人。康熙戊辰進士。官至少詹事。著有澹遠堂集。○宮詹書法得董文敏之神。入直南書房時。聖祖屢稱賞之。

### 訪吳采山不值

秋水乘孤艇。沿緣亂葦間。時看黃葉落。境共白鷗閒。林影溪邊屋。鐘聲雲外山。故人今不見。月出棹歌還。

### 過浦口和清字

公路浦口浦水清。甘羅城外征人行。大河直下千萬里。哀鴈差池三兩聲。南國浮雲天際滿。異鄉秋草夢中生。側身四望渾無盡。新月江關一片明。風格亦從杜出。

陳丈樸菴招賞牡丹同人卽席分賦得明

金谷何如蜀錦城。放翁舊譜閱天彭。置身富貴何須早。到眼雲霞覺倍明。丁字簾前圍蝶翅。午時晝裏驗

貓睛。風流共憶清平調。合座春光醉玉罍。牡丹用富貴字最易近俗。此翻用之。轉覺其雅。死活之別也。○

燥此正午時花也。貓眼黑睛如線。此正午時貓也。貓且暮目睛圓。日午漸狹長。正午則一線矣。用來恰好。上一句以繡毬作陪襯也。

八里莊

斷井冰膠汲水痕。炊煙三兩不成村。客嫌南語呼難應。門對西風火不溫。白月荒途深夜柝。黃沙野菜雜

蔬盆。耳邊俄覺秋濤捲。臥聽駑駘齟草根。

陳大章字雨山。湖廣黃岡人。康熙戊辰進士。著有玉照亭詩鈔。○楚風舊沾鍾譚餘習。後又變為凌厲。芒角多而性情隱矣。作者矜平躁釋。一歸恬和。可以規其所養。

九江夜泊

解帆及夕陽。繫舟傍枯柳。天低九派流。浪抱孤城走。奇峯插斗南。雄勢壓江右。雲中五老人。見我時招手。

靜夜冷魚龍。古戍沉刁斗。欹枕不成眠。且飲潯陽酒。舟中望見五老。轉云五老招人。如此用筆。便覺靈活。

甕山拜耶律文正公墓

林轉河陰長。遙峯粲可數。迤邐得甕山。嶽嵌若覆釜。劫火土一抔。英靈耿萬古。元祖昔龍興。戎馬日旁午。

微公濟世心。斯人盡豺虎。荒祠香火微。斷碣聚鼯鼠。漠漠望秋雲。含情空激楚。耶律楚材。遼之裔也。輔元祖。有濟世功。予遊西山。曾

拜其墓

### 王文成紀功碑

碑略云。正德己卯。宸濠叛。稱兵向闕。破南康九江。攻安慶。臣以列郡兵復南昌。宸濠擒。餘黨悉定。天子聞變。赫怒。親統六師臨討。遂俘以歸。末云。式昭皇靈。嘉靖我邦國。時庚辰正月也。明年嘉靖入繼大統。果符其讖。先是公將獻俘闕下。江彬等檄令縱之鄱湖。俟上親戰而後奏。凱公不得已。間道入杭。以濠授張永。遁入九華山。隨補奏。序彬永等功上之。然公卒無賞。嘉靖初。下其議。乃起爲南京兵部尙書。封新建伯。

武皇巡遊不知疲。朝御豹房暮京西。羣狐跳梁嗥且舞。搖搖九鼎一髮危。宸濠躩躩寔蟠起。盤結肘腋成窮奇。堂堂孫許仗節死。孫中丞繼許按察達東南傾刻翻潢池。虔州中丞屹柱石。忠義憤發非人爲。同時幕府盛才傑。

太守伍邢諸公

戮力共豎天王旗。黃石磯前一再戰。掃除凶燄無子遺。事不浹旬功再造。隻手半壁扶坤維。當時廟謀亦癡絕。露布已上重誓師。天子自將佩將印。六軍雷動江淮湄。謗書何止盈一篋。當關虎豹皆狐狸。深謀豁達格神鬼。苦心退託隨髡緇。開先寺前七佛碣。旁有大字鐫崔嵬。雅頌嚴正揭日月。蝌蚪錯落

擊蛟螭。改元兆讖實天啓。酬庸錫爵開禎期。平原之書次山筆。千載以後非公誰。昔從流傳看搨本。頃來石壁瞻豐碑。公之英烈傳萬古。求之翰墨蓋已卑。區區羣兒肆口舌。劍首一映終何施。嗚呼。奇人奇功不

世出使我摩挲再拜與嗟咨。真續安化王也。先宸濠反。楊一清仇鉞討平之。○王守仁禽宸濠。只三十六日。時安邊伯許泰。太監張忠等皆受宸濠賄。恐守仁見上。聲其罪。轉言守仁先與宸濠連。後乃變計。武宗知其忠。不信。復言其必反。多方沮抑之。守仁先以宸濠付張永。既乃入九華山。僧寺待罪。得免。詩中直陳始末。作傳讀可也。

登小孤山

蜀江萬里浮鴻濛。洞庭勢挾彭蠡雄。小孤突起插天半。百川砥柱為之東。磴道虛無動寒色。漁舟一葉傍絕壁。蛟鼉正晝吼風霾。泱泱孤雲天地白。參差樓觀麗朝霞。繡聲珠箔顏如花。陰巖咫尺蓄雷雨。怪樹千歲盤龍蛇。吳楚雄關此第一。折戟沉沙莽蕭瑟。憑闌決背倚半酣。盡捲乾坤入詩筆。隔江清靄有彭郎。銀河帶水遙相望。舟師招手聞絕叫。急趁南風過馬當。小姑嫁彭郎。東坡偶然戲筆。後人輒以此相譏。殊可笑也。此出以端重之筆。能脫窠臼。

送胡卜子南歸

春光叫徹栗留音。贈別何堪折柳吟。空說高臺收駿骨。祇應敝帚享千金。五更風雨窮交淚。驛路鶯花故國心。白雉岡頭荒圃在。未妨述作老雲林。

陸寅

字冠周。浙江錢塘人。康熙戊辰進士。○冠周高士。麗京之子。麗京出亡不歸。冠周訪父。幾遍宇內。終不得。幽憂畢。生少歲。即有豫章拔地之勢。遭困厄。詩品愈高。刊文集時。名未成也。戊辰後。詩無刊本。故未得見。

歧路行

出門竟何之。東西南北皆路歧。僕夫執轡馬躑躅。驪歌一聲聲最悲。道傍桃李似惜別。飛花故撲金屈卮。

人生目前貴適意。不如還逐屠沽兒。兄袁盎。弟灌夫。相逢自負高陽徒。擐菹百萬能呼盧。朝金張。暮許史。拔劍欲爲知己死。眼前誰是嚴仲子。

### 宣德箭歌

丁巳夏。余客長安市。有鬻爬背麻姑爪者。視其桿。有宣德八年餘于縣所貢竹箭字。後無所用。散落民間。改爲爬背之具。余乃作歌。

長安城東鬻廢箭。故老歛噓萬人看。金鏃敲殘鼓鑄鋒。鴉翎落盡丹黃變。棄擲風塵未嘗試。老桿分明宣德字。珍惜曾教武庫藏。標題尙識良工製。高皇昔日戎衣著。劍掃妖氛定雄略。已見蒲稍入大宛。更聞蒟醬開邛笮。茫茫九服初通貢。竹箭東南待弦控。包茅常例豫章來。司空檄取官胥送。貽謀孫子但垂衣。夜黃星護紫微。三殿日高香不散。上林花暖燕羣飛。夕烽并罷平安火。服御深宮無一可。青蘂燒出碧雞成。熏鑪製就黃金裹。內家擎獻龍顏動。流落人間至今重。金馬銅駝倏已非。石柰楛矢成何用。只今新製逾工巧。故物休言舊時好。猛將難調神臂弓。仙人且代麻姑爪。君不見銀泉山下草蕭蕭。狐兔秋原正寂寥。仰天大笑羽毛落。一箭穿雲看射鵰。從明自宣德後。武備漸弛。至正統而有土木之變矣。從廢箭中發露此意。點入宣窰宣鑪不同閒筆。

### 秋日憶家大人粵遊

又見秋風動。蘆花江渚飛。忍看時序變。猶與老親違。遠信無他語。深情祇望歸。應憐揮手日。兒女共牽衣。



真摯  
近杜。

自笑

自笑桑弧志。天涯只布衣。到家翻是客。逆旅豈如歸。白日從愁盡。青山入夢非。緘書與僮僕。爲掃釣魚磯。  
五六寫盡作客人心事。青山入夢非。卽夢裏還家不當歸意。此覺更簡。

錢塘懷古

祠廟吳山草木凋。蘆中窮士舊吹簫。眼看吳市東門甲。怒捲錢塘八月潮。烏喙竟能亡敵國。魚腸應悔刺王僚。錦帆一片風流盡。白馬紅旗浪裏招。  
東門。史記正義謂鱸門。卽錡門。後改葑門。子胥云。懸我目於東門之上。以觀越寇之入也。悔刺王僚。見位傳僚之子孫。越未必滅吳也。前此無人道及。

秋日雜感

翹首天涯那可憑。丹楓一望淚初凝。卻羞軹里逢嚴遂。曾否夷門辱信陵。攬鏡未應頭似雪。埋憂不辦酒如澗。棹歌且逐中流去。蕩槳操舟我亦能。  
頡聯見不逢知己意。

沈名孫 字礪房。浙江錢塘人。康熙庚午舉人。選攸縣知縣。未赴。著有梵夾集。○漁洋香祖筆記中載門人沈礪芳詩話三則。本字礪房。筆記中應誤書。

題畫冊

篷開獵獵風脚。舵曳瀾瀾浪痕。杜宇飛邊蜀道。哀猿啼處荆門。遠紅夕照千里。濃綠垂楊幾村。已到落帆。

亭下客心還怕黃昏。六言律詩。偶備一格。

### 去京師

望望南天雲樹迷。滄浪仍臥釣魚磯。誰言京洛縑塵滿。我獨還家是素衣。予咏白燕末二語云。京洛何妨共栖宿。素衣未必化為縑。有同

心也。第礪房寫懷。予則託興。

惠周惕。字元龍。江南吳縣人。康熙辛未進士。由翰林院庶吉士。改授密雲知縣。著有研溪詩集。○研溪先生。受業於堯峯汪氏。故詩格每兼唐宋。然皆自出新意。風神轉佳。不似他人。摭拾宋人

字面以為能事也。生平達於經學。貫穿融浹。亦不第以詩家品目之。

### 出門

饑寒逼腐儒。顛倒作奇想。長安遠於日。無故思一往。曾聞丈夫雄。咫尺視天壤。豈知適千里。三月費勞攘。出門心事。為起手十字道。盡然能抱道守拙。飢寒亦

不能逼也。為裝迫旦暮。無乃太鹵莽。蕭然一室中。何物是行帑。念此壯心摧。低徊轉悒怏。

浮雲翳清晨。孤帆雨初注。結束上高堂。迴遲更千慮。苦心發懽顏。但道舟楫具。小兒不知愁。牽衣乞同去。

### 夜坐有懷

不忍與明言。多方使之誤。送行雜親朋。刺刺語及暮。風急雨漸稠。篙師發微怒。郎今何多談。明日誰與訴。

青天如澄江。片月初洗出。草光露離離。樹影風瑟瑟。寒更夜點疎。驚羽孤飛疾。惆悵不成眠。懷人坐終夕。

簡極  
高極

從赤城至國清寺

千山萬山渺何處。塔影層層國清路。斜陽林外送微風。布襪蕭然蹋雲去。寺外澄潭一鏡圓。連漪倒浸青蒼山。長松蜿蟺落潭底。白日疑有蛟龍眠。泉聲曲折引我入。菩提一樹高摩天。龐眉老僧可人意。爲我掃石開禪關。匏樽酌茗薦瓜果。野味足洗官庖羶。坐來庭徑轉岑寂。修竹杳窈聞清猿。北窗跛腳許高臥。冰簟蔭借青琅玕。始知物外卽幽曠。化城何必離人間。念昔平生俱道長。行驂劫劫無停鞭。三年席帽客京國。口識甘苦難爲言。今歲崎嶇浙東道。水浮陸走行三千。自注。自錢塘太平永嘉至台州。將出紹興計三千里矣。人生如此竟何爲。空使慘戚凋朱顏。誓從今日抉塵網。山深林密行盤桓。桃花流水跣足渡。鬼峨半醉來參禪。但寫國清之直。得平生道長一段。以往日之艱辛。觀目前之游衍。彌覺條然物外趣味無窮矣。七言古。須於平直中尋出曲折。

贈維揚顧書宣

維揚顧子文章雄。渡江問我清溪東。入門一見便驚絕。袖底詩卷光熊熊。造次手攬讀未徧。齒牙陡覺生清風。君言學詩二十載。前後正變差能窮。人生眉眼不自見。願以妍醜煩青銅。余時怵惕未敢荷。君才何健詞何恭。吾身貧賤困荆棘。竊弄筆墨吟三冬。一言落紙與俗忤。口排吻擊轟兒童。邇來讀書但自省。得失豈暇爭雞蟲。聞君議論復感發。如瞽得相行有筇。君才趨捷實倍我。何以屬我相磨礱。乃知賢者不自

伐虛襟苦抑由中充。從今尊酒托末契。女蘿裊裊緣長松。得聞君善我必勸。若遇我過須君攻。昌黎韓子昔有語。終始相合如駟蛩。君今別去正秋暮。得句幸寄南飛鴻。眉眼不自見二語。妙喻不減東坡。

同諸君興聖寺看杏花

誰翦明霞散山曲。千枝萬枝紅籊籊。五家合隊麗人行。杜老嘗騰看不足。聊憑杯酒添春酣。烏帽欹斜尙可簪。客路心情似春雨。晚來和我夢江南。必徵引杏花典實。便是笨伯。妙處正在離卽間也。然得此解者甚難。若竟以不切爲能。則又誤會其旨矣。

再賦一首示耑木及同游諸子

西勾之西花爲國。暈碧裁紅鬪顏色。杏花今歲開獨遲。不共棠梨作寒食。嫣然一笑破寺中。恰似詩人在遷謫。嬉春寶馬空當當。盡是看紅不看白。看紅看白。遺山語。楊郎愛惜攜酒過。花欄日底相婆娑。清香泥人著裯席。酒鱗瀉影搖紅波。花如有情解留客。到手莫負金叵羅。春風去矣綠陰合。明日花老君如何。正值改官縣尹時。隨所感觸。俱成妙語。按其詩稿中知之。

夏日寫懷

自從飛鞚到人寰。最憶城南香水灣。旅舍一涼來好雨。竹牀昨夜夢青山。藕花風繞湖三面。紅豆陰輸屋半間。更有西鄰垂白叟。來言玉桂待同攀。

重九潘長公恬庵昆仲招同魏蒼石飲太白樓分韻

天圍睥睨擁南樓。畫枕飛甍俛濟州。千載尙餘高士蹟。一尊今續酒人遊。碧雲淡日黃花節。紅樹西風白鴈秋。客裏放懷須酩酊。莫教根觸故鄉愁。

敝裘和查夏重

一番淒風促暮砧。漫傾殘箭付縫紉。絲紋斷續難容線。毛理稀疏不受鍼。猶有餘溫勝短褐。還將獨夜抵重衾。歲寒惟爾堪相倚。忍爲豐貂易素心。一結見用意之厚待物待人俱如此矣。推而廣之。詔求故劍亦是此意。

再用衣字韻悼亡妾趙氏

春時初嫁秋來病。九月東遊我未歸。獨擁寒衾壓鍼線。辛勤還爲寄冬衣。年來無夢到彤扉。臥聽三商玉漏稀。記得去春風雪夜。添香喚我著朝衣。

棹歌

秋光瑟瑟半江紅。花事闌珊到水蕩。昨日芙蓉今日老。一年生怕鯉魚風。

上海图书馆藏书



A541 212 0004 0700B

